

యోహాను రాస్తి సువార్త

నెల్వ కిబిసినిక

పన్నెండు మణిసిర్ సిసూర్ లొఇ ఒరెనాతి యోహాను రాస్తి పుస్తకమ్నె యాక. యేసు యా లోకమ్దు బత్తిజి మహివలె జర్గితి దన్నివందిజ్ కతవజి వాండ్రు వహ్సినాన్. యేసు ఎయెన్? వాండ్రు దేవుణు మరిసి, దేవుణు వెట మహికాన్, గాని వాండ్రు దేవుణునె. తయార్ కితిక ఇనికబా వాండ్రు సిల్లెండ కల్లివితాద్. వాండ్రె దేవుణు మాట, లోకురి విజిరి పాపమ్కు సాన్పిస్తెజ్ పూజ ఆతి మెండ గొరై పిల్ల లెకెండె వాండ్రు. ఎలాకాలం బత్తిని బత్తు సీని టిండి లెకెండె వాండ్రు. లోకమ్దిజ్ జాయి లెకెండె మనాన్. నెగ్గి గవుడుఎన్ లెకెండె మనాన్, సావుదాన్ మర్జి నిజిత్తి బత్తు సీనికానె వాండ్రు ఇజి యేసు వందిజ్ యా పుస్తకమ్దు వెహ్సినాన్. యా సువార్త రాసి మహివలె, రోమ గవర్మెంటుదు మన్నికార్ దేవుణుదిజ్ నమ్మితి వరిజ్ నండో మాలెజ్ కిజి మహర్. అందెజె నమ్మితి వరిజ్ దయిరం సీదెజ్ యోహాను రాస్తికాదె యా పుస్తకం.

యేసు క్రీస్తు దేవుణు వాక్యం

1 లోకం పుటిన్వండ ముజాలె, దేవుణు వందిజ్ వెహ్సినాని వాక్యం ఇనికాన్ ఒరెన్ మహాన్. వాండ్రు దేవుణు వెట మహాన్. వాండ్రె దేవుణు.

2 వాండ్రు లోకం పుటిన్వండ ముజాలె, దేవుణువెట మహాన్.

3 విజు వన్నివెట దేవుణు తయార్ కితాన్. కల్లితిమన్నిక ఇనికబా వాండ్రు సిల్లెండ కల్లివితాద్.

4 జీవు వన్నిబాన్ మనాద్. అయా జీవు లోకురిజ్ జాయి ఆత మనాద్.

5 జాయ్ సీకటిదు జాయ్ సీజినాద్. గాని సీకటిదుమన్నికార్ జాయ్దిజ్ నెన్ ఏతార్.

6 దేవుణు బాణిజ్ పొక్తి ఒరెన్ మణిసి వాతాన్. వన్ని పేరు యోహాను.

7 వాండ్రు అయా జాయ్ వందిజ్ సాస్యం వెహైజ్ ఒరెన్ సాసిలెకెండ వాతాన్. ఎందానిజ్ ఇహిజ, విన్నిబోద వెంజి లోకుర్ విజెరె అయా జాయ్దిజ్ నమ్మిదెజ్ వాతాన్.

8 యోహాను అయా జాయ్ ఆవన్. గాని అయా జాయ్ వందిజ్ సాక్సం వెహైజ్ వాతాన్.

9 అయా జాయ్ నె నిజమాతి జాయ్. నిజమాతి జాయ్ లోకమ్దు వాజి లోకురిజ్ విజెరిజ్ జాయ్ సీజినాన్. వాక్యం నె నిజమాతి జాయ్.

10 వాండ్రు లోకమ్దు మహాన్. లోకమ్దు మనికెజ్ విజి వన్నివెటనె దేవుణు తయార్ కితాన్. గాని లోకుర్ వన్నిజ్ పొలిస్సెజ్ అట్ ఏతార్.

11 వాండ్రు వన్ని సొంత దేనమ్దు సొహాన్. గాని వన్ని సొంత యూదురి లోకుర్ వన్నిజ్ డగ్గు కి ఏతార్.

12 వన్నిజ్ ఎసాండార్ డగ్గు కితారో, వారె వన్నిముస్కు నమకం ఇట్టికార్. నన్నివరిజ్ వన్నికొణ్డోర్ ఆదెజ్ వాండ్రు అతికారం సిత్తాన్.

13 వారు అప్పొసి వెట పుట్టికార్ ఆవర్. ఒణ్డోల్ ఆనదాన్ పుట్టికార్ ఆవర్. వారు ఎత్తు కితివజి పుట్టికార్ ఆవర్. దేవుణు నె వరిజ్ వన్ని కొణ్డోర్ ఇజి ఇట్టాన్.

14 వాక్యం ఇనికాన్ లోకు ఆతాండ్రె మా నడిమి బత్తితాన్. వాండ్రు మా ముస్కు వన్నిదయాదర్మం పూర్తి తోరిస్తాన్. వాండ్రు దేవుణు వందిజ్ నిజమాతికెజ్ పూర్తి తోరిస్తాన్. వాండ్రు ఎసా గొప్పపెరికాన్ ఇజి మాపు సుండేతాప్. బుబ్బ బాణిజ్ వాతి ఒరెండ్రె మరిసి ఆతి గొప్ప పెరివన్నిజ్ సుండేతాప్.

15 యోహాను వన్నివందిజ్ సాక్సం వెహినాన్. వాండ్రు లోకురిజ్, “నా వెన్కా వానికాన్ నజి మిస్తికాన్. ఎందానిజ్ ఇహిజ, వాండ్రు నాను పుట్ ఏండ ముజాల్ మన్నికాన్ ఇజి నాను వెహికాన్ వీండ్రె”, ఇజి డటం డేల్ని వెహ్తాన్.

16 వన్ని పూర్తి దయాదర్మం దాన్ వాండ్రు మజి విజెరిజ్ దీవిస్తాన్.

కాలమ్కు గడఃప్పి మహిజ్బా వాండ్రు మజీ దీవిసినె మంజినాన్.

17 యూదురిజ్, రూలుజ్ మోసెవెట దేవుణు సితాన్. వన్ని దయా దర్మం ని వన్ని వందిజ్ నిజమాతి సజతిజ్ యేసు క్రీస్తు వెట వాతె.

18 ఎయెన్బా ఎసెజ్బా దేవుణుదిజ్తోఎన్. గాని అప్పొసి పడఃకాద్ మన్ని, దేవుణు వెట సమానం ఆతి, ఒరెండ్రె మరిసినె దేవుణు ఎయెన్ ఇజి మజీ తెలివి కిబిస్తాన్.

యోహాను యేసు వందిజ్ వెప్పిని సాస్యం

19-20 యెరూసలెమ్దాన్ యూదురి పెద్దలిజు, యోహాను డగ్రు పుజెరిజు ని లేవి జాతిదు మన్ని వరిజ్ పోక్తార్. “నీను ఎయెన్ ఇజి వెహె ఆజిని?”, ఇజి వెన్బాదెజ్ వరిజ్ పోక్తార్. నస్తివలె యోహాను ఈహు వరిజ్ సాక్సి వెహ్లాన్. “నాను క్రీస్తు ఆవ”, ఇజి నెగ్రెండ వెహ్లాన్.

21 అయావలె వారు, మరి నీను ఎయి? నీను ఏలియ ప్రవక్తనా? ఇజి వెన్బాతార్. “ఆవ”, ఇహాన్. “నీను మాపు ఎద్రు సూణి ప్రవక్తనా?”, ఇజి వెన్బాతిజ్, “ఆవ”, ఇహాన్.

22 అందెజె వారు, “నీను ఎయెన్? మజీ పోక్తివరిజ్ మర్జి వెహ్లాజ్ నీను ఉండ్రె జబాబు సిదా. నీ వందిజ్ నీను ఇన్నిక ఇజి వెహె ఆజిని?”, ఇజి వెన్బాతార్.

23 దన్నిజ్ యోహాను యెసయ ప్రవక్త వెహ్లావజ వెహ్లాన్. “ప్రబు వందిజ్ సరితినాజ్ కిదు, ఇజి బిడిఃమ్ బూమిదు డేల్సినివన్ని లెకెండ్* మన్న నాను”.

24-25 వన్ని డగ్రు వాతికార్ పరిసయరు పోక్తికార్. అయావలె, అయా పరిసయురుజు లొఇ సెగొండార్ వన్నిజ్, “నీను క్రీస్తు ఆఇజు, ఏలియ ప్రవక్త ఆఇజు, మాపు ఎద్రు సూణి ప్రవక్త ఆఇజు, మరి ఎండనిజ్ నీను బాప్తిసం సీజిని?”, ఇజి వెన్బాతార్.

26 దన్నిజ్ వాండ్రు, “నాను ఏరుదాన్ బాప్తిసం సీజిన. గాని మరి ఒరెన్ మనాన్. వాండ్రు మీ నడిఃమి మనాన్. వన్నిజ్ మీరు పోలిస్ఇదెర్.

* 1:23 1:23 యెసయ 40:3.

27 వాండ్రె నా వెన్కా వాజినికాన్. వన్ని జోడేకు బేట్టు కూతెజ్బా నాను ఏవటితికాన్ ఆవ”, ఇజి వెహ్తాన్.

28 యొర్దాను ఇన్ని గడ్డ అతాహ పడకాద్ మన్ని బెతానియ ఇన్ని పట్టుమ్దు యాకెజ్ విజు జర్గితె. బానె యోహాను బాప్తీసం సీజి మహాన్.

29 మర్సనాండిజ్, యేసు వన్నిడగ్రు వాజినిక యోహాను సుడేతాన్. సుడేతండ్రె వాండ్రు, “ఇదిలో లోకురి పాపమ్క వందిజ్ పూజ ఆదెజ్దేవుణు పొక్తి వన్ని మెండ గొరె పిల్ల. వాండ్రు లోకురి పాపమ్కు సొన్నిస్సాన్”, ఇజి వెహ్తాన్.

30 “నా వెన్కా ఒరెన్ వాజినాన్, వాండ్రు నజీ ఇంక మిస్సికాన్. ఎండనిజ్ ఇహిజు, వాండ్రు నాను పుట్ఎండ ముజుల మన్నికాన్ ఇజి నాను ఎయె వందిజ్ వెహ్తానొ వాండ్రె వీండ్రు’.

31 వీండ్రు ఎయెన్ ఇజి నానె నెన్ఎత. గాని ఇస్రాయేలు లోకురిజ్ వీండ్రు ఎయెన్ ఇజి తెలివి కిని వందిజె నాను ఏరుదాన్ బాప్తీసం సీజి వాత”, ఇజి వెహ్తాన్.

32 మరి వాండ్రు నెస్తిక ఈహు సాక్సి వెహ్తాన్: “దేవుణు ఆత్మ ఉండ్రె పారపొటి లెకెండ ఆగాసమ్దాన్ డిగ్జి వాజి వన్నిముస్కు మంజినిక నాను సుడేత.

33 నానుబా వన్నిజ్ నెన్ఎండ మహ. గాని ఏరుదాన్ బాప్తీసం సిఅ ఇజి నజీ వెహ్తా పొక్తి దేవుణునె నజీ వెహ్తాన్, ‘దేవుణు ఆత్మ డిగ్జి ఎయెర్ ముస్కు మంజినిక నీను నూణిదొ వాండ్రె దేవుణు ఆత్మదాన్ బాప్తీసం సీనాన్’, ఇజి.

34 వెహ్తా లెకెండ వినిజ్ జర్గితిక నాను సుడేత. అందెజె నాను వెహ్సాన, ‘వీండ్రె దేవుణు మరిసి ఇజి’.

యేసు మొదొహి సిసూర్

35 మర్సనాండిజ్, మరి, యోహాను వన్ని రిఎర్ సిసూర్ వెట నిహ మహాన్.

36 అయావలె యేసు అయా సరి సొన్ని మహిజ్, వన్నిజ్ డిటం సుడేజి, 'ఇదిలో, పూజ ఆదెజ్ దేవుణు పొక్తి వన్ని మెండ గొరై పిల్ల', ఇజి వెహ్లాన్.

37 అయా రిఎర్ సిసూర్ వాండ్రు వెహ్లాక వెహారె, యేసు వెన్యా సొహార్.

38 యేసు మహ్తాండ్రె, వారు వెన్యా వాజినిక సుడుతాన్. సుడేతాండ్రె వరిజ్, "మీరు ఇనిక రెబాజినిదెర్?", ఇజి వెన్బాతాన్. వారు వన్నిజ్, "రబ్బి, ఇహిజ బోదిస్సికాన్, నీను ఎంబె మంజిని?", ఇజి వెన్బాతాన్.

39 వాండ్రు, "రదు, వాజి సుడేదు", ఇహాన్. అందెజె వారు సొహారె, వాండ్రు మంజినిబాన్ సుడేతాన్. అయా రోజు వారు వన్నివెట మహార్. అయావలె రమారమి పొగల్నాల్లి గంటెజ్ ఆత మహద్.

40 సిమోన్ పేతురు తంబెర్ని ఆతి ఆంద్రెయ్ ఇన్నికానె యోహాను వెహ్లాక వెంజి యేసువెట సొహి రిఎర్ లొఇ ఒరెన్.

41 వాండ్రు వెటనె, వన్నిఅన్నసి సిమోనుజ్ రెబాతాండ్రె, "మాపు మెసయెజ్† సుడతాప్", ఇజి వెహ్లాన్.

42 వెహ్తాండ్రె వన్నిజ్ యేసు డగ్రు తతాన్. యేసు సిమోనుజ్ సుడేజి, "నీను యోహాను మరిసి ఆతి సిమొను. నీను కేప ఇజి కూకె ఆనిలె", ఇజి వెహ్లాన్. (గ్రీకు బాసదు అయా మాట పేతురు ఇజి రాస్త మనాద్. దని అర్థం ఇన్నిక ఇహిజ సటు ఇజి).

యేసుపిలిపుజ్ నతనయేలుజ్ కూక్సినాన్

43 మహ్నా నాండిజ్, గలీలయ ముటదు సొండ్రెజ్ ఇజి యేసు ఒడేబితాన్. అయావలె, వాండ్రు పిలిపుజ్ దసూల్ ఆతాతాండ్రె వన్నిజ్, "నా వెట వాజి నా సిసూడుః ఆఅ", ఇజి వెహ్లాన్.

44 పిలిపు బెత్నెయ్ ఇని పట్నమ్దికాన్. పిలిపు, ఆంద్రెయ్, పేతురు వీరు ఉండ్రె పట్నమ్దికార్.

† 1:41 1:41 మోసయ ఇహిజ దేవుణు వన్ని లోకురిజ్ రక్సెన్జె ఏరపాటు కిత్తి పొక్తికాన్. ఇది ఏబ్రి బాస

45 పిలిపు నతనయయేలు ఇని వన్నిజ్ రెబాతాండ్రె వన్నిజ్, “మోసె రాస్తి సితీ రూలుదు వాండ్రు రాస్తి మన్ని వన్నిజ్, ప్రవక్తరు బా రాస్తి మన్ని వన్నిజ్ మాపు దసూల్ ఆతాప్. వాండ్రు నజరెతుదికాన్ ఆతి యేసు. యోసేపు మరిసి”, ఇజి వెహ్హాన్.

46 అందెజె నతనియేలు వన్నిజ్, “నెగ్గికెజ్ ఇనికబా నజరేతుదాన్ వానాదా?”, ఇజి వెన్బాతాన్. వన్నిజ్ పిలిపు, “వాజి సుడేత”, ఇహాన్.

47 యేసు నతనియేలు వన్ని డగ్రు వాజినిక సుడేతండ్రె, “ఇవిలోన్ నిజమాతి ఇస్రాయేలుదికాన్ వాజినాన్. విని లొఇ ఇన్ని నెఇకెజ్బా సిల్లు”, ఇజి వన్ని వందిజ్ వెహ్హాన్.

48 అయావలె నతనియేలు వన్నిజ్, “నీను ఎలాగ నజి నెస్సి?”, ఇజి వెన్బాతిజ్ యేసు, “పిలిపు నిజి కూక్వండ ముజాలె, నీను బొడెమరాన్ అడిగి మనిక నాను సుడేత”, ఇహాన్.

49 నతనియేలు, “బోదిస్సికి, నీను దేవుణు మరిసి. నీను ఇస్రాయేలు లోకురి రాజు”, ఇహాన్.

50 అందెజె యేసు వన్నిజ్, “నీను బొడెమరాన్ అడిగి మంజినిక నాను సుడేత ఇజి నాను వెహ్హాజ్ నే నీను నమిజిని. దినిజ్ ఇంక మిస్తి నండొ పెరి పణిజ్ నీను సూణిలె”, ఇజి వెహ్హాన్.

51 వాండ్రు వన్నిజ్, “నాను నిజం వెహ్హిన, ఆగాసం రెయ్ ఆజి దేవుణు దూతెజ్ లోకుమరిసిఆతి నా డగ్రు ఎక్సి సొనిక డిగ్జి వానిక నీను సూణిలె”, ఇజి వెహ్హాన్.

2

యేసు కితి మొదొహి బమ్మ ఆతి పణి

1 రుండి దినమ్కు సొహి వెన్కా, గలీలయ ముటది కానా ఇని పట్టుమ్దు ఉండ్రె పెండ్రె జిగ్గితాద్.

2 యేసు అయ్సిబాన్ మహాద్. యేసుజ్ని వన్ని సిసూర్జబా ఆ పెండ్రెదు కూక్వార్.

3 ద్రాక్షకల్లు వీజితివెలె, యేసు అయ్యసి వన్నిజ్, “ద్రాక్షకల్లు వీజితాద్”, ఇజి వెప్టాద్.

4 అయావలె యేసు, “ఓ యా, దిని వందిజ్ నీను నజి ఎందనిజ్ పణసిని? నాను ఎయెన్ ఇజి తోరె ఆదెజ్ దేవుణు నా వందిజ్ వీరపాటు కితి వేలా ఇంక రెవెదె”, ఇజి వెప్టాద్.

5 యేసు అయ్యసి పణికినివరిజ్, “వాండ్రు మిజి ఇన్నిక వెప్టాజ్బా మీరు కిదు”, ఇజి వెప్టాద్.

6 దేవుణుదిజ్ ఇన్ఱం ఆత్తివజ మండ్రెజ్ యూదురు సుబ్బరం ఆనార్. సుబ్బరం ఆనివందిజ్ వారు నోర్బానార్. అయాక వరి ఉండ్రె ఆసారం. ఆహా నోర్బాని దన్నివందిజ్ పణుకుదాన్ తయార్ కితి గోలమ్కు మహె. డగ్రు తొంబయదాన్ నూటి ముపయ లీటర్ ఏరు అన్నె. నన్ని గోలమ్కు ఆరుబాన్ మహె.

7 యేసు, “అయా గోలమ్కాజ్ ఏరు నిహతు”, ఇజి పణికిని వరిజ్ వెప్టాన్. వారు నిండ్రు నిహ్టార్.

8 అయావలె వాండ్రు వరిజ్, “ముడుక్కి సవ్దెరి బాన్ ఒతు”, ఇజి వెప్టాన్. వారు అయా లెకెండ్ కితార్.

9 సవ్దెరి యెలు ద్రాక్ష కడు ఆతి ఏరు రుసి సుడెతాన్. అయా ద్రాక్షకల్లు ఎమేణిజ్ వాతాదో ఇజి ఆ ఏరు ముడుక్కి ఒతి పణికిని వరిజె తెలినా ద్గాని సవ్దెరిజ్ తెలివెదె. వాండ్రు పెండ్రె మురిసిజ్ కూక్టాన్.

10 కూక్టాండ్రె వన్నిజ్, “విజెరె కూలెజ నెగ్గి ద్రాక్షకల్లు ముందాలె సినార్. లావు ఉటి వెన్కా అడ్డెబెడ్డెదిక సినార్. గాని నీను ఏలుదాక నెగ్గి ద్రాక్షకల్లునె ఇడ్డి మన్ని”, ఇజి వెప్టాన్.

11 యాకాదె యేసు కితి మొదోహి బమ్మ ఆతి పణి. యాక గలీలయ ముటది కానా ఇన్ని పట్టుమదు జర్గితాద్. అయా లెకెండ్ కిజి, యేసు వాండ్రు గొప్పపెరికాన్ ఇజి తోరిస్తాన్. వన్ని సిసూర్ వన్ని మున్కు నమకం ఇట్టార్.

12 దిని వెన్కా వాండ్రు వన్ని అయిసి, తంబెర్సిర్, సిసూర్ వెట కపర్నహొముదు సొహాన్. అబ్బె సెగం దినమ్కు మహార్.

యేసు దేవుణుగుడిదాన్ బేరం కినివరిజ్ వెల్లి షొక్కినాన్

13 యూదురి పస్క వండొయి కిదెజ్ కాలం డగ్రు ఆతాద్. అందెజె యేసు యెరూసలెమ్దు సొహాన్.

14 బాన్ దేవుణుగుడిది అరుజుదు బేరం కిజిని వరిజ్ వాండ్రు సుండేతాన్. కోడ్డిజ్, గొర్రెజ్, పూజ కిని వందిజ్ పారపొటిజ్ పొర్ని వరిజ్ సుండేతాన్. పయు దేసెమ్ది డబ్బుజ్ మరిసి యూదురి కాసుజ్ సీజిని బేరం కిని వరిజ్బా సుండేతాన్.

15 అయావలె వాండ్రు నాసుదాన్ కొరడ కితాండ్రె, కొడ్డిజు, గొర్రెజు వెట వరిజ్ విజెరిజ్ అరుజుదాన్ పేర్తాన్. డబ్బుమరిసి బేరం కినివరి డబ్బు విజు సెద్రిస్తాండ్రె, వరిబల్లెజ్ మహ్తాన్.

16 పార పొటిజ్ పొర్ని వరివెట, “విన్కాజ్ ఇబ్బెణిజ్ ఒతు. నా బుబ్బు ఇల్లు సత్తలెకెండ్ కిమాట్”, ఇజి వెహ్తాన్.

17 నస్తవలె వన్నిసినూర్, “ఓ దేవుణు, నీ ఇల్లువందిజ్ నజీమన్ని గొప్ప అస, ఉండ్రీ సిసులెకెండ్ నా లొఇ కన్నాద్*”, ఇజి దేవుణు మాటదు రాస్తి మనిక వారు ఒండేబితార్.

18 అయావలె యూదురు, యా పణిజ్కిదెజ్ నిజీ ఇని అతికారం మనాద్? ఉండ్రీ బమ్మ అని పణికిజి మజీ తోరిసి అయాక రుజుప్ కిత’, ఇజి వన్నిజ్ వెహ్తాన్.

19 “యా గుడి: డెయిజి అర్పు. మూండ్రీ రోస్కాజ్ నాను మరి తొహ్న”, ఇజి యేసు వరిజ్ వెహ్తాన్.

20 దన్నిజ్ యూదురు, “యా గుడి: తొహ్తాజ్ నలవయ్ ఆరు పంటేజ్ ఆతాద్. నీను మూండ్రీ రోస్కాణిజ్ తొహ్నాదా?””, ఇహార్.

21 గాని దేవుణుగుడి: వందిజ్ వెహ్తావలె వన్ని ఒడోల్ వందిజె వెహ్తాన్.

22 వాండ్రు సాతాండ్రె మర్జి నిజీతివెనుక, యా లెకెండ్ మాట వాండ్రు వెహ్తాన్ ఇజి సిసూరు ఒండేబితార్. అందెజె దేవుణు మాట వారు నమ్మితార్. యేసు వెహ్తా మాటబా నమ్మితార్.

23 యేసు పస్కవండొయ్దిజ్ యెరూసలెమ్దు మహివలె, వాండ్రు కితి బమ్మ అతి పణిజ్ సుండేతారె, నండొండార్ వన్నిజ్ నమ్మితార్.

* 2:17 2:17 కీర్తన 69:9.

24 గాని వాండ్లు వరిజ్ వన్నిజె ఒపజెవ్ఎతాన్. ఎందనిజ్ ఇహిజు, వాండ్లు విజెరిజ్ నెస్సాన్.

25 ఎయెర్బా వన్నిజ్ లోకుర్ వందిజ్ వెవ్తాజ్ అవ్నరం సిల్లెద్. ఎందానిజ్ ఇహిజు, వరి మన్నుదు మన్ని ఆలోసనమ్కు వాండ్లు నెసినాన్.

3

యేసు నికొదిముజ్ నెన్పిస్సాన్

1 యుదురిజ్ అతికారి ఆతి నికొదెము ఇనికాన్ ఒరెన్ మహాన్. వాండ్లు పరిసయిరుజు లోఇ ఒరెన్.

2 వాండ్లు ఉండ్రి పొదొయ్, యేసుడగ్గు వాతాన్. వాతాండ్రి, “ఓ బోదకినికి, నీను దేవుణు పొక్తి ఒరెన్ నెన్పిస్సాన్ ఇజి మాపు నెసినావ్. దేవుణు ఒరెన్ వన్నివెట సిల్లెండ మహిజు, నీను కిజిని బమ్మూఆతి పణిజ్ కిదెజ్ ఎయెన్బా అట్ఎన్”, ఇజి వెవ్తాన్.

3 అందెజె యేసు వన్నివెట ఈహు వెవ్తాన్: “నాను నిజమ్నె వెప్పిన, ఒరెన్ మరి కొత్తాజ్ పుట్టిజనె, దేవుణు ఏలుబడిదు మంజినాన్”.

4 అయావలె నికొదెము, “పిరితిలోకు ఒరెన్ ఎలాగ మరి కొత్తాజ్ పుట్టాన్. వాండ్లు అయిసి పొటాద్ సొన్ని మరి ఉండ్రి సుట్టు పుట్టెజ్ అట్ఎన్”, ఇజి వెవ్తాన్.

5 యేసు వెవ్తాన్, “నాను నిజ్నె వెప్పిన, ఒరెన్ బాప్తిసం లాగె ఆఎండ మహిజు, దేవుణు ఆత్మ బాణిజ్ కొత్త బత్తు. దొహ్క్ఎండ మహిజు, వాండ్లు దేవుణు ఏలుబడిదు మన్ఎన్.

6 యాయ బుబ్బర్వెటనె కొడోర్ కాసినార్. గాని దేవుణు ఆత్మ వెటనె దేవుణు కొడోర్ ఆనార్.

7 “నీను మరి కొత్తాజ్ పుట్టెజ్వెలె”, ఇజి నాను వెవ్తా మాటదిజ్ నీను బమ్మూ ఆమా.

8 “గాలి దన్నిజ్ ఇస్టమాతి బాడిద్ డెయ్వాద్. నీను దన్నిజాటు వెని గాని అది ఎంబెణిజ్ వాజినాద్, ఎంబె సొన్నినాద్, ఇజి నిజ్ తెలిఎద్. అయలెకెండెనె, దేవుణు ఆత్మ ఒరెన్ వన్నిజ్ కొత్త బత్తు.

సిదెజ్ వన్నిజ్ ఇస్టమాతివజ విజు కినాన్. వాండ్రు అయాక ఎలాగ కినాన్ ఇజి తెలివ్ద”.

9 “యాక ఎలాగ జర్గినాద్?”, ఇజి నికోదెము యేసుజ్ వెన్బాతాన్.

10 దనిజ్ యేసు, “ఇస్రాయేలుదు మన్ని బోదిసిని వరిలోఇ తగమాతికి ఒరెన్నీను గదె? యాకెజ్ నీను నెన్ఇదా?

11 నాను నిజం వెస్సిన, మాపు నెస్తికెజె వెస్సినాప్, నుడఃతికెజె వెస్సినాప్. గాని మీరు అయాకెజ్ నమ్మిఇదెర్.

12 యా బూమిదు జర్గిని దన్నివందిజ్ నాను మిజి వెప్తూ మన్ను. గాని మీరు నమిఇ. అహిజ, నాను దేవుణు మంజిని బాడిఃదు మన్ని నజతిజ వందిజ్ వెప్తూజ, మరి మీరు ఎలాగ నమ్మినిదెర్?

13 ఎయెన్బా ఎసెజ్బా దేవుణు మంజిని బాడిఃదు సాన్ఎతార్. దేవుణు మంజిని బాడ్డిః దాన్ డిఃగితి వాతి లోకుమరిసి ఆతి నాను ఆవిండ మరి ఎయెన్బా దేవుణు మంజిని బాడిఃదు సాన్ఎతాన్.

14-15 బీడిమ్బూమిదు మోసె కంసుదాన్ తయార్ కితి సరాన్దిజ్ పెప్తూ లెకెండ, లోకు మరిసి ఆతి నాను పెరె ఆనాలె. నా మున్కు నమకం ఇడ్డి వరిజ్ విజెరిజ్ ఎలాకాలం బత్కిని బత్కు దొహ్క్కివందిజె నాను పెరె ఆదెజ్వెలె.

16 దేవుణు లోకుర్ విజెరిజ్ ఎసానో ప్రేమిస్తాన్. అందెజె వాండ్రు వన్ని ఒరెండ్రె ఒరెన్ మరిసిజ్ సాదెజ్ సితాన్. వన్నిజ్ నమినికార్ ఎలాకాలం సిసుదు మన్ఎండ, ఎలాకాలం దేవుణు వెట మంజిని వందిజ్ వాండ్రు మరిసిజ్ సితాన్.

17 దేవుణు లోకురిజ్ తీర్పు సీజి సిక్స సీని వందిజ్ ఆవద్, వాండ్రు వన్ని మరిసిజ్ లోకమ్దు పొక్కిక. గాని వాండ్రు వరిజ్ ఎల్లకాలం మన్ని సిక్సదాన్ గెల్పెస్సివందిజె పొక్తాన్.

18 మరిసిజ్ నమ్మిని ఎయెరిజ్బా తీర్పు సీజి సిక్స సీనిక సిల్లెద్. గాని వన్నిజ్ నమిఇ వరిజ్ ఏలునె దేవుణు తీర్పు సీజి సిక్స సిత మనాద్. ఎందనిజ్ ఇహిజ, దేవుణు ఒరెండ్రె మరిసిజ్ వారు నమ్మివితార్.

19 జాయ్ లోకమ్దు వాతమనాద్. గాని లోకుర్ జాయ్దిజ్ ప్రెమిన్ఎండ సీకట్దిజ్ ప్రేమిస్తార్. ఎందనిజ్ ఇహిజ, వారు సెఇ

పణిజ్ కిజినార్. యాక నుడఃజినె, లోకురిజ్ దేవుణు తీర్పు సీజి సిక్స సీనాన్.

20 సెఇ పణిజ్ కిజినికార్ విజెరె జాయ్దిజ్ ఇస్టం కిఎర్. వారు జాయ్దు రెవర్. ఎందనిజ్ ఇహిజ, వరి సెఇ పణిజ్ విజు జాయ్దు తోర్నె ఇజి తియెల్ ఆజినార్.

21 గాని నిజమాతి పణిజ్ కినికాన్ ఎయెన్బా జాయ్దు వ్రాజినాన్. ఎందనిజ్ ఇహిజ, వారు కిజిని పణిజ్ విజు దేవుణుదిజ్ లోజిజి కిజినార్ ఇజి జాయ్వెల్లి తోర్నాద్”, ఇజి వెహ్సాన్.

బాప్తినం సీని యోహాను యేసువందిజ్ సాసి వెహ్సినాన్.

22 వెనుక, యేసుని, వన్నిసిసూర్ యూదయప్రాతమ్దు సాహార్. బాన్ వాండ్రు వరివెట సగం కాలం గడప్పి, లోకురిజ్ బాప్తినం సీబిసి మహాన్.

23 సలిముడగ్రు అయినో ఇన్ని బాడిఃదు యోహాను బాప్తినం సీజి మహాన్. ఎందనిజ్ ఇహిజ, బాన్ నండో ఏరు మహె. లోకుర్ వన్ని డగ్రు సాన్ని బాప్తినం లాగెఆజి మహార్.

24 యాక యోహానుజ్ జెలిదు ఒఇ ముజాల జర్గితాద్.

25 యోహాను సిసూర్ని ఒరెన్ యూద వాండ్రు నుబ్రం అని యూదురు రూలు వందిజ్ వెహ్సా గొడఃబ ఆతార్.

26 వారు యోహానుడగ్రు వాతారె, “బోదకినికి, యొర్దాను గడ్డ అతాల్ని వెట ఒరెన్ మహాన్ గదె. నీను వన్ని వందిజ్ వెహ్సా మన్ని. ఇవిలోన్ వాండ్రు ఏలు బాప్తినం సీజినాన్. లోకుర్ విజెరె వన్నిడగ్రు సాన్సినార్”, ఇజి వెహ్సార్.

27 అందెజె యోహాను వెహ్సాన్, “దేవుణు ఇస్టం కితివజనె ఒరెన్ వన్నిబత్తుదు విజు జర్గిజినాద్.

28 “నాను క్రిస్తు ఆవి. గాని వన్నిజ్ ఇంక ముజాల దేవుణు నజి పోక్తాన్”, ఇజి నాను వెహ్సాక మీరు వెహ్సాదెర్.

29 పెండ్లి అని వన్నిది నె పెండ్లి బోదలి. పెండ్లి దజడః కూలయెన్ వన్నిడగ్రు మంజి వాండ్రు వెహ్సాకెజ్ వెంజినాన్. వెహ్సానికెజ్ వెంజనికాదె

కూలాయెన్ వన్ని సర్ద. పెండ్లి దజడః కూలాయెన్ పెండ్లి దజడఃవెట సర్ద ఆని లెకెండ్ నా సర్ద క్రీస్తువెట పూర్తి ఆజినాద్.

30 వాండ్రు పెరికాన్ ఆదెజ్వలె. నాను ఇజ్రికాన్ ఆదెజ్.

31 పరలోకమ్దాన్ వాజనికాన్ విజెరి ముస్కు పెరికాన్. యా లోకమ్దాన్ వాజనికాన్ యా లోకమ్దికానె. వాండ్రు లోకమ్ది సజతిజ వందిజ్ వెప్పినాన్. పరలోకమ్దాన్ వాజనికాన్ విజెరి ముస్కు పెరికాన్.

32 వాండ్రు సుడఃతి వనకవందిజ్ వెహి వన్కా వందిజ్ వెప్పినాన్. గాని సెగొండారె వాండ్రు వెప్పినికెజ్ డగ్గు కినార్.

33 వన్నిమాట వెంజనికాన్ దేవుణు వెప్పినికెజ్ నిజం ఇజి ముద్ర పొకె ఆజినాన్.

34 దేవుణు పొక్తాన్ దేవుణు మాటనె వర్గజినాన్. ఎందనిజ్ ఇహిజ, దేవుణు వన్ని ఆత్మ అంతు సిల్లెండ వన్నిజ్ సీజినాన్.

35 అప్పొసి మరిసిజ్ ప్రేమిస్నాన్. అందెజె వాండ్రు వన్నిజ్ విజుదనిజ్ అతికారం సిత్త మనాన్.

36 మరిసి ముస్కు నమకం ఇడ్డి మన్నివన్నిజ్ ఎలాకాలం దేవుణువెట బత్కిని బత్కు మనాద్. గాని వన్నిజ్ లోజ్ ఇ వన్నిజ్ ఎలాకాలం బత్కిని బత్కు సిల్లెద్. గాని దేవుణు సిక్స వన్ని ముస్కు ఎలాకాలం మనాద్.

4

యేసు సమరియ దేసెమ్ది బోదెలివెట వర్గజినాన్

1-2 యోహాను ఇంక యేసు నండొండారిజ్ వన్ని వెట కుడుఃప్పినాన్, వరిజ్ బాప్తీసం సీజినాన్ ఇజి పరిసయరు వెహార్. (నిజం ఇన్నిక ఇహిజ, యేసు ఎయెరిజ్బా బాప్తీసం సివీతాన్. వన్ని సిసూర్నె సితార్)

3 ఆహె పరిసయరు వర్గజినార్ ఇజి యేసునెస్తాండ్రె, వాండ్రు యూదయ ప్రాంతం డిస్తాండ్రె గలీలయ ముటదు మరి మహ్తా సొహాన్.

4 వాండ్రు సమరియ దేసెమ్దాజె సొండ్రెజ్ సరి మనాద్.

5 అందెజె వాండ్రు సమరియ దేసమ్దు మన్ని నుకారు ఇన్ని పట్టుమ్దు వాతాన్. అయా పట్టుం, పూర్బమ్దు బత్కిజి మహి యాకోబు వన్ని మరిసి యొసెపుజ్ సిత్తి మన్ని బూమిడగ్రు మన్నికాద్.

6 యాకోబు కారిస్తి నూతి బాన్ మహాద్. యేసు పయిణం కిజి వందితాండ్రె అయా నూతి డగ్రు బస్తాన్. నస్తివలె, మదెనం.

7 అయావలె సమరియాతి బోదెలి ఉండ్రీ ఏరు ఒతెజ్ బాన్ వాతాద్. యేసు దని వెట, “ఏహ్ కట్టినాద్. ఏరు బుకెండ సిదా”, ఇహాన్.

8 (వన్ని సిసూర్ టిండి కొండెజ్ పట్టుమ్దు సాహ మహార్)

9 అయా బోదెలి వన్నిజ్, “నీను యూద వాండ్రు. నాను సమరియ బోదెలి. అబాయా, నీను నజి ఏరు లొస్సిదా”, ఇహాద్. (ఎందనిజ్ ఇహిజ, యూదురు సమరియతి వరి వెట కూడెజి మన్వర్)

10 అందెజె యేసు, “నీను దేవుణు సీనిక నెస్సి మంజినిక ఇహిజ, నిజి ఏరు లొస్సికాన్ ఎయెన్ ఇజి నెస్సిమంజినికిహిజ, నీను వన్నిజ్ దేవుణు సీనిక వెన్బాతి మరి. వాండ్రు నిజి ఎలాకాలం బత్కిన్పిస్సి ఏరు సితాన్ మరి”, ఇజి వెహ్హాన్.

11 అయా బోదెలి వన్నిజ్, “బాబు నూతి నిరిక మనాద్. ఏరు లాగ్దెజ్ నిజి డొక్కు ఇన్నిక సిల్లెద్. మరి ఎలాగ నీను బత్కిన్పిస్సి ఏరు లాగ్గి?

12 మా అనిగొగొ యాకోబు యా నూతి మజి సితాన్. వాండ్రు, వన్ని మరిసిర్, వన్ని కోడ్డిజ్, గొరెజ్ విజు యా నూతిది ఏరు ఉణిజి మహార్. నీను వన్నిజ్ మిస్తికిదా?”, ఇజి వెహ్హాద్.

13-14 అందెజె యేసు, “యా ఏరు ఉణి విజెరిజ్బా మరి ఏహ్కా కట్టాద్. గాని నాను సీని ఏరు ఉణివరిజ్ఎసెజ్బా ఏహ్ కట్వెద్. నాను సీని ఏరు బూమిదాన్ సోసిని ఉట ఏరు లెకెండ వన్ని లొఇ మంజినె. అయాక వన్నిజ్ ఎలాకాలం దేవుణు వెట బత్కిని బత్కు సీజినాద్”, ఇజి వెహ్హాన్.

15 నస్తివలె అది, “బాబు యా ఏరు నజి సిదా. అయావలె ఎసెజ్బా ఏహ్ కట్వెద్. ఇబ్బె వాజి ఏరు లాగ్గి ఒతెజ్ నజి అవ్సరం సిల్లెద్”, ఇజి

వెప్తోద్.

16 యేసు దనిళ్, “సొన్ని నీ మాసిళ్ ఇబ్బె కూక్కి తగ్గిత”, ఇజి వెప్తోన్.

17 దన్నిళ్ అది, “నజి మాసి సిలెన్”, ఇహోద్. అందెజె యేసు, “నజి మాసి సిలెన్ ఇజి నీను వెప్తోమాట నిజమ్నె.

18 నిజి అయ్దుగురు మాసిర్ మహార్. ఏలు నీ వెట మంజినికాన్ నీ మాసి ఆవిన్. నీను నిజమ్నె వెప్తో”, ఇహోన్.

19 అయావలె అది వెప్తోద్, “బాబు నీను ఒరెన్ ప్రవక్త ఇజి నాను నెస్సా.

20 మా నమరియది అనిగొగొర్ యా గొరొత్నె దేవుణుదిళ్ పొగిడిజి మాడిస్తార్. గాని యూదురు ఆతి మీరు, దేవుణుదిళ్ పొగిడిజి మాడిస్తెళ్ మన్ని బాడ్డి యెరూసలెం ఇజి వెప్సొనిదెర్”.

21 అందెజె యేసు, “బీబి, యెరుసలెమ్దుబా, యా గొరొత్బా బుబ్బు ఆతి దేవుణుదిళ్ మీరు పొగిడిజి మాడిస్ ఇ ఉండ్రీ కాలం వాజినాద్. నీను నా మాట నమ్మిత.

22 ఎలాగ మర్తి వన్నిళ్ పొగిడిజి మాడిసిన్దెర్ ఇజి మిజి తెలివద్. గాని యూదురు ఆతి మజి తెలినాద్, ఎలాగ మర్తి వన్నిళ్ మాపు పొగిడిజి మాడిస్తాప్ ఇజి. ఎందానిళ్ ఇహిజు, యూదురు బాణిజె, లోకురిళ్ రక్కిస్సికాన్ వాజినాన్.

23 దేవుణు ఆత్మసత్తుదాన్ లోకుర్ బుబ్బెళ్, వరి మన్ను పూర్తి నిజం పొగిడిజి మాడిసిని ఉండ్రీ కాలం వాజినాద్. అయాక ఏలునె మనాద్. ఆహె పొగిడిజి మాడిసిని వరిజె దేవుణుదిళ్ ఇస్టం.

24 దేవుణు, ఆత్మనె. అందెజె వన్నిళ్ పొగిడిజి మాడిస్సికార్ వన్ని ఆత్మ సత్తుదాన్, నిజం ఇక వన్నిళ్ పొగిడిజి మాడిస్తెజెవెలె”, ఇజి వెప్తోన్.

25 అయా బోదెల్ వన్నిళ్, “క్రీస్తు ఇజి కూకె ఆని మిసియ వానాన్ ఇజి నాను నెస్సు. వాండ్రు వానివలె మజి విజు వన్నా వందిళ్ టెటాళ్ వెప్సొన్”, ఇజి వెప్తోద్.

26 అయావలె యేసు, “నీవెట వర్గిజిని నాను వాండ్రె”, ఇజి వెప్తోన్.

27 అయావలెనె వన్ని సిసూర్ మర్జి వాతార్. వాండ్రు అయా బోదెల్ వెట వర్గిజినిక సుడేతారె నండో బమ్మ ఆతార్. గాని నిజి ఇన్నిక కావాలి ఇజి బా, నీను ఎందనిజ్ దన్నివెట వర్గిజిని ఇజిబా ఎయెర్బా వెన్బావ్తార్.

28-29 అయా బోదెల్ దని కుండ డిస్తాదె పట్టుం సాహద్. సాహాదె, బాన్ మహి లోకురిజ్, “నాను కితి విజు వన్కా వందిజ్ నజి వెప్తి ఒరెన్ వన్నిజ్ మీరు వాజి సుడేదు. వీండ్రు క్రిస్తు ఆవిండ్రా?”, ఇజి వెప్తాద్.

30 వారు పట్టుమ్దాన్ సోతారె వన్నిడగ్గు వాజి మహార్.

31-32 అయావలె వన్ని సిసూరు, “మెస్టరు ఇనికబా ఉణామె”, ఇజి వన్నిజ్ బతిమాలితార్. ‘మిజి తెలిఇ బోజనం నజి ఉండెజ్ మనాద్’, ఇజి వాండ్రు వరిజ్ వెప్తాన్.

33 “వన్నిజ్ బోజనం ఎయెన్బా తతాండ్రా?”, ఇజి ఒరెన్దిజ్ ఒరెన్ సిసూర్ వర్గితార్.

34 యేసు వరిజ్, “నజి పోక్తాన్ నజి వెప్తి పణి పూర్తి కినికాదె నా బోజనం లెకెండ్ మనాద్.

35 ‘నాల్లి నెల్లెజ్ మనాద్ పంట కొయ్ని కాలం’, ఇజి మీరు వెప్పిదెర్గదె. నాను మిజి వెప్పిన, మీ కణుకు పెర్జి మడిజు సుడేదు. ఆకెజ్ సోపాతెనె పండితె మన్నె.

36 నా మాటెజ్ వెండ్రెజ్ తయార్ ఆతి మన్ని యా లోకురిజ్ సుడేఅ. కొయిదెజ్ సోపాతి మన్ని మడిజు లెకెండ్ మనార్. వరిజ్ ఎలాకాలం దేవుణు వెట బత్కిని బత్కు దోహ్కాద్ ఇజి నా డగ్గు తని వన్నిజ్ లాబం మనాద్. విత్తికాన్ని కొయినికాన్ రిఎర్ కూడేజి సర్ద ఆని లెకెండ్ వీండ్రు ని విని ముజాల లోకురిజ్ సువార్త వెప్తికార్ రిఎర్ కూడేజి సర్ద ఆనార్.

37 ‘విత్తికాన్ ఒరెన్. కొయినికాన్ మరి ఒరెన్’, ఇజి వెప్పిక నిజమ్నె.

38 మహికార్ కస్టబడిజి పణి కితార్. మీరు కిఇతిదెర్. వారు కస్టపడిజి కితి పణిది లాబం లాగ్దెజ్ నాను మిజి పోక్కిన.

నండో సమరియదికార్ యేసుజ్ నమిజినార్.

39 “నాను కితి విజు వన్నా వందిజ్ వాండ్రు నజి వెహ్లాన్”, ఇజి అయా బోదెలి మాట వెహరె, అయా పట్నమ్ది నండొ సమరియదికార్ యేసుజ్ నమ్మితార్.

40 అందెజె సమరియదికార్ వన్ని డగ్రు వాతారె, “మా డగ్రు మన్అ ఇజి వన్నిజ్ బతిమాలితార్. అందెజె వాండ్రు అబె రుండి రొస్కు మహాన్.

41 వన్ని మాట వెహరె, మరి నండొండార్ వన్నిజ్ నమ్మితార్.

42 వారు అయా బోదెల్దిజ్, “నీను వెహ్లా దనిదాన్ ఆఎద్ మాపు యేలు నమిజినిక. గాని విని మాటెజ్ మాపు వెహవ్. నిజమె, వీండ్రె లోకురిజ్ పాపమ్కాజ్ రక్సిస్సికాన్ ఇజి మాపు నెసినావ్. అందెజె మాపు వినిజ్ నమ్మిజినావ్”, ఇహోర్.

యేసు అతికారి మరిసిజ్ నెగెణ్ కిజినాన్

43 రుండి రొస్కు బాన్ మహి వెన్నా, యేసు సమరియదాన్ గలీలయ ప్రాంతమ్దు సొహాన్.

44 (యేసునె వెహ్లా మహాన్, “ఒరెన్ ప్రవక్తెజ్ వన్నిసొంత ప్రాంతమ్దు ఎయెర్బా గవ్రం సిఎర్”, ఇజి)

45 వాండ్రు గలీలయదు వాతివలె, గలీలియదికార్ వన్నిజ్ డగ్రు కితార్. ఎందనిజ్ఇహిజ, వారుబా పస్కు పండొయిదిజ్ యెరూసలెమ్దు సొహ మహరె, వాండ్రు అబ్బె కితి విజు పణిజ్ సుడొత మహోర్.

46 వాండ్రు గలీలియది కానా ఇన్ని పట్నమ్దు మరి వాతాన్. బానె వాండ్రు ఏరుదిజ్ ద్రాక్కు కడు కితాన్. అబ్బె ఒరెన్ గవర్మెంటు అతికారి మహాన్. వన్ని మరిసి కపర్నహొముదు కస్టం అర్త మహాన్.

47 యేసు యుదయదాన్ గలీలయదు వాతాన్ ఇజి వెహివెలె వాండ్రు యేసు డగ్రు వాతాన్. వాతండ్రె, “నా మరిన్ సాదెజ్ డగ్రు ఆత మనాన్. అందెజె నీను వాజి వన్నిజ్ నెగెణ్ కిఆ”, ఇజి వన్నిజ్ బతిమాలితాన్.

48 యేసువన్నిజ్, “నండొ బమ్మాని గుర్తుజ్ సుడొతిజనె మీరు నమినిదెర్”, ఇజి వెహ్లాన్.

49 అయా అతికారి, “బాబు, నా మరిన్ సాని ముజాల రఅ”, ఇజి వెప్టోన్.

50 దన్నిజ్ యేసు వన్నిజ్, “సాన్అ. నీ మరిన్ బత్కినాన్”, ఇజి వెప్టోన్. వాండ్రు యేసు వెప్టోమాట నమితాండ్రె సాహాన్.

51 వాండ్రు సాన్ని మహివలె వన్ని ఇండ్రోణి పణి మణిసీర్ వన్ని ఎద్రు వాతారె, “నీ మరిన్ బత్కిత మనాన్”, ఇహార్.

52 ఎసాడు గంటజ్ వన్నిమరిసి నెగెణ్ ఆతాన్ ఇజి వరిజ్ వెన్బాతిజ్ వారు, “ఇవన్ ఒంటి గంటదిజ్ నోబు డిస్తాద్”, ఇజి వెప్టోర్.

53 నీ మరిన్ బత్కినాన్ ఇజి యేసు వెప్టో ఆ టయిమ్దునె, వన్నిమరిన్ నెగెణ్ ఆతాన్ ఇజి బుబ్బు నెస్తాన్. అందెజె వాండ్రు వన్ని కుటుమ్దికార్ యేసుజ్ నమ్మితార్.

54 యాకదె యేసు యుదయదాన్ గలీలయదు వాతి వెనుక కిత్తి మరి ఉండ్రీ బమ్మాతి పణి.

5

1 వెన్కా యూదుర్జ పండోయ్ ఉండ్రీ వాతాద్. అందెజె యేసు యెరూసలెమ్దు సాహాన్.

2 యెరూసలెం సుటులం తోహ్కొక్కి కోటదు గొరెజ్ సాని గోర్జె ఉండ్రీ మనాద్. దన్నిడగ్రు ఉండ్రీ సెరు మనాద్. దన్ని పేరు ఎబ్రి బాసదు బెదెస్త ఇజి. దన్నిజ్ అయ్దు అరుజుజ్ సురులం మన్నె.

3-4 అయా అరుజుజు మందెజ్ మందెజ్ కస్టమ్కాణికార్ గూర్త మహార్. గుడ్డిదికార్, సాటాదికార్, కిక్కుకాల్కు అర్తికార్ బాన్ మహార్. ఎస్తివలెన్ ఉండ్రీ సుటు దేవుణు దూత ఒరెన్ అయా సెర్దుదు డిగ్జె ఏరుదిజ్ కద్దిసినాన్. అయావలె ఎయెన్ ముజాల ఏరుదు డిగ్నాండ్రె, వాండ్రు ఎలాగ మర్తి జబ్బు ఆతికాన్ ఆతిజ్బా నెగెణ్ ఆనాన్. యా కస్టమ్కాణికార్ ఏరు కద్దిని దన్నిజ్ ఎద్రుసుడేజి మహార్.

5 వరి లొఇ ఒరెన్ మహాన్. వాండ్రు ముప్పుయెనిమిది పంటెజాణిజ్ కస్టమ్దాన్ మహాన్.

6 యేసు వన్నిజ్ సుడఃతాన్. వాండ్రు నండో పంటెజాణిజ్ క్లమ్దాన్ మనాన్ ఇజి నెస్తాండ్రె, వన్నిజ్, “నీను నెగెణ్ ఆదెజ్ కోరిజినిదా?”, ఇజి వెన్బాతాన్.

7 వెన్బాతిజ్ అయా క్లమ్దికాన్, “బాబు, ఏరు కడ్లిసినివలె నజి సెరుదు డిఃపైజ్, ఎయెన్బా నజి సిల్లెన్. నాను డిఃగ్గన ఇనిజ్, నజి ఇంక ముజాలా మరి ఒరెన్ డిఃగ్గజినాన్”, ఇజి వెహ్తాన్.

8 యేసు వన్నిజ్, “నీను నిజ్జి నీ సాప అసి నడిఃఅ”, ఇజి వెహ్తాన్.

9 వెటనె వాండ్రు నెగెణ్ ఆతండ్రె వన్ని సాప నిక్తాండ్రె నడిఃతాన్. యాక విస్తాంతి దినమ్దు జర్రితాద్.

10 అందెజె యూదురు నెగెణ్ఆతి వన్నిజ్, “నేండ్రు విస్తాంతి దినం గదె. నీను సాపెజ్ నిక్కి ఒతెజ్ ఆవద్. ఎందనిజ్ ఇహిజ, మోసె సితి రూలుజ్దు వెస్సినాద్, ఇన్ని పణిబా విస్తాంతి దినమ్దు కిదెజ్ ఆవద్ ఇజి”, ఇజి వెహ్తాన్.

11 దన్నిజ్ వాండ్రు, “నజి నెగెణ్ కితికాన్, ‘నీ సాప నిక్కి నిడిఃఅ’, ఇజి నజి వెహ్తాన్”, ఇహాన్.

12 అందెజె వారు, “నీ సాపెజ్ నిక్కి నడిఃఅ ఇజి నిజి వెహ్తాకాన్ ఎయెన్?”, ఇజి వెన్బాతాన్.

13 నెగెణ్ కిత్తికాన్ ఎయెన్ ఇజి వన్నిజ్ తెలివతాద్. ఎందనిజ్ ఇహిజ, అబ్బె మందలోకుర్ కూడిఃత మహార్. యేసు వరి లోఇహాన్ తప్రె ఆతండ్రె సాహాన్.

14 వెనుక యేసు వన్నిజ్ దేవుణు గుడిఃదు సుడఃతాన్. సుడఃతండ్రె వన్నిజ్, “సుడఃఅ, నీను ఏలు నెగెణ్ ఆతి. ఏలుదాన్ పాపమ్కు కిమ. సిలిజ నిజి మరి బాదెజ్ లావు వానె”, ఇహాన్.

15 వాండ్రు సాహాండ్రె వన్నిజ్ నెగెణ్ కితికాన్ యేసు ఇజి యూదురిజ్ వెహ్తాన్.

16 అందెజె యా పణిజ్ యేసు విస్తాంతిదినమ్దు కితిజ్ యూదురు వన్నిజ్ నండో మాలెజ్ కిత్తార్.

17 గాని యేసు వరిజ్, “నా బుబ్బు ఎస్తివలెబా నెగ్గి పణిజ్ మహి వరి వందిజ్ కిజినె మంజినాన్. నానుబా కిజిన”, ఇజి వెహ్తాన్.

18 యా లెకెండే యేసు వెహ్నిజ్, యూదురు వన్నిజ్ సప్తెజ్ మరి నండో సుడేతార్. ఎందానిజ్ ఇహిజు, వాండ్రు విస్త్రాంతిదిన్మది రూలుజ్ తప్తికాదె ఆఎండ, దేవుణు వన్ని సొంత బుబ్బ ఇజిబా వెహ్నినాన్. అయాలెకెండే, వాండ్రు దేవుణు వెట సమానం ఆతికాన్ ఇజి వెహె ఆజినాన్. అందెజె యేసుజ్ సప్తెజ్ మరి నండో సుడేతార్.

19 యేసు వరిజ్ ఈహు మర్జి వెహ్తాన్. “నాను మిజి నిజం వెహ్నిన, మరిసి ఆతి నాను ఇనికబా నా సొంత సత్తుదాన్ కిదెజ్ అట్ఎన్. నా బుబ్బ ఇన్ని ఇనికెజ్ కిజినిక సుడేజినానో, అయాకెజ్ నాను బా కిజిన. బుబ్బ కిజినికెజ్ మరిసి బా కిజినాన్.

20 ఎందానిజ్ ఇహిజు, అపొసి మరిసిజ్ ప్రేమిస్నాన్. వాండ్రు కిజినికెజ్ విజు మరిసిజ్ తోరిస్నాన్. వాండ్రు వన్నిజ్ దినిజ్ మిస్తి మరి నండో పెరి పణిజ్ తోరిస్నాన్. అయాకెజ్ సుడేజి మీరు విజెరె నండో బమ్మ ఆనిదెర్.

21 అప్పొసి ఎలాగ సాతివరిజ్ నిక్కి, వరిజ్ బత్కిసినాండ్రో అయ లెకెండే, మరిసిబా బత్కిసినాన్. వన్నిజ్ ఇన్ఱం మన్ని వరిజ్ బత్కిస్నాన్.

22-23 అప్పొసి ఎయెరిజ్బా, వారు తీర్పు కిఎన్. గాని విజెరిజ్ తీర్పు కిదెజ్ మరిసిజ్ అతికారం విజు ఒపజెప్త మనాన్. అపొసిజ్ గవ్ఠరం సినిలెకెండే విజెరె మరిసిజ్ గవ్ఠరం సిదెజ్నె యా అతికారం ఒపజెప్త మనాన్. మరిసిజ్ గవ్ఠరం సిఇకాన్ ఎయెన్బా, వన్నిజ్ పొక్తి అపొసిజ్ గవ్ఠరం సిఎన్.

24 నాను మిజి నిజం వెహ్నిన, నా మాట వెంజి, నజి పొక్తి వన్నిజ్ నమ్మిజినివన్నిజ్ ఎలాకాలం దేవుణు వెట బత్కిని బత్కు మనాద్. వన్నిజ్ నాను తీర్పుసివ. వన్నిజ్ ఎలాకాలం మన్ని సిక్కి సిల్లెద్. గాని వాండ్రు ఎలాకాలం దేవుణు వెట బత్కినాన్.

25 సాతి లెకెండే మనికార్ దేవుణు మరిసి ఆతి నాను వెహ్ని మాటెజ్ వెని కాలం వాజినాద్. అయాక ఏలునె వాత మనాద్. నా మాటెజ్ వెంజి, అయ లెకెండే కినికార్ బత్కినార్, ఇజి నాను మిజి నిజమ్నె వెహ్నిన.

26 ఎందానిజ్ ఇహిజ, నా బుబ్బు బాణిజె బత్తు వానాద్. వాండ్రు విజెరె బత్తిసిని లెకెండ్, నాను లోకురిజ్ బత్తిస్తెజ్ నజి అతికారం సిత మనాన్.

27 మరి లోకురిజ్ తీర్పు సీదెజ్ వాండ్రు నజి అతికారం సిత మనాన్. ఎందనిజ్ ఇహిజ, నాను లోకు మరిసి.

28 దిన్నివందిజ్ బమ్మ ఆమాట్. ఎందానిజ్ ఇహిజ, దూకిదు మనికార్ విజెరె నా మాటెజ్ వెని కాలం ఉండ్రీ వాజినాద్.

29 వారు దూకిదాన్ వెల్లి వానార్. నెగ్గి పణిజ్ కితికార్ నిజ్జి మరి ఎల్లకాలం దేవుణు వెట బత్తినార్. సెఇ పణిజ్ కితికార్ నిజ్జి సిక్కు పొందినార్.

30 నా సొంత సత్తుదాన్ ఇనికబా కిదెజ్ నాను అట్వ. దేవుణు వెప్తి వజనె నాను తీర్పు సీజిన. అందెజె నాను తీర్పు సీజి సిక్కు సీనిక నాయం ఆత్తిక. ఎందానిజ్ ఇహిజ, నాను నజి ఇన్ఱం ఆతి వజి కిఎ, నజి పొక్తి వన్నిజ్ ఇన్ఱం ఆతివజనె కిజిన.

31 నా వందిజ్ నానె వెప్తిజ, నాను వెప్పిని వన్కాజ్ పేరు సిల్లెద్.

32 గాని నా వందిజ్ మరి ఒరెన్ సాక్కి వెప్పినాన్. వాండ్రు నా బుబ్బు. వాండ్రు నా వందిజ్ వెప్పిని సాక్కి నిజం ఇజి నాను నెసిన.

33 మీరు యోహాను డగ్రు సెగొండారిజ్ పొక్తిదెర్. వాండ్రు నా వందిజ్ నిజమాతి సాక్కి వెప్తోన్

34 లోకుర్ నా వందిజ్ వెప్పిని సాక్కి నజి అవుసరం సిల్లెద్. గాని మీరు యోహాను వెప్తి మాటెజ్ నమిజి దేవుణు మిజి రక్కిస్తెజ్, నాను వాండ్రు వెప్తి దని వందిజ్ వెప్పిన.

35 ఉండ్రీ దీవ కసి జాయ్ సీజినిలెకెండ్ యోహాను నిజమాతికెజ్ నెన్పిస్తాన్. సెగం కాలం వన్ని మాటెజ్ వెంజి మీరు సరద ఆతిదెర్.

36 నాను కిజిని పణిజ్ యోహాను వెప్తి సాక్కి ఇంక గొప్పు పెరి సాక్కినె. ఎందనిజ్ ఇహిజ, నాను పూర్తి కిదెజ్ బుబ్బు నజి ఒపజెప్తికెజె నాను కిజిని పణిజ్. అయా పణిజ్ బుబ్బు నజి పొక్త మనాన్ ఇజి రుజుప్ కిజినె.

37-38 మరి, నజీ పోక్తి బుబ్బునె నా వందిజ్ నిజమాతికెజ్ వెహ్సినాన్. మీరు వన్నిజ్ ఎసెజ్ బా వెన్ ఇతిదెర్. వన్ని రూపు ఎసెజ్ బా తో ఇతిదెర్. వన్ని మాటెజ్ మీ మన్నుదు ఇడె ఇతిదెర్. ఎందనిజ్ ఇహిజ, వాండ్రు పోక్తి నజీ మీరు నమి ఇదెర్.

39-40 మీరు దేవుణు మాట బాగ సద్ విజినిదెర్. ఎందనిజ్ ఇహిజ, అయాక మిజీ ఎలాకాలం దేవుణు వెట బత్కిని బత్కు సీనాద్ ఇజి ఒడెబిజినిదెర్. అయా మాటెజ్ నా వందిజె వెహ్సినె. గాని దేవుణు వెట ఎలాకాలం బత్కిని బత్కు వందిజ్ నా డగ్రు రె ఇదెర్.

41 లోకుర్ పోగ్డిజినికెజ్ నాను కోరివ్.

42 గాని మీరు ఎలాగ మర్తికిదెర్ ఇజి నాను నెన్ను. మీరు దేవుణుదిజ్ నిజం ప్రేమిన్ ఇకిదెర్ ఇజి నాను నెన్ను.

43 నా బుబ్బు సిత్తి అతికారమ్ దాన్ నాను వాత మన్ను. గాని మీరు నజీ డగ్రు కి ఇదెర్. మరి ఒరెన్, వన్ని సొంత అతికారమ్ దాన్ వాతిజ, మీరు వన్నిజ్ డగ్రు కినిదెర్.

44 లోకుర్ పోగ్డిజెడెజ్ ఇజి మీరు కోరిజినిదెర్. ఒరెండ్రె దేవుణు అతికాన్ మిజీ పోగ్డిజెడెజ్ మీరు కోర్ ఇదెర్. మరి మీరు ఎలాగ నజీ నమ్మినిదెర్?

45 నాను బుబ్బు డగ్రు నేరం మోప్పాన్ ఇజి మీరు ఒడెబిమాట్. మీరు ఆస దాన్ ఎద్రు సుడెతి మోసెనె మీ మున్ను నేరం మోప్పాన్.

46 మీరు మోసెజ్ నమ్మినికిదెర్, నజీబా నమ్మితార్ మరి. ఎందనిజ్ ఇహిజ, మోసె నా వందిజ్ రాస్త మనాన్.

47 మీరు వాండ్రు రాస్తి మనికెజ్ నమ్మి ఇదెర్. మరి ఎలాగ నాను వెహ్సినిక నమ్మినిదెర్?”.

6

యేసు అయ్దు వేయు మొగ్గకొడెరిజ్ బోజనం సీజినాన్

1 దన్నివెనుక యేసు గలీలయ సమ్దరం డాట్టి అతాహ ఒడ్డుద్ సాహాన్. తిబెరియ సమ్దరం ఇజిబా ఇనార్.

2 కస్తమ్దాన్ మహి వరిజ్ వాండ్రు నెగెణ్ కితి బమ్మ ఆతి పణిజ లోకుర్ సుడఃతార్. అందెజె మంద లోకుర్ వన్ని వెట వాతార్.

3 యేసు అబెణి గొరొణ్ సెల్కాదు ఎక్తాండ్రె వన్ని సిసూర్ వెట బస్త మహాన్.

4 నస్తీవలె యూదురు కిని పస్కు ఇని పండోయ్ డగ్రు ఆత మహాన్.

5 యేసు కణక పెప్తి బేస్తిజ్, మంద లోకుర్ వన్ని డగ్రు వాజినిక సుడఃతాన్. “వీరు ఉండెజ్ బోజనం ఎలాగ కొండెజ్ ఆనాప్?”, ఇజి పిలిపుజ్ వెన్బాతాన్.

6 ఇనిక కిడెజ్ ఇజి యేసు నెస్నాన్ గాని పిలిపుజ్ వన్నిముస్కు నమకం మనాదా ఇజి సుడఃదెజె వాండ్రు అయా లెకెండె వెన్బాతాన్.

7 అందెజె పిలిపు, “వరి లొఇ ఒరెన్ ఒరెన్ కండెక్ కండెక్ ఉండెజ్బా రుండి వందెజ్ వెండి రుపాయుజాణి బోజనం కొటిజ్బా సాల్ఎద్”, ఇజి వన్నిజ్ వెప్తాన్.

8 అయావలె వన్ని సిసూర్ లొఇ ఒరెన్ ఆతి ఆంద్రెయ ఇనికాన్ యేసుజ్ వెప్తాన్. వీండ్రు సిమోన్ పేతురుజ్ తంబెర్ని.

9 వాండ్రు ఇన్నిక వెప్తాన్ ఇహిజ, ‘ఇబ్బె ఒరెన్ ఇజ్జి కొడెః మనాన్. వన్నిబాన్ అయ్దు యావలె రొట్టెజ్, రుండి మొయెజ్ మనె. గాని నిసా మందదిజ్ యాకెజ్ సాల్ఉ”, ఇజి వెప్తాన్.

10 అయావలె యేసు, “యా లోకాజ్ బసె కిదు”, ఇజి వెప్తాన్. అయా బాడిడు నండె గడ్డి మనాద్. అందెజె మొగ్గకొడెః బస్తార్. వారె డగ్రు అయ్దు వెయుజ్ మహాన్.

11 యేసు అయా రొట్టెజ్ అస్తాండ్రె, దేవుణుదిజ్ వందనమ్కు వెప్తాండ్రె, బస్తి వరిజ్ సీబాజి సితాన్. అయాలెకెండె మొయెజ్బా. వరిజ్ కావాలస్తి నసా సీబాత సితాన్.

12 వారు పొటపంజు తిహి వెనుక, “ఇన్నిక పాడు ఆవండ, మిగిలితికెజ్ కొటు కిదు”, ఇజి సిసూర్జ వెప్తాన్.

13 అందెజె మిగిలితికెజ్ సిసూర్ కెప్తార్. లోకుర్ తిహి వెన్కా మన్ని అయ్దు యావలె రొట్టెజాణి ముకెజ్ కొటు కితారె, పన్నెండు గప్పెజ్ నిప్తార్.

14 యేసు కిత్తి యా బమ్మాతి పణి నుడఃతారె, “నిజమె, లోకమ్దు వాని ప్రవక్త వీండ్రె”, ఇజి వెహ్తార్.

15 యా లోకుర్ వాజి, కెక కెక నజీ రాజు కినార్ ఇజి యేసు నెస్తాన్. అందెజె వాండ్రు బాణిజ్ డిస్తాండ్రె ఒరెండ్రె మరి గొరొత్ సాహాన్.

యేసు సమ్దరం ముస్కు నడిజినాన్

16-17 పొద్దు ఆతివెలె, వన్నిసిసూర్ డిఃగితారె, సమ్దరం ఒడ్డుదు వాతార్. అబ్బె వారు ఉండ్రె డోణిదు ఎక్తారె, సమ్దరం డాట్టి, కపర్నహోముదు సొండ్రెజ్ ఇజి సోతార్. అయావలె సీకాట్ ఆతాద్. యేసు వరి డగ్రు ఇంక రెండ మహాన్.

18 నస్తవలె పెరి గాలి ఉండ్రె వాతాద్. సందారమ్దు లావు ఉల్కెజ్ నిజితె.

19 వారు రమారమి మూండ్రె నాల్లి మయలు నడిపిస్తార్. అయావలె యేసు సందారం ఏరు ముస్కు నడిజి డోణి డగ్రు వాజినిక నుడఃతారె. అయాక నుడఃతారె, వారు నండో తియెల్ ఆతార్.

20 గాని వాండ్రు, “నానె, తియెల్ ఆమాట్”, ఇజి వరిజ్ వెహ్తాన్.

21 అందెజె వారు వన్నిజ్ డోణిదు ఎక్సిస్తెజ్ ఇస్టం ఆతార్ గాని వెటనె వారు సొండ్రెజ్ సరి సోతి మన్ని గటుదు అందితార్.

22 సిసూరు డోణి ఎక్సి సొని ముజాల నిహి మహి సమ్దరం ఒడ్డుదు మంద లోకుర్ మహాన్. మహ్సా నాండిజ్ వారు నెస్తార్, అబ్బె ఉండ్రె డోణినె మహాద్. యేసు వన్ని సిసూర్ వెట అయా డోణి ఎక్సి సొన్ఎతాన్. సిసూరెనె ఎక్త సాహార్ ఇజి.

23 నస్తవలె, తిబెరియదాన్ మరి డోణిజ్ వాతె. యేసు రొట్టెజి వందిజ్ దేవుణుదిజ్ వందనమ్కు వెహ్తాన్. వెహ్తా వెన్కా లోకుర్ అయాక తిహార్. వారు రొటెజ్ తిహి బాడ్డిః డగ్రు అయా డోణిజ్ వాతె.

24 యేసుని వన్ని సిసూర్ బాన్ సిల్లెర్ ఇజి మంద నెస్తార్. ఆహె నెస్తవెలె, వారు డోణిజ్ ఎక్తారె, వన్నిజ్ రెబాజి కపర్నహోముదు సాహార్.

25 వారు యేసుజ్ అతాహ ఒడ్డుదు నుడఃతారె, “బోదకినికిదా, నీను ఎన్కాండె ఇబ్బె వాతి?”, ఇజి వన్నిజ్ వెన్బాతార్.

26 దన్నిజ్ యేసు వెహ్తాన్, “నాను మీ వెట నిజం వెహ్సిన, మీరు పొట పంజు రొటెజ్ తిహిదెర్. అందెజె మీరు నజి రెబానిదెర్. గాని నాను కితి బమ్మ అతి పణి అర్థం నెస్సి వందిజ్ ఆఎద్ రెబాజినిక.

27 పాడాజి సొని టిండి వందిజ్ కస్టబడఃమాట్. గాని ఎలాకాలం దేవుణు వెట బత్కిని బత్కు సీని నిజమాతి టిండి వందిజ్ కస్టబడఃదు. లోకు మరసి అయా టిండి మిజి సీనాన్. ఎందనిజ్ ఇహిజ అయా టిండి సీదెజ్ వన్నిజ్ బుబ్బ అతి దేవుణు అతికారం సిత మనాన్.

28 వారు వన్నిజ్, “మాపు దేవుణు పణికిదెజ్ ఇహిజ, ఇన్నిక కిదెజ్ వెలె?”, ఇజి వెన్బాతార్.

29 యేసు వరిజ్, “దేవుణు పోక్తి వన్నిముస్కు నమకం ఇడఃజి మంజినికాదె దేవుణు సేవ పణి”, ఇజి వెహ్తాన్.

30 అందెజె వారు, “అహిజ, నీను ఇని బమ్మాని పణికినిలె? అయాక సుడఃజి నీ ముస్కు నమకం ఇడదెజ్ నీను ఇనిక కినిలె?

31 మోసె వెట మహి మా అనిగొగొర్ బీడిమ్బూమిద్ మన్న ఇని బోజనం ఉటార్. దేవుణు మాటదు రాస్త మనాద్, ‘వారు ఉండెజ్ దేవుణు మంజిని బాడ్డిదాన్ వాండ్రు బోజనం సితాన్ ఇజి’, ఇజి వెహ్తాన్.

32 అందెజె యేసు వరిజ్ వెహ్తాన్, “నాను మిజి నిజం వెహ్సిన, దేవుణు మంజిని బాడ్డిదాన్ బోజనం మిజి సీతికాన్ మోసె ఆఎన్, గాని నా బుబ్బనె సితాన్. వాండ్రె మిజి దేవుణు మంజిని బాడ్డిదాన్ నిజమాతి బోజనం సీజినికాన్.

33 దేవుణు సీజిని బోజనం ఇన్నిక ఇహిజ, వాండ్రు మంజిని బాడిదాన్ డిగితి వాతి, యా లోకమ్ది లోకురిజ్ ఎలాకాలం దేవుణు వెట బత్కిని బత్కు సీజినికానె”.

34 అహిజ, ప్రబువా, యా బోజనం ఎలాకాలం మజి సీజి మన్అ”, ఇజి వారు వన్నిజ్ వెహ్తార్.

35 అందెజె యేసు వరిజ్ ఈహు వెహ్తాన్, “ఎలాకాలం దేవుణు వెట బత్కిదెజ్ లోకురిజ్ బత్కిన్పిన్ని టిండి నానె. నా డగ్రు వాజినికాన్ ఎసెజ్బా బజ సాఎన్, నజి నమ్మినికాన్ ఎసెజ్బా ఏహ్కా సాఎన్.

36 నాను మిజి వెప్తి లెకెండ్, మీరు నజీ సుడేతి మనిదెర్, గాని నజీ నమిఇదెర్.

37 బుబ్బు నజీ ఒవజెప్తి లోకుర్ విజెరె నా డగ్రు వానార్. నా డగ్రు వాని ఎయెరిజ్బా నాను వెల్లి నెక్కి పొక్వ.

38 ఎందానిజ్ఇహిజ, నాను నజీ ఇస్టం వాతి లెకెండ్ కిదెజ్ ఆవద్, దేవుణు మంజిని బాడ్డిదాన్ డిఃగితి వాతిక. గాని నజీ పొక్తి వన్నిజ్ ఇస్టం వాతి లెకెండ్ కిదెజె డిగిత వాత.

39 నజీ పొక్తి దేవుణు, నా బాణిజ్ ఇన్నిక కోరిజనాన్ ఇహిజ, వాండ్రు నజీ ఒవజెప్తి వరి లొఇ ఎయెరిజ్బా నాను డిఃసైజ్ ఆవద్. గాని వరిజ్ నాను మరి వాని కడెఃవెరి దినమ్దు ఎలాకాలం బత్కిస్తెజె. యాకదె వాండ్రు నా బాణిజ్ కోరిజనాన్.

40 నా బుబ్బు కోరిజనిక ఇన్నిక ఇహిజ, నాను దేవుణు మరిసి ఇజి నెసి నజీ నమ్మిని ఎయెరిజ్బా ఎలాకాలం దేవుణు వెట బత్కిని బత్కు మండ్రెజ్ ఇజి. మరి నాను మర్జి వానివలె నాను వరిజ్ సావుదాన్ బత్కిస్తెజె ఇజి. యాకదె నా బుబ్బు నా బాణిజ్ కోరిజనాన్.

41 యూదురు యేసువందిజ్ మొరొ ఆతార్. దేవుణు మంజిని బాడ్డిదాన్ డిఃగితి వాతి టిండి నానె, ఇజి వాండ్రు వెహ్హాన్. దిని వందిజ్ వారు మొరొ ఆతార్.

42 వారు, “వీండ్రు యోసేపు మరిన్ ఆతి యేసు గదె? విని అయిసి అప్పొసిరిజ్ మాటు నెస్సాట్గదె? మరి ‘నాను దేవుణు మంజిని బాడ్డిదాన్ డిఃగిత వాత’, ఇజి వీండ్రు ఎలాగ వెహ్హినాన్”, ఇజి వర్రిజనార్.

43 అందెజె యేసు, “మీ లొఇ మీరు మొరొ ఆమాట్.

44 నజీ పొక్తి బుబ్బు ఎయెరిజ్బా నా డగ్రు నడిఃపిన్ఎండ మహిజ, వారు నా డగ్రు వాదెజ్ అట్వెర్. నాను వన్నిజ్ కడెఃవెరి దినమ్దు నాను వానివలె సావుదాన్ బత్కిస్తాలె.

45 ప్రవక్తరు దేవుణు మాటదు ముజాలె రాస్త మనాద్, ‘దేవుణునె లోకురిజ్ విజెరిజ్ నెస్పిస్సాన్’, ఇజి. బుబ్బు వెప్తి మాట వెంజి, అయాకెజ్ వన్ని బాణిజ్ నెస్సికార్ నాడగ్రు వానార్.

46 దేవుణు బాణిజ్ వాతికానె ఆఎండ మరి ఎయెన్బా బుబ్బెజ్ తొవన్. వాండ్రు ఒరెండ్రె బుబ్బెజ్ సుడఃత మనాన్.

47 నాను మీ వెట నిజమనె వెప్పిన, నా ముస్కు నమకం ఇడ్డివన్నిజ్ ఎలాకాలం దేవుణు వెట బత్కిని బత్కు మనాద్.

48 ఎలాకాలం దేవుణు వెట బత్కిదెజ్ లోకురిజ్ బత్కిన్పిస్సి టిండి నానె.

49 మీ అనిరు బీడిమ్బూమిదు మన్న ఇన్ని బోజనం ఉటార్. గాని వారు సాతార్.

50 గాని యా టిండి ఎయెర్ ఉటిజ్బా వారు సాఎర్. సాజ నని టిండినె దేవుణు మంజిని బాడ్డిదాన్ డిఃగితి వాతిక.

51 నానె దేవుణు మంజిని బాడ్డిదాన్ డిఃగితి వాతి ఎలాకాలం దేవుణు వెట బత్కిని బత్కు సీని టిండి. ఎయెన్బా యా టిండి తిహిజు, వాండ్రు ఎలాకాలం బత్కినాన్. నా సొంత ఒడొల్నె నాను సీని టిండి. యా లోకమ్దికార్ ఎలాకాలం బత్కిదెజె నాను అయక సీజన”.

52 యేసు వెహిక వెహరె, అయావలె యూదురు వారె వరి లోజ ఉండ్రె గొడఃబ రేజేతాద్. “విని ఒడొల్ ఎలాగ మాటు తిండ్రెజ్ మజే సీనాన్”, ఇజి వర్గితార్.

53 అందెజె యేసు వరిజ్ వెహ్వాన్, “నిజమె నాను మీ వెట వెప్పిన, లోకుమరిసి ఆతి నా ఒడొల్ మీరు తిన్ఎండ మహిజు, నా నల మీరు ఉణెఎండ మహిజు, మీరు ఎలాకాలం బత్కిఇదెర్.

54 నా ఒడొల్ తిని ఎయెరిజ్బా, నా నల ఉణి ఎయెరిజ్బా ఎలాకాలం దేవుణు వెట బత్కిని బత్కు మనాద్. నాను వన్నిజ్ కడెవెరి దినమ్దు నాను వానివలె సావుదాన్ ఎలాకాలం బత్కిస్సాలె.

55 ఎందానిజ్ ఇహిజు, నా ఒడొల్, నా నల యాకెజె తిండ్రెజ్ ఉండెజ్ మనికెజ్. యాకెజె నిజమాతి టిండి.

56 నా ఒడొల్ తినికాన్, నా నల ఉణికాన్, నా వెట కూడఃజి మంజినాన్. నాను వన్ని వెట కూడఃజి మంజిన.

57 లోకుర్ విజెరిజ్ బత్కిదెజ్ పాణం సీజిని బుబ్బు నజి పొక్త మనాన్. వాండ్రు నజి బత్కు సీజినాన్. అయాలెకెండ్రె ఎయెన్బా నా ఒడొల్ తిహిజు, నాను వన్నిజ్ ఎలాకాలం దేవుణు వెట బత్కిని బత్కు సీన.

58 నానె దేవుణు మంజిని బాడ్డిదాన్ డిఃగితి వాతి టిండి. మీ అనిరిజ్ ఉటి మన్ను ఇన్ని బోజనంలెకెండ్ ఆఎద్ యాక. వారు ఉటారె సాతార్. గాని యా టిండి తినికాన్ ఎయెన్బా ఎలాకాలం బత్కినాన్.

59 కపెర్నూసుముదు మన్ని యూదురి మీటిజ్ ఇండ్రో నేర్పిసి మహివలె వాండ్రు యా మాటెజ్ వెహ్లాన్.

60 వన్ని సిసూర్ నండొండార్ యా మాటెజ్ వెహరె, “యా మాటెజ్ గొప్ప కస్టం ఆతికెజ్. ఎయెన్దనిజ్ అర్లం కినాన్?”, ఇజి వర్గితార్.

61 వన్ని మాటెజి వందిజ్ వన్ని సిసూర్ మొరొ ఆజినార్ ఇజి యేసు నెస్తాండ్రె వరిజ్, “యా మాటెజ్ మిజి బాద కిజినెనా?”, ఇజి వెన్బాతాన్.

62 “అహిజ, లోకు మరిసి ఆతి నాను, ముజుల నాను మహి బాడిఃదు ఎక్కి సొనిక మీరు సూణివలె, మీరు ఇన్నిక ఒడఃబినిదెరొ?”

63 దేవుణు ఆత్మనె, ఎలాకాలం దేవుణు వెట బత్కిని బత్కు సీజినాన్. లోకుర అయాక సీదెజ్ అట్ఎర్. నాను మిజి వెహ్లాని మాటెజ్వెట, దేవుణు ఆత్మ మీ ముస్కు వాజినాన్. దేవుణు ఆత్మ మిజి బత్కు సీజినాన్”, ఇజి వెహ్లాన్.

64 “గాని మీ లొఇ సెగొండార్ నాను వెహ్లా మాటెజ్ నమ్మిఇకార్ మనార్”. సిసూర్ లొఇ ఎయెన్ వాండ్రు వెహ్లా మాటెజ్ నమ్మివర్, ఎయెన్ వన్నిజ్ ఒపజెప్పాన్ ఇజి యేసు మొదొహనె నెస్త మహాన్. అందెజె వాండ్రు ఆహె వెహ్లాన్.

65 యేసు మరి వెహ్లానాన్, “మీ లొఇ సెగొండార్ నమ్మిఇదెర్. అందెజె నాను మీ వెట వెహ్లా మన్ను, బుబ్బ సరి సిఎండ మహిజ, ఎయెన్బా నా డగ్రు వాదెజ్ అట్ఎన్”, ఇజి.

66 దిన్ని వెనుక, వన్ని సిసూర్ లొఇ నండొండార్ వన్నిజ్ డిఃస్తారె వన్నివెట మరి సొన్వెతార్.

67 నస్తవలె యేసు పన్నెండు మణిసి సిసూరిజ్, “మీరు బా నజి డిఃసి సొండ్రెజ్ కోరిజినిదెరా?”, ఇజి వెన్బాతాన్.

68 అందెజె సిమోన్ పేతురు, “ప్రబువా, ఎయెర్బాన్ మాపు సొండ్రెజ్? నీ మాటెజ్నె ఎలాకాలం దేవుణు వెట బత్కిని బత్కు

వందిజ్ వెహ్సినె.

69 మాపు ఏలు నమ్మిజినావ్, మాపు నెస్తావ్, నీనె దేవుణు బాణిజ్ వాతికాన్ ఇజి”, ఇజి వెహ్సాన్.

70 అందెజె యేసు, మిజి పన్నెండు మణిసీర్ సిసూరిజ్ ఏర్పాటు కితిక నానె గదె. గాని మీ లోఇ ఒరెన్, నయ్తానుజ్ మన్ని బుద్ది ననికాన్ మనాన్”, ఇజి వెహ్సాన్.

71 వాండ్రు ఇస్కరియోతు సిమోన్ మరిసి యూద వందిజ్ వెహ్సాన్. యూద సిసూర్ లోఇ ఒరెన్ ఆతిజ్బా వాండ్రు యేసుజ్ వెన్కా ఒపజెప్పాన్లె.

7

యేసు తంబెర్సిర్ వన్నిజ్ నమ్మివర్

1 వెనుక, యేసు గలీలయ దేసమ్దునె మంజి నాహ్కాజ్ బూలాజి మహాన్. వాండ్రు యూదయ దేసమ్దు మండ్రెజ్ కెవితాన్. ఎందానిజ్ ఇహిజు, యూదురు వన్నిజ్ సప్తెజ్ సుడేజి మహాన్.

2 నస్తివలె, యూదురి ఉండ్రీ పండోయ్ డగ్రు ఆతాద్. అయా పండోయ్ పేరునె గుడుస పండోయ్* ఇజి.

3 పండోయ్ డగ్రు ఆతిజ్, యేసు తంబెర్సిర్ వన్నిజ్, “ఇబ్బెణిజ్ నీను యూదయ దేసమ్దు సాన్అ. ఎందానిజ్ ఇహిజు, నీ సిసూర్ ఆతికార్ నీను కిజిని బమ్మ ఆతి పణిజ్ సుడేదెజ్”, ఇజి వెహ్సాన్.

4 “పెరికాన్ ఆదెజ్ కోరిజినికాన్ ఎయెన్బా డాప్పి వన్ని పణి కిపెన్. విజెరె ఎద్దునె కినాన్. నీను యా బమ్మాని పణిజ్ కిజిని ఇహిజు, నిజి నీనె లోకమ్ది లోకుర్ ఎద్దు తోరె ఆదెజ్ మరి. యా గలీలయదికార్ ఉండ్రె ఆవండ”, ఇజి వెహ్సాన్.

5 వన్ని తంబెర్సిర్బా వన్నిజ్ నమిఎతార్.

* **7:2 7:2** అయా పండోయ్ కాలమ్దు రొడ్డెజాణిజ్ గుడిస తోహ్పొరెబానె మంజినార్. వరి అన్నిసీర్ ఇస్రయేలు లోకుర్ నలపయ్ పంటిజ్ పయనం కిజి మహివలె గుడుసాదు మహిదన్నివందిజ్ ఎత్తుకిజి యూదురు యా పండోయ్ కిజినార్.

6 అందెజె యేసు వరిజ్, “నాను పండొయిదిజ్ సొండ్రెజ్ నమయం ఇంక రవదె. గాని మిజి ఎస్తివలెబా సొండ్రెజ్ ఆనాద్.

7 యా లోకమ్దు మన్ని దేవుణుదిజ్ దూసిస్సికార్ మిజి దూసిన్ఎర్. ఎందానిజ్ ఇహిజ, మీరు బా వరి వెట మనిదెర్. గాని వారు నజీ దూసిస్సార్. ఎందానిజ్ ఇహిజ, వారు సెఇకెజ్ కిజినార్ ఇజి నాను వెహ్సిన.

8 మీరు పండొయిదిజ్ సొండ్రు. నాను ఏలు సొన్ఏ. ఎందానిజ్ ఇహిజ, నాను సొండ్రెజ్ నమయం పూర్తి రవదె”, ఇజి వెహ్హాన్.

9 యాక వెహ్హాండ్రె వాండ్రు గలీలయదు మహాన్.

యేసు గుడుఱస పండొయ్దిజ్ సొన్సినాన్

10 వన్ని తంబెర్సిర్ పండొయ్దిజ్ సొహి వెన్కా, వాండ్రు బా సొహాన్. లోకుర్ విజెరె వన్నిజ్ నెన్ఇ లెకెండ్ వాండ్రు డాజ్జి సొహాన్.

11 గాని పండొయ్దు, యూదురు వన్నిజ్ రెబాజి, “అయా వాండ్రు ఒంబొవీన్”, ఇజి వెన్బాజి మహాన్.

12 లోకుర్ లొఇ వన్ని వందిజ్ నండొ మొరొ ఆతార్. సెగొండార్ వాండ్రు నెగ్గికాన్ ఇజి, మరి సెగొండార్, సిల్లె వాండ్రు లోకురిజ్ మొసెం కిజినికాన్ ఇజి మొరొ ఆతార్.

13 గాని యూదురిజ్ తియెలాజి, ఎయెర్బా వన్ని వందిజ్ డటం వెహ్ఏతార్.

యేసు పండొయ్దు నెన్పిస్సాన్

14 పండొయి దినమ్కు సెగం ఆతాద్. అయావలె వాండ్రు దేవుణు గుడిఱిది అరుబుదు సొహాండ్రె అబె మన్ని లోకురిజ్ నెర్పిసినాన్.

15 అందెజె యూదురు నండొ బమ్మ ఆతారె, “వీండ్రు బడిఱిదు సొన్ని నద్విఇతికాన్ గదె? మరి ఎలాగ వీండ్రు నిసొ నెస్త మనాన్?”, ఇజి వర్గితార్.

16 నస్తివలె యేసు వెహ్హాన్, “నాను నేర్పిన్ని మాట నా సొంత మాట అవద్. గాని అయాక నజీ పొక్తి వన్ని బాణిజ్ వాజినాద్.

17 దేవుణు ఇస్తుం కిదెజ్ కోరిజునికాన్ ఎయెన్బా, నాను నేర్పిస్సి మాట దేవుణు బాణిజ్ వాజినాదో, నా సొంత అతికారం దాన్ నాను నేర్పిసినికాదో ఇజి నెస్సాన్.

18 సొంత అతికారమ్దాన్ నెన్పిసినికాన్ ఎయెన్బా వన్నిజ్ గవరం వాదెజె నెన్పిస్సాన్. గాని వన్నిజ్ పోక్తి వన్నిజ్ గవరం వాదెజ్ ఇజి కోరిజునికాన్ నిజామాతికాన్. వన్ని లోఇ ఇనితప్పబా సిల్లెద్.

19 దేవుణు మోసెజ్ సిత్తి రూలుజ్ వాండ్రు మిజి సితాన్ గదె? గాని మీ లోఇ ఒరెన్బా ఆ రూలుజు వజు నడెఇదెర్. మీరు ఎందానిజ్ నజి సప్తెజ్ సుడెజునిదెర్?”, ఇజి వెప్తాన్.

20 అయావలె మందలోకుర్, “నిజి దెయం అస్తాద్. ఎయెర్ నిజి సప్తెజ్ సుడెజునార్?”, ఇజి మర్జి వెప్తాన్.

21 యేసు వరిజ్ వెప్తాన్, “నాను బమ్మాతి ఉండ్రీ పణి కిత. మీరు విజిదెరె నండో బమ్మ ఆతిదెర్.

22 మీరు సునతి కిదెజ్ ఇజి మోసె మిజి రూలు సిత మనాన్. అందెజె మీరు కొణెదిజ్ విస్త్రాంతి దినమ్దు సునతి కిజునిదెర్. సుడెదు, మోసె ఆవన్ సునతి మొదోల్స్తికాన్, మీ అనిర్నె అయాక మొదోల్స్టార్.

23 విస్త్రాంతిదినమ్దు ఒరెన్ కొణెదిజ్ సునతి కిజునిదెర్. ఎందానిజ్ ఇహిజు, మోసెజ్ దేవుణు సిత్తి రూలుజ్ తప్పెజ్ ఆవద్ఇజి. అహిజు, నాను ఒరెన్ లోకుదిజ్ విస్త్రాంతి దినమ్దు పూర్తి నెగెణ్ కితి వందిజ్ మీరు ఎందానిజ్నా ముస్సు కోపం ఆజునిదెర్?

24 మీరు ముస్సు తోర్జుని దన్నివందిజ్ సుడెజు తీర్పు కిమాట్. గాని నిజమాతికెజ్ సుడెజు తీర్పు కిదు.

యేసు నిజం క్రిస్తునా ఇజి వెన్బాజునార్

25 నస్తవలె సెగెండార్ యెరుసలెమ్దికార్, “వినిజె గదె అతికారిజు సప్తెజ్ సుడెజునార్.

26 ఇవిలోన్ వీండ్రు దయరమ్దాన్ విజెరె ఎద్రు వర్గిజునాన్. గాని వారు వన్నిజ్ ఇనికబా ఇన్ఎర్. వీండ్రు క్రిస్తు ఇజి అతికారిజు నిజమె బప్పకొటారా?

27 క్రీస్తు వానివలె, వాండ్రు ఎమేణికాన్ ఇజి ఎయెర్బా నెన్వర్. గాని వీండ్రు ఎంబెణికాన్ ఇజి మాపు నెస్నాప్”, ఇజి వర్గితార్.

28-29 అందెజె యేసు గుడిః అరుజుదు నేర్పిసి మహివలె, ఈహు డటం వెప్టాన్. “నాను ఎయెన్, ఎమేణికాన్ ఇజి మీరు నిజం నెస్సిదెరా? నాను నా సొంత ఇస్టందాన్ వాతికాన్ ఆవ. గాని నజీ పోక్తాన్ ఒరెన్ మనాన్. వాండ్రు నిజమాతి దేవుణు. మీరు వన్నిజ్ నెన్ఇదెర్. గాని నాను వన్నిజ్ నెస్సు. ఎందనిజ్ ఇహిజు, నాను వన్ని బాణిజ్ వాత మన్న. వాండ్రె నజీ పోక్తాన్”, ఇజి.

30 యాకెజ్ వెహారె, వారు వన్నిజ్ అస్టెజ్ సుడఃతార్. గాని ఎయెన్బా వన్నిజ్ అస్ఎతార్. ఎందానిజ్ ఇహిజు, వాండ్రు అస్సె ఆదెజ్ దేవుణు ఏర్పాటు కితి సమయం రెవదె.

31 అహిజ్బా లోకుర్ లొఇ నండెండార్ వన్ని ముస్సు నమకం ఇట్టార్. వారు, “వీండ్రు నండె బమ్మాని పణిజ్ కిత్తాన్. లోకురిజ్ రక్సిస్టెజ్ దేవుణు ఏర్పాటు కితి పోక్తి క్రీస్తు వానివలె, విని ముస్సు మరి నండె బమ్మాని పణిజ్ వాండ్రు కినాండ్రా?”, ఇజి వెప్టార్.

32 లోకుర్ యేసు వందిజ్ అయాకెజ్ మొరొ ఆజినికెజ్ పరీసయిరు వెహార్. నస్తివలె పెరి పుజెరిజు ని పరీసయిరు వన్నిజ్ తొహ్సె ఒతెజ్ దేవుణు గుడిఃది జమాన్జ పోక్తార్.

33 అందెజె యేసు, “నాను మీ వెట సెగం కాలమ్నె మంజినె. వెన్కా నాను నజీ పోక్తి వన్ని డగ్రు సొన్సిన.

34 మీరు నజీ రెబానిదెర్. గాని తొఇదెర్. నాను మన్ని బాన్ మీరు వాదెజ్ అట్ఇదెర్”, ఇజి వెప్టాన్.

35-36 నస్తివలె యూదురు అతికారుజు, ఒరెన్వెట ఒరెన్, “వీండ్రు మజీ తోర్ఎండ ఎంబె సొండ్రెజ్ సుడఃజినాన్? వాండ్రు, సెగొండార్ యూదురు మా బాణిజ్ సెద్రిజి బత్తిజిని గ్రీకు పట్టుమ్కాజ్ సొనాండ్రా? వాండ్రు యూదురు ఆఇ వరిజ్ నేర్పిస్సాండ్రా? వాండ్రు వెహ్సినాన్, “మీరు నజీ రెబానిదెర్. గాని తొఇదెర్. నాను మన్ని బాన్ మీరు వాదెజ్ అట్ఇదెర్” ఇజి. ఎందానిజ్ వాండ్రు ఆహె వెహ్సినాన్?”, ఇజి వర్గితార్.

37 పండెయ్ కడెఃవెరి రోజు వాతాద్. కడెఃవెరి రోజునె ముకెలమాతి

దినం. అయా నాండిజ్ యేసు నిహండ్రె ఈహు డటం వెహ్లాన్. “ఏహ్క్కికట్టికాన్ ఎయెన్బా నా డగ్గు రఅ. నాను వన్నిజ్ ఉండెజ్ సీన.

38 దేవుణు మాటదు వెహ్లావజ, “నా ముస్కు నమకం ఇడ్డి ఎయెర్ గర్బం దాన్బా, నిజమాతి బత్తు సీని ఏరు సోసి సొనెలె. అయాక ఉండ్రె ఊట సోసి సొని లెకెండ్ సొనెలె.

39 ఇబ్బె యేసు నిజమాతి బత్తు సీని ఏరు ఇజి వెహ్లాక దేవుణు ఆత్మ వందిజె. యా దేవుణు ఆత్మ, యేసు ముస్కు నమకం ఇడ్డి వరిజ్, యేసుజ్ దేవుణు మంజిని బాడిడు ఒతి వెన్కా దోహ్కాన్లె. గాని యేసు యాక వెహ్లావలె, దేవుణు వన్ని ఆత్మ వన్నిజ్ నమ్మితి వరిజ్ సివండ్రె. ఎందానిజ్ ఇహిజ, దేవుణు యేసుజ్ వన్ని వెట వన్ని గొప్ప జాయ్దు మండ్రెజ్ దేవుణు మంజిని బాడిడు ఒవండ్రె.

40 వన్ని మాటెజ్ వెహరె, లోకుర్ లొఇ సెగొండార్, “నిజమె, వీండ్రె మాపు ఎద్రు సుడెజి మహి ప్రవక్త”, ఇజి వెహ్లార్.

41 మరి సెగొండార్, “సిల్లె వీండ్రె క్రీస్తు”, ఇహార్. గాని సెగొండార్, “క్రీస్తు ఎలాగ గలీలయదాన్ వానాన్?

42 క్రీస్తు దావీదు రాజు కుటుమ్దాన్, దావీదు బత్తిజి మహి పట్టుమాతి బెల్లెహెమ్దాన్ వానాన్, ఇజి దేవుణు మాటదు మనాద్ గదె”, ఇహార్.

43 ఆహె వన్ని వందిజ్ లోకుర్ ఎర్లితార్.

44 సెగొండార్ వన్నిజ్ అస్తెజ్ కోరితార్. గాని ఎయెర్బా వన్నిజ్ అన్ఏతార్.

45 అందెజె యేసుజ్ అస్తెజ్ వాతి దేవుణు గుడిడిది జమానుజు మరజి పెరి పుజెరిజ ని పరిసయురుజు బాన్ సొహార్. వారు జమాన్జు, “మీరు ఎందానిజ్ వన్నిజ్ అసి తెఇదెర్?”, ఇజి వెన్బాతార్.

46 దన్నిజ్ వారు, “వీండ్రు వెహ్లా మాటెజ్ లెకెండ్ ఎయెర్బా ఎసెజ్బా వెహ్ఎర్”, ఇహార్.

47 పరిసయ్దురుజు, “మీరు బా మొసం ఆత్తిదెరా?

48 అతికారిజు లొఇనొ పరిసయురుజు లొఇనొ ఎయెన్బా వన్నిజ్ నమితాండ్రా?

49 గాని యా మంద లోకుర్ దేవుణు మోసెజ్ సిత్తి రూలుజ్ నెన్ఎర్. అందెజె వరిజ్ దేవుణు సాయెప్ సీనాన్”, ఇజి వెప్టోర్.

50 నికొదిమొన్ ఇనికాన్ ఒరెన్ ముజాలె యేసు డగ్రు సాహ మహాన్. వాండ్రు పరిసయిరుజ లోఇ మన్నికాన్.

51 నస్తివలె నికొదెము, “మా యూదురి రూలుజు వజ, ఒరెన్ వాండ్రు వెస్సెనికెజ్ మాపు ముజాల వెంజి, వాండ్రు కితికెజ్ నెస్తి వెన్కనె వన్ని ముస్సు తీర్పు కిదెజ్ ఆనాద్”, ఇజి వెప్టోన్.

52 అందెజె వారు, “నీను బా గలీలయదాన్ వాతికాండ్రా? నీను దేవుణు మాట బాగ నద్విఅ. ఒరెన్ ప్రవక్తబా గలీలయదాన్ సోవన్, ఇజి నీను నస్తివలె నెస్తిలె”, ఇజి వెప్టోర్.

53 వెనుక వారు విజెరె వరివరి ఇల్కాజ్ సాహోర్.

8

రంకు బూలాజి మహి బోదెల్దిజ్ యేసుడగ్రు తసినార్

1 గాని యేసు ఒలివ గొరొత్* సాహాన్.

2 జాయ్ ఆతివెలె మరి వాండ్రు దేవుణు గుడిడి అరుజుదు వాతాన్. లోకుర్ విజెరె వాజి వన్నిడగ్రు కూడితార్. వాండ్రు బస్తాండ్రె వరిజ్ నెన్పెసినాన్.

3-4 నస్తివలె పరిసయిరుని యూదురి రూలుజ్ నెస్తిస్సికార్ ఉండ్రె బోదెల్దిజ్ తతార్. అది, రంకు బూలాజి మహివలె వారు దన్నిజ్ అస్తార్. వారు దన్నిజ్ మంద ఎద్రు నిల్ప్తారె యేసుజ్, “బోదకినికిదా, యా బోదెల్ రంకు బూలాజి మహివలె, మాపు అస్తాప్.

5 మోసె మజి రూలు సితెవెలె మజి ఆడ్ర వెప్టోన్, “ఆహె బూలాని వన్కాజ్ పణకాణిజ్ డెయిజి నప్తెజ్” ఇజి. గాని నీను ఇనిక వెస్సెని”, ఇజి వెన్బాతార్.

6 వన్ని ముస్సు నేరం మోప్తెజ్ ఇజి వన్నిజ్సికుదు అర్ప్తెజ్ అహు వెన్బాతార్. గాని యేసువజితాండ్రె బూమిదు వన్ని డెస్కుదాన్రాసి మహాన్.

* 8:1 8:1 అయా గొరొత్ ఒలివ మరిక్ నండొ మన్నె అందెజె ఒలివ గొరొన్ ఇనార్

7 వారు మరిమరి వెన్బాజి మహిజ్, వాండ్రు బుర్ర పెహ్లాండ్రె వరిజ్, “మీ లోఇ పాపం కిఇకాన్ ముజాల దన్నిజ్ పణుకుదాన్ డెయ్దు”, ఇజి వెహ్లాన్.

8 వెహ్లాండ్రె వాండ్రు మరి వజ్జి, బూమిదు రాసి మహాన్.

9 గాని వారు యా మాటెజ్ వెహారె, ఒరెన్ వెన్కా ఒరెన్ డిఃస్త సాహార్. ముజాలె పెరికార్ సాహార్. వెన్కా ఇజ్జికార్. ఆహె విజెరె సాహార్. యేసుని అయా బోదెల్ని బాన్ మహార్. అది నిహిమహిబానె మహాద్.

10 యేసు బుర్ర పెహ్లాండ్రె, దనిజ్, “వారు ఎంబె మనార్? ఎయెర్బా, నిజి తీర్పు సీజి సిక్కు సిఎరా?”, ఇజి వెన్బాతాన్.

11 “సిల్లె బాబు”, ఇహాద్ అది. అందెజె యేసు, “అహిజ, నానుబా, నిజి తీర్పు సీజి సిక్కు సివి. సాన్అ. ఏలుదాన్ మరి పాపం కిమా”, ఇహాన్.

యేసు లోకమది లోకురిజ్ జాయ్

12 మరి, యేసు లోకురిజ్ వెహ్లాన్, “నానె లోకమది లోకురిజ్ జాయ్. నా సిసూ ఆనికాన్ ఎయెన్బా సీకటుదు మన్ఎన్. గాని వన్నిజ్ బత్కు సీని జాయ్ మంజినాద్’.

13 నస్తివలె పరిసయరు వన్నిజ్, “నీనె నీ వందిజ్ సాక్సి వెహ్లాని, మరి ఎయెర్బా అయాక నిజం ఇజి వెహ్లాండ్రె. అందెజె నీ సాక్కుమదిజ్ నిజం సిల్లెద్”, ఇజి వెహ్లాన్.

14 అందెజె యేసు వెహ్లాన్, “నానె నా వందిజ్ సాక్సి వెహ్లాన్. అహిజ్బా నాను వెహ్లా సాక్సి నిజమనె. ఎందానిజ్ ఇహిజ, నాను ఎమెణాజ్ వాత, ఎంబె సాన్సిన ఇజి నాను నెన్ను. గాని మీరు నెన్ఇదెర్ నాను ఎమెణాజ్ వాత ఎంబె సాన్సిన ఇజి.

15 మీరు లోకుర్ సుడెజినికెజ్ సుడెజి తీర్పు సీజినిదెర్. గాని నాను అయాలెకెండ్ ఎయెరిజ్బా తీర్పు సివి.

16 నాను తీర్పు సితిజ్బా నాను సిత్తి తీర్పు నిజమనె. ఎందానిజ్ ఇహిజ, నాను ఒరెన్ ఆవి తీర్పు సీజిన. నజి పోక్తి బుబ్బు నా వెటె మనాన్.

17 దేవుణు మోసెజ్ సిత్తి మీ రూలుజ్దు రాస్త మనాద్, ‘రివర్ వెహ్లాని సాసి ఉండ్రె లెకెండ్ మహిజ, అయాక నిజం ఇజి’.

18 నానె నా వందిజ్ సాక్సి వెహ్నిన. మరి నజి పోక్తి నా బుబ్బ బా నా వందిజ్ సాసి వెహ్నినాన్”.

19 నస్తవలె వారు వన్నిజ్, “ఎంబె నీ బుబ్బ మనాన్?”, ఇజి వెన్బాతార్. దన్నిజ్ యేసు”, మీరు నజి నెన్ఇదెర్. నా బుబ్బెజ్ నెన్ఇదెర్. మీరు నజి నెస్సికిహిజ, నా బుబ్బెజ్బా నెస్తిదెర్ మరి”, ఇజి వెహ్నిన్.

20 వాండ్రు యా మాటెజ్ దేవుణు గుడిఃదు సంత అర్ప్పి పెటెజ్ ఇడ్డిబాన్ మంజి నెన్పిసి మహివలె వెహ్నిన్. గాని ఎయెన్బా వన్నిజ్ అన్వితార్. ఎందానిజ్ ఇహిజ, వన్నిజ్ అస్తెజ్ దేవుణు ఎత్తు కిత్తి సమయం రెవ్దె.

21 మరి యేసు వరిజ్, “నాను సొనాలె. మీరు నజి రెబానిదెర్. మీరు పాపమ్కు కిజి మంజినె సానిదెర్. నాను సొని బాడిఃదు మీరు వాదెజ్ అల్ఇదెర్”, ఇజి వెహ్నిన్.

22 అందెజె యూదురు ఒరెన్ వెట ఒరెన్, “వన్నిజ్ వాండ్రె సపె ఆనాండ్రా? వాండ్రు వెహ్నినాన్ గదె నాను సొని బాడిఃదు మీరు వాదెజ్ అల్ఇదెర్ ఇజి’, ఇజి వర్గితార్.

23 యేసు వరిజ్ ఈహు వెహ్నిన్: “మీరు ఇబ్బె యా లోకమ్దికిదెర్. గాని నాను ముస్కు దేవుణు మంజిని బాడిదికాన్. మీరు యా లోకమ్దికిదెర్. నాను ఇబ్బెణికాన్ ఆఎ.

24 నాను మిజి వెహ్ని మన్న మీరు పాపం కిజి మంజినె సానిదెర్ ఇజి. నాను ఎయెన్ ఇజి వెహ్నినానో, నానె వాండ్రు ఇజి మీరు నమ్మిఎండ మహిజ, మీరు నిజమ్నె పాపమ్దు మంజినె సానిదెర్”.

25 వారు వన్నిజ్, “నీను ఎయెన్?”, ఇజి వెన్బాతార్. ‘నాను ఎయెన్ ఇజి మొదోహనె వెహ్ని మనానో, నానె వాండ్రు’, ఇహాన్.

26 యేసు మరి వెహ్నిన్ “మీ వందిజ్ నండొ వెహ్నిజ్ నజి మనాద్. మీ ముస్కు నండొ తీర్పుజ్బా మనాద్. గాని నజి పోక్తాన్ నిజామాతికాన్. వాండ్రు నజి వెహ్ని సజతిజ్నె నాను లోకమ్ది లోకురిజ్ వెహ్నిన్.

27 వాండ్రు దేవుణు మంజిని బాడిఃదు మన్ని వన్ని బుబ్బ వందిజె వరిజ్ వెహ్నినాన్ ఇజి వారు అర్దం కివెతార్.

28 అందెజె యేసు వరిజ్, “మీరు లోకు మరిసి ఆతి నజి సిలువాదు నప్పివెలె, మీరు నన్నెదెర్, నాను ఎయెన్ ఇజి. మరి, నాను నా సొంత అతికారం దాన్ ఇనికబా కిఎ. గాని నా బుబ్బు నజి నెస్పివజనె నాను వెప్పిన, ఇజి మీరు నెన్నెదెర్.

29 నజి పోక్తాన్ నజి తోడుః మంజినాన్. వాండ్రు నజి ఒరెన్ వన్నెజె డిస్ఎతాన్. ఎందానిజ్ ఇహిజ వన్నెజ్ ఇస్టం వాతికెజె నాను ఎస్తివలెబా కిజిన”, ఇజి వెప్తాన్.

30 వాండ్రు యా మాటెజ్ వెప్తివలె నండొండార్ వన్ని ముస్సు నమకం ఇడ్తార్.

అబ్రాహము కొడొఱ్

31 వన్ని ముస్సు నమకం ఇడ్తి యూదురిజ్ వాండ్రు వెప్తాన్, “నాను వెప్తి మాటెజ్ లోజిజి మహిజ, మీరు నిజమ్నె నా సిసూర్ ఆనిదెర్.

32 నస్తివలె మీరు దేవుణు వందిజ్ నిజమాతికెజ్ నెన్నెదెర్. అయాక మిజి పాపమ్కాణిజ్ డిస్పిస్నాద్”.

33 వారు వన్నెజ్, “మాపు అబ్రాహము తెగ్గదు పుట్టికాప్. మాపు ఎసెజ్బా ఎయె అడిఱిగి వెట్టిపణి మణిసిర్ లెకెండ్ మన్ఎపె. నస్తివలె ‘మీరు డిఱె ఆనిదెర్’, ఇజి ఎలాగ వెప్పిని”, ఇజి వెప్తార్.

34 అందెజె యేసు, “ఒరెన్ వెట్టిపణి కినికాన్, ఎలాగ తోహె ఆతి మన్ని వజ ఎజమాని అడిఱిగి మంజి నాండ్రో, అయాలెకెండ్ పాపం కిని విజెరె పాపమ్దిజ్ అడిఱిగి తోహె ఆతి లెకెండ్ మంజినాన్.

35 ఒరెన్ వెట్టిపణి కినికాన్ అక్కు మన్ని వన్ని లెకెండ్ ఎలాకాలం అయా ఇండ్రో మండ్రెజ్ అట్ఎన్. గాని అయా ఇండ్రోణి మరిసిజ్ ఎలాకాలం అయా ఇండ్రో అక్కు మంజినాద్.

36 అందెజె దేవుణు మరిసి మిజి తోహె ఆతి బాణిజ్ డిస్పిస్తిజ, మీరు నిజమ్నె డిఱెఆనిదెర్.

37 నాను నెన్నె మీరు అబ్రాహము తెగ్గతికిదెర్ ఇజి. గాని మీరు నజి నప్పెజ్ సుడఃజినిదెర్. ఎందానిజ్ ఇహిజ నాను వెప్పిని మాటెజ్ మిజి పడిఱె.

38 నా బుబ్బు నజీ తోరిస్తికెజ్ నాను వెప్పిన. గాని మీరు మీ బుబ్బు వెప్పినికెజ్ కిజినిదెర్”, ఇజి వెప్తూన్.

39 నస్తీవలె వారు, “అబ్రాహమునె మా బుబ్బు”, ఇజి వెప్తూర్.

40 “మీరు అబ్రాహము కొణ్డోర్ ఇహిజు, మీరు అబ్రాహము కితి పణిజ్ నె కితిదెర్ మరి. దేవుణు బాణిజ్ నాను వెహికెజె మిజి వెప్తూజ్ నాను ఎసెజ్ బా సుడఃత. గాని మీరు నజీ సప్తెజ్ సుడఃజినిదెర్. అబ్రాహము యా లెకెండ్ ఇనికబా కిఎన్.

41 మీ బుబ్బు కిజినికెజె మీరు బా కిజినిదెర్”, ఇజి వెప్తూన్. అయావలె వారు, “మాపు అప్పొసి వెట పుట్టికాపె. దేవుణు ఒరెండ్రె మా బుబ్బు”, ఇహోర్.

42 అందెజె యేసు వరిజ్ ఈహు వెప్తూన్: “దేవుణునె మీ బుబ్బు ఇహిజు, మీరు నజీ ప్రేమిస్తిదెర్ మరి. ఎందానిజ్ ఇహిజు, నాను దేవుణు బాణిజ్ వాత. నాను యేలు ఇబ్బె మన్న. నాను నా సొంత ఇష్టమ్దాన్ రెవత. గాని వాండ్రు నజీ పొక్తాన్.

43 ఎందానిజ్ నాను వెప్పిని మాటెజ్ మీరు అర్థం కిజిదెర్? ఎందానిజ్ ఇహిజు, నాను వెప్పిని మాటెజ్ వెండ్రెజ్ మీరు కెఇదెర్.

44 మీ బుబ్బు సయ్తానె. మీరు వన్ని కొణ్డోర్. మీరు వన్నిజ్ ఇష్టం ఆతికెజ్ కిదెజ్ కోరిజినిదెర్. మొదోహన్ అసి వాండ్రు సప్పికాన్. వాండ్రు నిజమాతి బాడిఃదు నిల్వన్. ఎందానిజ్ ఇహిజు, వన్ని లోఇ నిజమాతికెజ్ సిల్లు. వాండ్రు అబద్దం వర్గినివలె, వన్ని సొంత బుద్దిదాజె వర్గిజిని. ఎందానిజ్ ఇహిజు, వాండ్రు అబద్దం వర్గినికాన్. అబద్దం వర్గిని వరి అపొసి.

45 గాని నాను దేవుణు వందిజ్ నిజమాతికెజ్ వెప్పిన. అందెజె మీరు నజీ నెన్ ఇదెర్.

46 మీ లోఇ ఎయెన్ బా నాను తపు కితికాన్ ఇజి రుజుప్ కిదెజ్ అట్ నాండ్రా? నాను నిజమాతికెజ్ వెప్తూజు, ఎందానిజ్ మీరు నజీ నమిఇదెర్.

47 దేవుణు కొణ్డోర్ ఆతికార్ వన్ని మాటెజ్ వెనార్. మీరు దేవుణు కొణ్డోర్ ఆఇదెర్. అందెజె నా మాటెజ్ వెన్ ఇదెర్”.

48 నస్తవలె యూదురు వన్నిజ్, “నీను సమరియదికి, నిజి దెయం అస్తాద్ ఇజి మాపు వెహ్నిని మాటదు తపు ఇనికబా మనాదా?”, ఇహోర్.

49 నజి దెయం అన్వద్. నాను నా బుబ్బెజ్ గవరం సీజిన. గాని మీరు నజి కరాయి ఇజినిదెర్.

50 నాను నా వంద్రిజ్ గవరం అన్పె ఆదెజ్ నుడోవ. గాని అయాకెజ్ నుడోజినాన్ ఒరెన్ మనాన్. వాండ్రె నా వంద్రిజ్ నాయమ్దాన్ తీర్పు సీజినికాన్.

51 నా మాటెజవజ బత్కినికాన్ ఎయెన్బా సాఎన్, ఇజి నాను నిజం మీ వెట వెహ్నిన్”, ఇజి మర్జి వెహ్తోన్.

52 అయావలె యూదురు, “ఏలు మాపు నెస్సాప్ నీను దెయం అస్తికి ఇజి. అబ్రాహము సాతాన్. అయా లెకెండ్ ప్రవక్తరుబా సాతార్. గాని నీను వెహ్నిని, ‘నా మాటెజ వజ బత్కినికాన్ ఎయెన్బా సావన్’, ఇజి.

53 నీను మా బుబ్బు ఆతి అబ్రాహము ఇంక పెరికిదా? వాండ్రు సాతాన్. అయా లెకెండ్ ప్రవక్తరు బా సాతార్. నీను ఎయెన్ ఇజి నీను ఒడోబిజిని?”, ఇజి వెహ్తోర్.

54 అందెజె యేసు, “నానె నజి పొగ్డిఃతిజ దనిజ్ విలువ సిల్లెద్. గాని నజి పొగ్డిఃనికాన్నా బుబ్బునె. వన్నిజె మీరు, మా దేవుణు ఇజి వెహ్నినిదెర్.

55 మీరు వన్నిజ్ నెన్ఇదెర్. గాని నాను వన్నిజ్ నెన్ను. నాను వన్నిజ్ నెన్వ ఇజి వెహ్నిజ, మీ లెకెండ్ ఒరెన్ అబద్దం వర్గినికాన్ ఆత మరి. గాని నాను వన్నిజ్ నెన్ను. వన్నిమాటెజ వజ బత్కిజిన.

56 మీ బుబ్బుతి అబ్రాహము, నాను వాని దినం నుడోదెజ్ అట్టు ఇజి సర్ద ఆతాన్. వాండ్రు అయా దినం నుడోతాండ్రె సర్ద ఆతాన్”, ఇజి వెహ్తోన్.

57 నిజి ఏలు యాబయ్ పంటెజ్బా సిల్లు. నీను అబహముజ్ నుడోతిదా?”, ఇజి యూదురు వన్నిజ్ వెహ్తోర్.

58 అందెజె యేసు, “అబ్రాహము పుట్టవండ ముజాలె నాను మన్న ఇజి నిజం మీ వెట వెహ్సిన”, ఇజి వెహ్సాన్.

59 యాక వెహిజ్, వారు వన్నిజ్ డెయ్దెజ్ పణుకు పెహ్తార్. గాని వాండ్రు డాఃజెతాండ్రె గుడిఃదాన్ సొహాన్.

9

పుట్టివలెహాన్ అసి గుడ్డి ఆతివన్నిజ్ నెగెండ కిజినాన్

1 యేసు సొన్ని మహివలె, పుట్టిబాణిజ్ అసి గుడ్డి ఆతి ఒరెన్వన్నిజ్ సుడఃతాన్.

2 నస్తవలె వన్నిసిసూర్ వన్నిజ్, “బోదకినికి, ఎయెర్ పాపం కితిజ్ వీండ్రు గుడ్డిదాన్ పుట్టాన్? వీండ్రునా విన్ని అయ్సి అప్పొసిర్నా?”, ఇజి వెన్బాతార్.

3 అందెజె యేసు, “వీండ్రు పాపం కితిజ్ ఆవద్, విన్ని అయ్సి అప్పొసిర్ పాపం కితిజ్ ఆవద్. గాని దేవుణు ఒరెండ్రె కిదెజ్ అట్టి పణి వినిలోఇ సుడఃదెజె వీండ్రు గుడ్డి ఆతాండ్రె పుట్టాన్.

4 వేడె మనివలె, మాటు నజి పొక్తివన్ని పణి కిదెజ్వలె. సీకట్ బేగి ఆనాద్. అయావలె ఎయెర్బా ఇనికబా కిదెజ్ అట్వెర్.

5 నాను యా లోకమ్దు మనివలె, యా లోకమ్దివరిజ్ జాయ్లెకెండ్రె మన”, ఇజి వెహ్సాన్.

6 వెహ్సాండ్రె, వాండ్రు బూమిదు పూస్తాన్. వన్ని పూసవలిదాన్ కండెక్ బుర్ద కితాండ్రె, అయా బుర్ల గుడిః వన్ని కణకెజి ముస్కు రాస్తాన్.

7 రాస్తాండ్రె, “నీను సొన్ని సిలోయెము ఇన్ని గుమ్మిదు కణుకు నొరె ఆఆ”, ఇజి వెహ్సాన్. (సిలోయెము ఇన్ని మాటదిజ్ పొక్తికాన్ ఇజినె అర్దం) వాండ్రు సొహాండ్రె నొరె ఆతాన్. వన్ని కణుకు నెగెణ్ఆతె. వాండ్రు మర్జి వాతాన్.

8 అయావలె వన్ని పడఃకాదికాన్ని వాండ్రు ముజాలె లొన్పానిక సుడిఃతి మహికార్ వెన్బాతార్, “వీండ్రు అబ్బె బసి లొసి మహికాన్గదె”, ఇజి.

9 సెగొండార్, “వీండ్రె”, ఇజి. మరి సెగొండార్, “సిలె, వినిలెకెండ మన్ని మరి ఒరెనె”, ఇహార్. గాని వాండ్రు, “నానె లోన్పాజి మహికాన్”, ఇజి వెహ్హాన్.

10 అయావలె వారు, “నీ కణుకు ఎలాగ రెకె ఆతె?”, ఇజి వెన్బాతార్.

11 అందెజె వాండ్రు, “యేసు ఇజి కూక్కి ఒరెన్బుర్ద కితాండ్రె నా కణకెజి మున్సు రాస్తాన్. సిలొయము ఇన్ని గుమ్మిదు సొన్ని నొరె ఆఅ, ఇహాన్. అందెజె నాను సొన్ని నొరె ఆత్తిజ్నాను సుడేదెజ్ అట్ట”, ఇహాన్.

12 “ఎంబె మనాన్ అయా వాండ్రు”, ఇజి వారు వెన్బాతార్. “ఏమె నాను నెస్వ”, ఇహాన్ వాండ్రు.

13 ముజాల గుడ్డిదాన్ మహివన్నిజ్ వారు పరిసయరుజు డగ్రు తత్తార్.

14 ఉండ్రె విస్తాంతి నాండిజె, యేసు బుర్ల కితాండ్రె అయా వన్ని కణుకు నెగెణ్ కితాన్.

15 పరిసయరు బా నీను ఎలాగ బేస్సెజ్ అట్టి ఇజి వెన్బాతార్. వాండ్రు, “అయా వాండ్రు నా కణుకు మున్సు బుర్ల రాస్తాన్. నాను నొరెబాత. ఏలు నాను బేసిన”, ఇహాన్.

16 అందెజె సెగొండార్ పరిసయరు, “యా వాండ్రు దేవుణు బాణిజ్వాతికాన్ఆవెన్. ఎందానిజ్ ఇహిజ, విస్తాంతిదినమ్దు అహు కిజి వాండ్రు రూలుజ్ తప్పినాన్”, ఇహార్. గాని మరి సెగొండార్, “ఒరెన్పాపం కిజినికాన్ ఎలాగ నిసా బమ్మాని పణిజ్ కిదెజ్ అట్వాన్”, ఇహార్. ఆహె వారు కేటెజ్ ఆతార్.

17 అందెజె పరిసయరు మరి అయా గుడిదాన్ మహి వన్నిజ్, “వాండ్రు నీ కణుకునె రేక్తాన్. అందెజె నీను వన్ని వందిజ్ ఇన్నిక వెప్పిని”, ఇజి వెన్బాతార్. దనిజ్ వాండ్రు, “వాండ్రు ఒరెన్ ప్రవక్త”, ఇహాన్.

18 యా యూదురు అదికారిజు, వీండ్రు గుడిదాన్ మహాన్. వీండ్రు ఏలు రెకె ఆతండ్రె బేసినాన్ ఇజి నమ్మివితార్. అందెజె వారు వన్ని అయిసి అపొసిజ్ రప్పిస్తార్.

19 రపిస్తారె వరిజ్, “వీండ్రు మీ మరీన్నా? వీండ్రునా గుడిదాన్పుట్టాన్ఇజి మీరు వెప్పినిదెర్. అహిజ, ఏలు వాండ్రు ఎలాగ బేసినాన్?”, ఇజి వరిజ్ వెన్బాతార్. అహు వెన్బాని దాక, వాండ్రు గుడిదాన్ మహాన్. వాండ్రు నెగెణ్ఆతాండ్రె బేసినాన్ ఇజి నమ్మివీతార్.

20 వన్ని అయిసి అప్పొసిర్ వెప్టార్, “వీండ్రు మా మర్రిన్, ఇజి మాపు నెస్సాప్. వీండ్రు గుడి: దాన్పుట్టాన్ఇజి బా నెస్సాప్.

21 గాని ఏలు వాండ్రు ఎలాగ బేసినాన్ ఎయెన్వన్ని కణుకు రెక్తాన్ఇన్నిక మాపు నెన్ఎప్. వాండ్రు బుద్ది వాతికాన్గదె. వన్నిజ్వెన్బాదు. వాండ్రు వన్నిజ్జర్గితిక వెహ్హాన్”, ఇజి వెప్టార్.

22 వన్ని అయిసి అప్పొసిర్ ఆహె వెప్టార్. ఎందానిజ్ ఇహిజ వారు యూదురి అదికారిజ తియెల్ ఆతార్. యా యూదురు ఉండ్రి తిరుమానం కిత మహార్. ఎయెన్బా యేసు క్రీస్తు ఇజి ఒప్పుకోటిజ వన్నిజ్యుదురి మీటిజ్ ఇండ్రొదాన్ వెల్లి కిదెజ్ ఇజి.

23 అందెజె వన్ని అయిసి అప్పొసిర్, వాండ్రు బుద్ది వాతికాన్గదె, వన్నిజ్వెన్బాదు”, ఇజి వెప్టార్.

24 అందెజె యూదురు అతికారిజు మరిబా గుడిదాన్మహి వన్నిజ్ కూకపిస్తార్. కూకపిస్తారె, “నీను దేవుణుదిజ్ పొగిడి:జి వెహ్అ. నిజి నెగెణ్ కితాన్ ఇజి నీను వెప్పిని యా వాండ్రు పాపం కిజినికాన్ ఇజి మాపు నెసినాప్”, ఇహార్.

25 నస్తవలె వాండ్రు, “వాండ్రు పాపం కిజినికానొ సీలెనొ ఇజి నాను నెన్ఎ. ఉండ్రి నాను నెస్సు. నాను గుడి:దాన్ మహా. ఏలు నాను బేసిన”, ఇజి వెప్టార్.

26 వారు వన్నిజ్, “వాండ్రు నిజి ఇనిక కిత్తాన్? వాండ్రు ఎలాగ నీ కణుకు రెక్తాన్?”, ఇజి వెన్బాతార్.

27 అందెజె వాండ్రు, నాను ముజాలె మిజి వెప్టా మన. గాని మీరు వీన్ఇదెర్. ఎందానిజ్ మీరు మరిబా విండ్రెజ్? మీరుబా వన్ని సిసూర్ఆదెజ్ కోరిజినిదెరా?”, ఇజి వెప్టార్.

28 “నీను బా వన్ని సిసూనె. మాపు మోసె సిసూర్జ.

29 దేవుణు మోసెవెట వర్గితాన్ ఇజి మాపు నెసినాప్. గాని అయా వాండ్రు ఎమేణికాన్ ఇజి మాపు నెన్ఎప్”, ఇజి వారు వన్నిజ్నండో దూసిస్తార్.

30 అందెజె వాండ్రు ఈహు వెప్తాన్, “అబ్బు గొప్ప పణి యాక! వాండ్రు ఎమేణికాన్ ఇజి మీరు నెన్ఇదెర్ గాని వాండ్రు నా కణుకు రెక్తాన్.

31 దేవుణు పాపం కినివరి మొరొ విన్ఎన్ ఇజి మాటు నెస్సాట్. వన్నిజ్ గవరం సీజి వన్నిజ్ ఇన్టం ఆతి పణిజ్కెని వరి మొరొ వాండ్రు వినాన్.

32 యాయ పొటలోఇహానె గుడిదాన్ మహివన్ని కణుకు ఎయెన్బా ఎసెజ్బా రెక్తిక విన్ఎర్.

33 నా కణుకు రేక్తి యా వాండ్రు దేవుణు బాణిజ్వాతికాన్ ఆవ్నెఇహిజ్ నజి నెగెణ్కిదెజ్అట్ఎతాన్మరి”.

34 దన్నిజ్ వారు, “నీను పాపమ్దానె పుట్టికి. ఏలు మజి నెన్పిన్జెజ్ వాజినిదా?”, ఇజి వెప్తారె వన్నిజ్వెల్లి కితార్.

35 అయా గుడ్డిదాన్ మహివన్నిజ్ పరిసయరు వెల్లి కితార్ ఇజి యేసు విహాన్. వాండ్రు వన్నిజ్ సుడెఃతివెలె, “నీను లోకు మరిసిజ్ నమిజినిదా?”, ఇజి వెన్బాతాన్.

36 వెన్బాతిజ్ వాండ్రు, “బాబు నాను వన్నిజ్ నమిదెజ్ వాండ్రు ఎయెన్ ఇజి నజి వెహా”, ఇహాన్.

37 అయావలె ఏలు, “నీను యేలు వన్నిజ్సుడెఃతి మన్ని. వాండ్రె నీ వెట వర్గిజినికాన్”, ఇజి వెప్తాన్.

38 నస్తివలె వాండ్రు, “ప్రబువా, నాను నిజి నమిజిన”, ఇహాండ్రె యేసు పాదమ్కాజ్ ముణుకుజ్ ఊర్జి మాడిస్తాన్.

39 అందెజె యేసు, “నాను లోకురిజ్కెట కిదెజె వాత మన. గుడివారు బేస్తిజ్ బేస్సికార్ గుడిః ఆదెజ్ నాను వాత మన”, ఇహాన్.

40 నస్తివలె వన్నిజ్గరు నిహి మహి సెగొండార్ పరిసయరు వాండ్రు వెస్సినిక విహార్. విహారె, “ఇనిక? మాపు బా గుడిదికాపా?”, ఇజి వెన్బాతార్.

41 అందెజె యేసు, “మీరు గుడిఃదికిదెర్ ఇహిజ, దేవుణు మీ పాపమ్కు లెక్క కివెతాన్ మరి. గాని ‘మాపు సుడెఃజినాప్’ ఇజి మీరు

వెప్పినది. అందెజె మీ లోక పాపముకు నిహా మనె”, ఇజి వెహ్తాన్.

10

1 “గొర్రెజు సాలదు, సరిదాన్ డుగ్‌వండ, ఆజ సరిదాన్ డుగ్నికాన్ డొజారి కజరి ఆత మనాన్.

2 గాని సరిదాన్ డుగ్నికాన్ గొర్రెజ్ గవుడుఃయెన్.

3 సాలదిజ్ రెయక కాప్‌కినికాన్, వన్నివందిజ్ సేహ్లా రేనాన్. గొర్రెజ్ వన్నికంటం వెన్నె. వాండ్రు వన్నిసొంత గొర్రెజు పేరు అసి కూక్సి వన్మాజ్ వెల్లి సొప్పాన్.

4 వన్ని సొంతవనకాజ్ విజు వెల్లి సొప్తి వెనుక, గొర్రెజు ముజాల వాండ్రు నడిఃనాన్. గొర్రెజ్ వన్ని కంటం నెన్నె. అందెజె అవి వన్నివెట సొనె.

5 గాని నెన్‌ఇవన్నికంటం అవి నెన్‌ఉ. అందెజె వన్నివెట సొన్‌వండ, అవి వన్నిబాణిజ్ ఉహ్‌క్సె, ఇజి నాను నిజం మీవెట వెప్పిన.

6 యేను అబ్బె నిహిమహివరిజ్ కతవజ యాక నెన్‌పిస్తాన్. గాని వారు వాండ్రు వెప్పినదినిజ్ అర్‌దం కివ్‌తార్.

7 అందెజె వాండ్రు మరి వరివెట ఈహు వెహ్తాన్: “నాను నిజం మీవెట వెప్పిన, నానె గొర్రెజ్ సరిలెకెండ్ మన్న.

8 నా ముజాల వాతికార్ విజెరెబా డొజారి కజరి ఆత మనార్. గాని గొర్రెజ్ వరిజ్ విన్‌ఉతె.

9 నాను దేవుణుడగు సొండ్రెజ్ సరిలెకెండ్ మన్న. నా వెట డుఃగ్నికాన్ ఎయెన్‌బా నెగ్రెండ్ మంజినాన్. వాండ్రు లోక సొన్ని వెల్లి వాజి మేత మేజి మంజినాన్.

10 డొజారి డొజ కిదెజ్‌నొ, సప్తెజ్‌నొ పాడు కిదెజ్‌నొ వానాన్. మరి ఇన్నిదనిజ్‌బా రెవ్‌న్. నాను నజీ వెనివరిజ్ దేవుణువెట ఎలాకాలం బత్కిని బత్కు సీని వందిజె వాత మన్న. అయాక పూర్తి సీని వందిజె వాత మన్.

11 నాను గొర్రెజు నెగ్గి గవుడుయెన్. నెగ్గి గవుడుయెన్ గొర్రెజు వందిజ్ వన్ని పాణం సీనాన్.

12 జీతం వందిజ్ గొర్రెజ్ అడిజనికాన్ గవుడుయెన్ ఆవన్. అక్కెజ్ వన్ని సొంతగొర్రెజ్ ఆఉ. అందెజె దుమాలగొండి వాజనిక సుండెజి గొర్రెజడిసి ఉహ్కాన్. అయావలె దుమాలగొండి వన్కాజ్ అసి సెద్రిస్నాద్.

13 వాండ్రు జీతం వందిజ్ అడిజనాన్. గొర్రెజ ముస్కు వన్నిజ్ బాజిత సిల్లెద్. అందెజె వాండ్రు డిస్సు ఉహ్కాన్.

14-15 నాను గొర్రెజ నెగ్గి గవుడుయెన్. బుబ్బు నజి ఎలాగ నెసినాండ్రొ, నాను బుబ్బెజ్ ఎలాగ నెసినానొ, అయావజ నాను గొర్రెజ నెసిన. నా గొర్రెజ్ నజి నెసినె. నాను గొర్రెజవందిజ్ నా పాణం సీజిన.

16 యా మందదు మనికెజ్ ఆవండ, మరి సెగం గొర్రెజ నజి మన్నె. వన్కాజ్బా నాను పేర్జి తత్తెజ్వెలె. అవి నా కంటం వినె. అయావలె మంద ఉండ్రె ఆనాద్. గవుడుయెన్ ఒరెన్ ఆనాన్.

17 నాను మర్జి బత్కినివందిజె, నా పాణం సీజిన. అందెజె నా బుబ్బు నజి ప్రేమిస్నాన్.

18 ఎయెన్బా నా పాణం నా బాణిజ్ లాగ్విన్. నా సొంత ఇస్టమ్దానె నా పాణం సీజిన. నా పాణం సిదెజ్ నజి అతికారం మనాద్. మర్జి లాగె ఆదెజ్బా నజి అతికారం మనాద్. యా లెకెండ కిదెజ్ ఇజినె నా బుబ్బు నజి ఆడ్ర సిత్తమనాన్”.

19 వాండ్రు వెప్తి యా మాటెజవందిజె, యూదురు లొఇ ఉండ్రె ఇజి గొడెబ పుట్టాద్

20 పరి లొఇ నండొండార్, “వీండ్రు దెయం అస్తికాన్, వెరి వాండ్రు, విన్నిమాట ఎందానిజ్ వెంజినిదెర్”, ఇజి వెప్టార్.

21 మరి సెగొండార్, “దెయం అస్తికాన్ ఒరెన్ యాలెకెండ వర్గివన్. దెయం గుడిదివరిజ్ నెగెండ కిదెజ్ అట్వాదా?”, ఇజి వెప్టార్.

యూదురు యేసుజ్ నమ్మివర్.

22 అయావలె పిన్నికాలం. యెరూసలెమ్దు యూదురు దేవుణుగుడిడు బసె ఆతి దినంవందిజ్ ఎత్తుకిని పండోయ్ కిజినాల్* .

23 నస్తీవలె యేసు, దేవుణుగుడిడు మన్ని సొలోమోను అరుజు ఇజి కూకె ఆని అరుజుదు బూలాజి మహాన్.

24 అయావలె యూదురు వన్ని సుటులం ఆతారె, “ఎసోడ్ రోస్కు నీను మజి టెటాజ్ వెహ్విండ, అనుమానమ్కు ఇడజిని? నీను క్రీస్తు ఇహిజ, మజి తినాజ్ వెహ్అ”, ఇహార్.

25 అందెజె యేసు, నాను మీవెట వెప్తా. గాని మీరు నమ్మిఇదెర్. నా బుబ్బు సత్తుదాన్ నాను బమ్మాని పణిజ్ కిజిన. అయా పణిజ్ నావందిజ్ సాసి వెహ్సినె.

26 గాని మీరు నమ్మిఇదెర్. ఎందానిజ్ ఇహిజ, మీరు నా గొర్రెజ్ అఇదెర్.

27 నా గొర్రెజ్ నా కంటం వెంజినె. నాను వన్కాజ్ నెసిన. అవి నావెట వాజినె.

28 నాను వన్కాజ్ ఎలాకాలం దేవుణువెట బత్తిజిని బత్తు, సీజిన. అవి ఎసెజ్బా నాసనం ఆఉ. వన్కాజ్ ఎయెన్బా నా కీదాన్ ఒత్తెజ్ అట్ఏన్.

29 వనకాజ్ నజి సిత్తి నా బుబ్బు విజెరిజ్ ఇంక పెరికాన్. అందెజె ఎయెన్బా వనకాజ్ బుబ్బుకీదాన్ డొజి కిజి ఒత్తెజ్ అట్ఏన్.

30 నానుని నా బుబ్బు, ఉండ్రె ఆత మనాప్”, ఇజి వెప్తాన్.

31 నస్తీవలె, యూదురు వన్నిజ్ మరి డెఱియిదెజ్ ఇజి పణుకు పెప్తార్.

32 గాని యేసు వరిజ్, “నా బుబ్బు సత్తుదాన్ నండొ బమ్మ ఆని పణిజ్కిజి మిజి తోరిస్త మన్న. వనకలోఇ ఎమేణి పణి వందిజ్ నజి మీరు పణుకుజాణిజ్ డెఱియిదెర్?”, ఇజి వెప్తాన్.

33 అందెజె యూదురు, “మాపు పణుకుజాణిజ్ డెఱియిజినిక నీను కిత్తి ఇని నెగ్గి పణిజవందిజ్ ఆవద్. గాని నీను ఒరెన్ లోకుఆజి మంజి,

* 10:22 10:22 యెరుసలెం గుడి ముజాల నాసనం కిత్తార్ అయాక మరి తొప్తారె గుడిడు పార్షనం కిదెజ్ పూజెజ్ కిదెజ్ మొదొల్స్తార్. అయాకాలం ఒడెఱిజి యూదురు కిని పండోయ్ నె యా గుడిడు బసె ఆతి దినం వందిజ్ ఎత్తుకిని పండోయ్.

నాను దేవుణు ఇజి వెహె ఆజి దేవుణుదిజ్ దూసిస్సివందిజె మాపు పణుకుజాణిజ్ డెయినాప్”, ఇజి వెహెర్.

34 అందెజె వాండ్రు వరిజ్ ఈహు వెహెన్, “మీరు దేవుణుజు’ ఇజి దేవుణునె వెహెన్†, ఇజి దేవుణు మాటదు రాస్త మనాద్ గదె?

35 దేవుణు మాటదు వెహెనికెజ్ ఎసెజ్బా తప్ఉ. దేవుణు మాట సిత్తి లోకురిజ్, ‘దేవుణుజు’, ఇజి దేవుణు కూక్కినాన్.

36 బుబ్బాత్తి దేవుణునె నజి వన్ని వందిజ్ కేట కితాండ్రె యా లోకమ్దు షోక్తాన్. అహిజ, ‘నానె దేవుణుమరిసి’ ఇజి నాను వెహెన్వలె దేవుణుదిజ్ దూసిస్సాన్ ఇజి మీరు ఎలాగ వెహెనిదెర్.

37 నాను నా బుబ్బ వెహె పణికివండ మహిజ, నజి నమ్మమాట్.

38 గాని నాను కిత్తి అయా పణిజ నమ్మిదు. నజి నమ్ఇజ్బా అయా పణిజ నమ్మిదు. ఎందానిజ్ ఇహిజ, బుబ్బ నావెట కూడెజి మంజినాన్. నాను బుబ్బవెట కూడెజి మంజిన, ఇజి మీరు నెసి అర్దం కిజి మండ్రెజ్”.

39 యాకెజ్ విహరె, మరి వారు వన్నిజ్ అస్తెజ్ సుడెతార్. గాని వాండ్రు వరి కీదాన్ తపై ఆతాండ్రె సాహాన్.

40 వాండ్రు యొర్దాను గడ్డ అతాహ పడెకాద్ మన్ని ఉండ్రె బాడిదు మరిబా సాహాన్. బానె యోహాను బాప్తినం సీజి మహాన్. వాండ్రు బాన్ మహాన్.

41 నండోడార్ వన్నిడగ్రు వాతార్. వారు, “యోహాను ఇని బమ్మాని పణిబాన్ కివితాన్. గాని విని వందిజ్ యోహాను వెహె సజతిజ్ విజు నిజమనె”, ఇజి వెహెర్.

42 అబ్బె నండోడార్ యేసుముస్సు నమకం ఇడ్తార్.

11

సాతి లాజరుజ్నిక్కినాన్

1-3 బెతానియ ఇన్ని నాటో లాజరు ఇన్నికాన్ ఒరెన్మనాన్. వన్ని బీబిక్నె మార్త మరియ ఇనికెజ్. యా మరియనె యేసు పాదమకాజ్

† 10:34 10:34 కీర్తన 82:6.

అతరు ఇన్ని వాసన నూనె వాక్తాదె, దన్నికొప్పుదాన్ తెల్తాద్. ఉండ్రి నాండిజ్ లాజరుజ్ జబ్బు వాతాద్. నీరసం లావు ఆతిజ్, వన్ని బీబ్సిక్ యేసుడగ్గు కబ్బు పొక్తె, ‘ప్రబువా, నీను లావు ప్రేమ కిజిని నీకూలాయెన్ నీరసం ఆత మనాన్’, ఇజి.

4 యేసు యా కబ్బు విహండ్రి, “వాండ్రు సావీన్. సానివందిజ్ వాతిక ఆవీద్ యా నీరసం. గాని దేవుణు గొప్పు పెరికాన్ ఇజి లోకురిజ్ తోరిస్తెజ్. ఎందానిజ్ ఇహిజు, దిన్నిదటాన్ దేవుణు మరిసి గొప్పుపెరికాన్ ఇజి తోరె ఆదెజ్”, ఇజి వెప్తాన్.

5 యేసు మార్తెజ్, దన్నితజిసి మరియెజ్, లాజరుజ్ లావు ప్రేమిస్తాన్.

6 గాని లాజరు నీరసం లావు ఆతాన్ ఇజి కబ్బు విహిజ్ బా వాండ్రు బేగి సాన్ ఏతాన్. వాండ్రు మహి బాన్ మరి రుండి రోస్సుబా మహాన్.

7 వెనుక వాండ్రు వన్ని సిసూర్ జు, “రదు, మాటు యూదయ దేసమ్ దు మర్జి సానాట్”, ఇజి వెప్తాన్.

8 అయావలె వారు, “బోదకినికి, యూదురు నిజి పణకాణిజ్ డెయ్ దెజ్ సెగం రోస్సు ముజాలె సుడెతార్ గదె. మరిబా నీను అబ్బి సాండ్రిజ్ సుడెజినిదా?”, ఇహార్.

9 అందెజె యేసు, “వేడకాజ్ పన్నెండు గంటెజ్ మనె. సిలె? అందెజె ఒరెన్ వేడె బూలాతిజు, వాండ్రు తోరె ఇడెజి అర్న్. ఎందానిజ్ ఇహిజు, వాండ్రు యా లోకమ్ ది జాయి సుడెజినాన్.

10 గాని వాండ్రు రెయితు బూలాతిజు, వాండ్రు తోరె ఇడెజి అర్నాన్. ఎందనిజ్ ఇహిజు, వన్ని లోఇ జాయి సిల్లెద్”, ఇజి వెప్తాన్.

11 యాక వెప్తాండ్రి, మరి సిసూరిజ్ వెప్పినాన్, “మా కూలాయెన్ ఆతి లాజరు నిద్రకిజినాన్. వన్నిజ్ నిక్తెజ్ నాను బాన్ సాన్నిన.

12 వన్ని సిసూరు, “ప్రబువా, వాండ్రు నిద్రకిజినాన్ ఇహిజు, వాండ్రు నెగెణ్ ఆనాన్లె”, ఇహార్.

13 లాజరు సాత మనాన్ ఇజి యేసు వెప్తాన్. గాని వన్నిసిసూర్ మాముల్ నిద్రవందిజె వాండ్రు వెప్పినాన్ ఇజి ఒడిబితార్.

14-15 అందెజె వాండ్రు పరిజ్ తినాజ్ వెప్తాన్, “లాజరు సాతాన్.

అయావలె నాను వన్నివెట మన్ ఏత. అందెజె నాను మీ వందిజ్ నర్ద ఆజిన. ఎందానిజ్ ఇహిజ, మీరు నజీ నమ్మినిదెర్లె. అందెజె రదు, వన్ని బాన్ సొనాట్”, ఇజి వెహ్తాన్.

16 నస్తివలె దిదుము ఇజి కూకె ఆని తోమా మహి సిసూరిజ్, “రదు మాటు బా సొనాట్. వన్నివెట సాదెజ్ సొనాట్”, ఇహాన్.

17 యేసు వాతివలె, లాజరుజ్ సమాది కిజి నాల్లి దినమ్ కు ఆతె ఇజి నెస్తాన్.

18-19 బైతానియ యెరూసలెమ్ దాన్ ఎంజు ఇంసుమింసు రుండి మయలుజ్ దూరం మన్నె. నండొండార్ మార్తెజ్ మరియెజ్ ఓదిస్తెజ్ వాత మహార్. వరి తంబెర్ని సాతి వందిజ్, వారు ఓదిస్తెజ్ వాతార్.

20 యేసువాజినాన్ ఇజి వెహ్తి మాట విహదె, మార్త ఎద్రు సొహద్. వన్నిజ్ నుడెదెజ్ అది సొహద్. గాని మరియు ఇండ్రొ బస్త మహద్.

21 నస్తివలె మార్త యేసుజ్, “ప్రబువా, నీను ఇబ్బె మంజినిక ఇహిజ, నా తంబెరి సాఎతాన్ మరి.

22 గాని ఏలుబా నీను దేవుణుదిజ్ ఇనిక లొస్తిజ్ బా వాండ్రు నిజీ సీనాన్ ఇజి నాను నెన్ను”, ఇజి వెహ్తాన్.

23 అందెజె యేసు, “నీ తంబెర్ని మర్జి నిజ్ నాన్ లె”, ఇజి వెహ్తాన్.

24 అయావలె అది, “యా లోకమ్ దిజ్ కడఁవెరి దినమ్ దు, వాండ్రు మరి బత్కినాన్ లె ఇజి నాను నెన్ను”, ఇహాన్.

25-26 అందెజె యేసు దనిజ్ ఈహు వెహ్తాన్, “నానె సాతి వరిజ్ నిక్కికాన్. వరిజ్ మరి బత్కు సీనికాన్ నానె. నజీ నమ్మినికాన్ ఎయెన్ బా వాండ్రు సాతిజ్ బా మరి బత్కినాన్. నజీ నమ్మిజి బత్కిజిని ఎయెన్ బా ఎసెజ్ బా సావన్. నీను యాకెజ్ నమిజినిదా?”.

27 అయావలె అది, “ఒబ, నాను నమిజిన, నీనె దేవుణు మరిసి ఆతి క్రిస్తు ఇజి. నీనె యా లోకమ్ దు వాదెజ్ మన్నికాన్ ఇజి దేవుణు వెహ్తికి”, ఇజి వెహ్తాన్.

28 యాకెజ్ వెహ్తాదె, అది మర్జి సొహదె, దన్నితజీ మరియెజ్ కూక్తాదె, “బోదిస్సికాన్ ఇబ్బె మనాన్. నిజీ కూక్కినాన్”, ఇజి గిబ్బి డగ్రు వెహ్తాన్.

29 మరియు యాక విహిజ్, అది గజిబిజి నిజితాదె, వన్ని డగ్రు సాహద్.

30 అయావలె యేసు ఇంక ఆ నాటో రెఎండ్రె. మార్త వన్నిజ్ దసూల్ఆత్తి బాడిఁదనె మహాన్.

31 మార్తెజ్ ఓదరిసి దనివెట ఇండ్రె మహి యూదురు అది గజిబిజి నిజ్జి సొన్నినిక సుడఃతివలె, అది అడఃబదెజ్ దూకిదు సొన్నినాన్సు ఇజి దన్నివెనుక సాహర్.

32 యేసు మన్ని బాడిఁదు మరియు వాతాదె, వన్నిజ్సుడఃతాదె, వన్ని పాదమ్కాజ్ అర్తాద్. అర్తాదె, “ప్రబువా, నీను ఇబ్బె మంజినిక ఇహిజ, నా తంబెరి సాఎతాన్మరి”, ఇహాద్.

33 అది అడఃబాజినిక యేసు సుడఃతాన్. దని వెట వాతి యూదురు బా అడఃబాజినిక సుడఃతాన్. అయావలె వాండ్రు మన్నుదు బాద ఆతాండ్రె మొకొరి డిఃప్తాన్.

34 “వన్నిజ్ఎంబె ఇడ్డి మన్నిదెర్?”, ఇజి వరిజ్ వెన్బాతాన్. “వాజి సుడఃఅ ప్రబువా”, ఇహార్ వారు.

35 యేసు కనీర్డిఃప్తాన్

36 అయావలె యూదురు, “సుడఃదు వాండ్రు ఎసొ వన్నిజ్ప్రేమిస్తాన్”, ఇజి వెప్తార్.

37 గాని వరి లొఇ సెగొండార్, “వీండ్రు గుడిః వరిజ్ నెగెణ్కితాన్. మరి ఎందనిజ్లాజరు సావీండ కిదెజ్అట్ఎతాన్”, ఇజి వర్గితార్.

38 అయావలె యేసు నండొ బాద ఆతాండ్రె దూకిదు వాతాన్. అయాక ఉండ్రె సాలం. దన్నిముజాల ఉండ్రె పెరి పణుకు ఇడ్డ మహార్.

39 యేసు, “అయా పణుకు లాగ్దు”, ఇజి వెప్తాన్. నస్తివలె సాతివన్ని బీబ్సి మార్త వన్నిజ్, “ప్రబువా, వినిజ్ముసి నాల్లి రొన్సుఁ ఆజినాద్. అందెజె గొప్పు కంపు ఏలు మంజినాద్లె”, ఇజి వెప్తాద్

40 అందెజె యేసు దనిజ్, “నీను నమ్మితిజ, దేవుణు గొప్పు పెరికాన్ ఇజి నీను నూణిలె ఇజి నాను నిజి వెప్తా గదె?”, ఇజి వెప్తాన్.

41 అందెజె వారు పణుకు లాగితార్. యేసు కణుకు మున్ను బస్తాండ్రె, “ఓ బా నీను నా పార్లనం వెంజినిజ్నిజి వందనమ్కు.

42 నీను ఎస్తీవలె బా నజీ వెంజినీలె ఇజి నాను నెన్ను. గాని ఇబ్బె నిల్ని మంజిని యా లోకుర్ వందిజ్ నాను నిజీ వందనమ్ కు వెప్తా మన. ఎందానిజ్ ఇహిజ, నీనె నజీ పోక్తి మన్నికాన్ ఇజి వారు నమిదెజ్”, ఇజి పార్లనం కితాన్.

43 పార్లనం కితాండ్రె, వాండ్రు, “లాజరు వెల్లి రఅ”, ఇజి డేల్ని డటం వెప్తాన్.

44 అయావలె లాజరు వెల్లి వాతాన్. వన్ని కికు కాల్కు పాతెజాణిజ్ సుటిస్త మహార్. వన్ని మొకొ రూమాల్ దాన్ తొమ్మాత మహాద్. యేసు వరిజ్, “వన్నిజ్ సుటిస్త మన్నికెజ్ లాగ్ దు. వన్నిజ్ నడినిలెకెండ్ కిదు”, ఇహాన్.

యేసుజ్ నపైజ్ సుడెజినార్

45 అందెజె మరియెజ్ సుడెదెజ్ వాతి యూదురు లొఇ నండెండార్, యేసు కితిక సుడెతారె, వన్ని ముస్కు నమకం ఇట్టార్.

46 గాని వరి లొఇ సెగొండార్ పరిసయురుజ డగ్రు సొన్ని, యేసు కితిక వరిజ్ వెప్తార్.

47 నస్తీవలె పెరి పుజెరిజు నీ పరిసయురు, పెద్దల్ జ కూక్ పిస్తారె, “వాండ్రు గొప్ప బమ్మ అని పణిజ్ కిజినాన్? అందెజె మాటు ఇన్నిక కిదెజ్?”

48 మాటు వన్నిజ్ యా లెకెండ్ పణి కిదెజ్ సరి సీతిజ, లోకుర్ విజెరె వన్నిజ్ నమినార్. రోమాదికార్ వానారె, మా గుడిః, యూదురు ఆతి మజి విజు నాసనం కినార్”, ఇజి వర్గితార్.

49-50 నస్తీవలె వరి లొఇ కయపా ఇన్నికాన్ ఒరెన్ మహాన్. వాండ్రు అయా ఏంటు విజు పుజెరిజ ముస్కు పెరి పుజెరి. వాండ్రు వరిజ్, “మీరు ఇనికబా నెన్ ఇతిదెర్. రోమాదికార్ మా గుడిః, యూదురు ఆతి మజి పూర్తి నాసనం కినిదని ముస్కు లోకుర్ వందిజ్ ఒరెన్ వాండ్రు సానికాదె మిజి నెగెద్ ఇజి మీరు నెన్ ఇదెరా?”, ఇహాన్.

51-52 వాండ్రు వెహిని దని అర్లం వాండ్రె నెన్ ఎతాన్. గాని వాండ్రు ఆ ఏంటు విజు పుజెరిజ ముస్కు పెరి పుజెరి. అందెజె యేసు యూదురు వందిజ్ సానాన్లె ఇజి, యూదురు వందిజె ఆవండ, సెద్రితి

మన్ని దేవుణు కొణ్ణొరిజ్ కుడుఃప్పి తసి వరిజ్ ఉండ్రె లోకుర్కిదెజ్. దినివందిజ్ యేసు సానాన్లె ఇజి వాండ్రు ఎతు కిజి జర్గ్గ ఇ ముజాలె వెహ్హాన్.

53 అందెజె అయా నాండిజ్అసి వన్నిజ్నపైజ్ వారు సుడొఃజి మహార్.

54 అందెజె యేసు విజెరె వన్నిజ్ నెన్పిలెకెండ్ బూలాఎతాన్. గాని వాండ్రు ఎయెర్ మన్ ఇ బాడిః డగ్రు మన్ని ఉండ్రె ప్రాంతమ్దు సాహాన్. అయా ప్రాంతమ్దు మన్ని ఎప్రయెం ఇన్ని ఉండ్రె పట్టుమ్దు వన్ని సిసూర్ వెట వాండ్రు మహాన్.

55 యూదురి పస్కుపండొయ్ డగ్రు వాతివలె, నండొ ప్రాంతమ్కాణిజ్ నండొండొర్ యెరూసలెమ్దు సాహార్. పండొయ్ ముజాల విజెరె సుబ్బరం మనిక ఉండ్రె ఆసారం. అందెజె, వారు సుబ్బరం మన్నివందిజ్ వారు యెరూసలెమ్దు వాతార్.

56 వారు యేసుజ్ రెబాజినె మహార్. వారు దేవుణు గుడిః ఆరుజుదు నిహి మహివలె, ఒరెన్ వెట ఒరెన్, “ఇన్నిక ఒడొఃబిజినె? వాండ్రు పండొయ్దిజ్ వానాండ్రా, సిలెనా?”, ఇజి వర్గితార్.

57 గాని పెరి పుజెరిజు ని పరిసయురు ఉండ్రె ఆడ్ర సిత మనార్. ఎయెన్బా యేసు ఎంబె మనాన్ ఇజి నెన్పిజ, వాండ్రు వరిజ్వెహ్హాజ్. ఎందానిజ్ ఇహిజ, వన్నిజ్ అరెస్టు కిదెజ్.

12

1 పస్కుపండొయ్ మొదొల్స్తెజ్ ఆరు దినమ్కు మనె. అయావలె, యేసు లాజరు మన్ని బెతానియ ఇని పట్టుమ్దు సాహాన్. యా లాజరుజ్నె యేసుసాపుదాన్ బత్కిస్తాన్.

2 అబ్బె వారు యేసువందిజ్ ఉండ్రె వింతు తయార్ కిత్తార్. మార్తనె వింతుదు సవ్దర్ణి. బోజనమ్దిజ్ బన్తి మహివరివెట లాజరుబా యేసువెట బస్తాన్.

3 నస్తివలె, మరియ ఉండ్రె సీసాదు మన్ని వాసన నూనె లాగితాదె, యేసు పాదమ్కాజ్ వాక్తాదె దనికొపుదాన్ వన్ని పాదమ్కు తెలితాద్. యా వాసన నూనె, నండొ కరీద్తిక. యాక జటమాంసి ఇని ఉండ్రె

మొకదానె, తయార్ కితిక. అది వాసన నూనె వాక్తివెలె, అయా ఇల్లు విజు నెగ్గి వాసనందాన్ నిండ్రితాద్.

4-5 అయావలె వన్నిసిసూర్ లోఇ ఒరెన్ఆతి ఇస్కరియొతు యూద, “ఎందానిజ్ యా వాసనం నూనె మూండ్రి వందెజ్ వెండి రుపాయ్జు పొర్చి అయా డబ్బు బీదాతి వరిజ్ సిఇతి?”, ఇజి వెహ్తాన్. యా ఇస్కరియొతు యుదనె, వెన్కా యేసుజ్ యుదురి అదికారిజి కీదు ఒపజెప్పికాన్.

6 ఏలు వాండ్రు యా లెకెండ్ వెహ్తాక, బీదాతివరిజ్ నెగెండ నుడేజిన ఇజి ఆవద్ గాని వాండ్రు డోజి వాండ్రు. వరి సేవపణి వందిజ్ లోకుర్ సీజిని డబ్బు ఇడ్చి నన్ని వీండ్రి అస్త మనాన్. వాండ్రు వన్కాలోఇహాన్ వన్ని సొంత కర్చు వందిజ్ డోజి కిజి మహాన్. అందెజె వాండ్రు ఆహె వెహ్తాన్.

7 అందెజె యేసు, “దనిజ్బాద కిమాట్. నజి సమాది కిని దినమ్దాక అయాక దని బాన్మన్నిద్.

8 బీదదికార్ ఎస్తివలెబా మీ వెట మంజినార్. గాని నాను ఎలాకాలం మీ వెట మన్ఎ”, ఇజి వెహ్తాన్.

9 అహిజ, యూదుర్జి లోఇ మంద లోకుర్, యేసు బెతానియదు మనాన్ ఇజి నెస్తారె అబె వాతార్. వారు యేసుజ్ సుడేదెజ్ఇజినె ఆవండ, వాండ్రు సావుదాన్బత్కిస్తి లాజరుజ్ సుడేదెజ్బా వాతార్.

10-11 అందెజె పెరి పుజెరిజు, లాజరుజ్బా సప్తెజ్ ఇజి ఆలోసనం కితార్. ఎందానిజ్ ఇహిజ, వన్నిజ్ జర్గితి దనివందిజ్ సుడేజి యూదురు నండొండార్, వరి పెద్దలెజి డిసి యేసుముస్సు నమకం ఇడేజి మహార్.

12 మర్ననాండిజ్, పస్కు పండొయ్దిజ్ యెరుసలెం పట్టుమ్దు వాతి మందలోకుర్ యేసు యెరూసలెమ్దు వాజిమాన్ ఇజి వెహ్తార్.

13 అందెజె వారు ఈత మటెజ్ అస్తారె, పట్టుమ్దాన్ వెల్లి సొహార్. వన్నిజ్ ఎద్రు సొన్ని, “ఓసన్న ప్రబు సిత్తి అతికారమ్దాన్ వాజిని వన్నిజ్ పొగిడిపిద్. ఇస్తాయేలు లోకురిజ్ ఏలుబడి: కినిరాజుజ్ పొగిడిపిద్”, ఇజి డటం డేల్చి వెహ్తార్.

14-15 “ఓ సియోను గాల్సీ* , తియెలామాట్. ఇవిలోన్ మీ రాజు గాడఁదె పిల్ల ముస్కు ఎక్త బస్తాండ్రె వాజినాన్†”, ఇజి దేవుణు మాటదు రాస్తీ మన్నిలెకెండె, యేసు ఉండ్రీ గాడఁదె పిల్లదిజ్ సుడఁతాండ్రె దనిముస్కు బస్తాండ్రె వాజినాన్.

16 అయావలె వన్నిసిసూర్ యా జర్గితి వన్కాజ్ అర్దం కివితార్. గాని వెనకయేసు సాజి, మరి బత్కిజి, దేవుణు మంజిని బాడిఁదు వన్ని వెట గొప్ప జాయ్దు మండ్రెజ్ దేవుణు వన్నిజ్ ఒతివెలెనె, యా జర్గితి సజతిజ్ వన్నివందిజ్ దేవుణు మాటదు ముజాలె రాస్త మనాద్ ఇజి అయాక వన్నిజ్ జర్గితాద్ ఇజి వారు అర్దం కితార్.

17 అహిజ, యేసు లాజరుజ్ దూకిదాన్ కూక్కి సాపుదాన్ మరి బత్కిస్తివలె వన్ని వెట మహి లోకుర్నె, లాజరుజ్ జర్గితిక సాటిసినార్.

18 యా లోకుర్ వెహ్హి మాట విహారె, మంద లోకుర్వన్నిజ్ ఎద్దు సాన్సినార్. ఎందానిజ్ ఇహిజ, వాండ్రు బమ్మాతి గొప్ప పణిజ్ కిత్తాన్ ఇజి వెహ్హార్.

19 అయావలె పరిసయ్దురుజు వరిజ్ వారె, “ఇదిలో, నండో లోకుర్ వన్ని వెన్కా సాన్సినార్. మాటు కిజినికెజ్ ఇనికబా, వన్ని వెట సాన్ఎండ వరిజ్ ఆప్కిఉ”, ఇజి వర్గితార్.

యేసు వన్నిసావు వందిజ్ వర్గిజినాన్

20 నస్తివలె, పస్కు పండోయ్ కినివలె దేవుణుదిజ్ పొగిడిఁజి మాడిఁస్తెజ్ యెరూసలెమ్దు వాతి వరి లొఇ నెగొండార్ యూదురు ఆఇవార్ మహార్.

21 వారు గలీలయ ప్రాంతమ్ది బెత్నయిద పట్నమ్ది పిలిపు డగ్రు వాతారె, “బాబు మాపు యేసుజ్ సుడఁదెజ్ ఆస ఆజినాప్”, ఇజి వెహ్హార్.

22 పిలిపుజ్ వెహ్హిజ్, వాండ్రు ఆంద్రెయెజ్ వెహ్హన్. వీరు రివర్ కూడ్డి యేసుజ్ వరి ఆస వెహ్హార్.

* 12:14-15 12:14-15 జీకరి 9:9 † 12:14-15 12:14-15 సియోను గాల్సీ ఇజి ఇబ్బి వెహ్హినిక యెరుసలెమ్దు మన్నివరిజె.

23-24 అందెజె యేసు వరివెట ఈహు వెహ్సినాన్. “లోకు మరిసి ఆతి నజి దేవుణు వన్ని వెట వన్ని జాయిదు మండ్రెజ్ వాండ్రు మంజిని బాడిడు ఒని దినమ్కు డగ్రు ఆతె మనె. నాను నిజం వెహ్సిన ‘ఉండ్రీ గోదము గిడ బూమిదు అర్పి సాఎండ మహిజ, అది అయ లెకెండ్ మంజినాద్. గాని ఆ గిడ సాతిజ నండ్రో గిడెజ్ అనె.

25 ఎయెన్ బా వన్ని సొంత పాణమ్ దిజ్ లావు ప్రేమిస్తజి, వాండ్రు వన్ని పాణం ఎలాకాలం దేవుణు వెట బత్కిని బత్కుదు మన్ ఎండ అయాక పాడు కిజినాన్. గాని ఎయెన్ బా యా లోకమ్ దు బత్కినివలె, వన్ని సొంత పాణమ్ దిజ్ లావు ప్రేమిన్ ఏండ మహిజ, వాండ్రు ఎలాకాలం బత్కిని బత్కు వందిజ్ వన్ని పాణం కాపాడిజినాన్.

26 ఎయెన్ బా నజి సేవ కితిజ, వాండ్రు నా సిసూ ఆదెజ్ వలె. నాను ఎంబె మంజినానో, అబె నజి సేవ కినికాన్ బా మంజినాన్. నజి సేవ కిని వన్నిజ్ నా బుబ్బ గవరం సీనాన్”.

27 మరిబా వాండ్రు వెహ్సినాన్, “ఏలు నా పాణం బాద ఆజిన. నాను ఇన్నిక ఇండ్రెజ్? ఓ బా, నజి వాని కస్టమ్ దాన్ నజి తప్రెన్ అ, ఇజి వెహ్తాజా? సిలె. ఎందానిజ్ ఇహిజ, యా కస్టమ్ కు ఓరిన్ని వందిజె నాను వాత మన.

28 ఓ బా, నీను గొప్ప పెరికి ఇజి లోకురిజ్ తోరె ఆఅ”, ఇజి వెహ్తాన్. అయావలె ఆగాసమ్ దాన్ ఉండ్రీ జాటు వాతాద్. “నాను గొప్ప పెరికాన్ ఇజి నీను కితి పణిజాణిజ్ తోరె ఆత మన. నీను సాజి మరి బత్కినివలె నాను మరి అయాక తోరె ఆన”, ఇజి జాటుదు దేవుణు వర్గితాన్.

29 నస్తివలె అబె నిహి మహి లోకుర్ అయాక విహారె, అయా జాటు ఆగాసమ్ దు దీడితిక ఇజి వెహ్తార్. గాని మరి సెగొండార్, “దేవుణు మంజిని బాడిదాన్ దేవుణు దూత ఒరెన్ వన్ని వెట వర్గితాన్”, ఇహార్.

30 అందెజె యేసు, “ఏలు మీరు జాటుదాన్ విహి మాటెజ్ నజి దేవుణు పొక్తాన్ ఇజి మీరు నెస్టెజ్ మీ వందిజె వాతె. నా వందిజ్ ఆఎద్.

31 ఇయేలె, దేవుణు యా లోకమ్ ది లోకురిజ్ తీర్పు సీని సమయం. ఇయేలె లోకమ్ ది అతికారి ఆతి నయ్తూనుజ్ వన్ని అతికారమ్ దాన్ దేవుణు వెల్లి నెక్కి సమయం.

32 నజీ బూమి మున్నుహాన్ సిలువాదు ఎకిస్సివలె, విజు దేసెమ్కాణి లోకురిజ్, నాను నా డగ్రు తపిస్సాలె”, ఇజి వెప్తాన్.

33 వన్నిజ్ఎలాగ సప్నార్లె ఇజి లోకురిజ్ తోరిస్సెజ్ వాండ్రు యా మాటెజ్జర్గిని ముజాలె వెప్తాన్.

34 అయావలె మంద లోకుర్వన్నిజ్, “దేవుణు మాటదు మాపు సద్విజినావ్గదె క్రిస్తు ఎలాకాలం బత్కినాన్లె ఇజి. మరి నీను ఎలాగ వెప్పిని, లోకు మరిసి ఆతి నిజి సిలువాదు ఎకిస్సెజ్వలె ఇజి. అహిజ, నీను వెప్పిని లోకు మరిసి ఎలాగ మర్తికాన్.

35 అందెజె యేను, “వాండ్రె జాయి ఇజి వన్ని వందిజె వరిజ్ ఈహు వెప్పినాన్: “జాయి ఆతి నాను మీ వెట సెగం కాలమ్నె మంజినలె. అందెజె సీకట్వాని ముజాల, జాయ్ఆతి నాను మనివలె మీరు నజి ఇస్టం ఆని వజ నడిఃదు. సీకటుదు నడిఃనికాన్ వాండ్రు ఎంబె సాన్సినాండ్రె ఇజి వాండ్రు నెన్ఎన్.

36 అందెజె మీరు జాయ్దు బత్కిజిని నా కొడోఃఆదెజ్, జాయి ఆతి నాను మీ వెట మనివలె నజి నమ్మిదు. వాండ్రు యా మాటెజ్వెప్తాండ్రె వరిబాణిజ్ సాహండ్రె వరిజ్ తోర్ఎండ డాజ్జి మహాన్.

37 వాండ్రు నిసా గొప్ప బమ్మాతి పణిజ్ వరిఎద్దు కితిజ్బా యూదురు లోఇ నండో లోకుర్ వన్నిజ్ నమిఎతార్.

38 ‘ప్రబువా మాపు వెప్తా మాటెజ్ ఎయెర్ నమ్మితార్? ఎయెరిజ్ దేవుణు వన్నిసత్తు తోరిస్సాన్?’, ఇజి యెసయ ప్రవక్త వెప్తా మాట పూర్తిఆని వందిజె వారు నమ్మిఎతార్.

39-40 యెసయ ప్రవక్త మరి ఈహు వెప్తా మనాన్, ‘వారు వరి కణకాణిజ్ తొఎండ మండ్రెజ్ దేవుణు వరి కణకు గుడిః కితాన్. వారు వరిదాన్ అర్దం కిఎండ మండ్రెజ్ దేవుణు వరి మన్నును గటి కితాన్. వరిజ్ నెగెన్ కిదెజ్ వారు నా డగ్రు రెఎండ మండ్రెజ్ నాను అయా లెకెండ కిత”, ఇజి. అందెజె వారు యేసుజ్సీ నమ్మిదెజ్ అట్ఎండఆతార్.

41 యెసయ ఎందానిజ్ యా లెకెండ్ వెహ్తాన్ ఇహిజు, యేసు గొప్ప పెరికాన్ ఇజి వాండ్రు సుడత మహాన్. వాండ్రు వెహ్తా మాటెజ్ యేసు వందిజె వెహ్సినె.

42 గాని యూదురు అదికారిజులోఇ నండొండార్ యేసు ముస్సు నమకం ఇట్టార్. గాని పరిసయరు వరిజ్ ఇన్నిక కినార్ ఇజి తియెల్ ఆజి వారు యేసుజ్ నమ్మిజినాప్ ఇజి లోకుర్ ఎద్దు వెహ్ఎతార్. వరిజ్ యూదురి మీటిజ్ ఇండ్రొణిజ్ వెల్లి కినార్ ఇజి తియెల్ ఆతార్.

43 ఎందానిజ్ ఇహిజు, వారు దేవుణు వరిజ్ పొగిడిః దని ముస్సు లోకుర్ వరిజ్ పొగిడిఃదెజ్ ఇజి నండొ కోరితార్.

44 మరి యేసు ఈహు డటం వెహ్సినాన్, “నా ముస్సు నమకం ఇడ్డికాన్ ఎయెన్బా నజినె ఆఎండ, నజి పొక్తివన్నిజ్బా నమిజినాన్.

45 నజి సుడఃజినికాన్ ఎయెన్బా నజి పొక్తి వన్నిజ్బా సుడఃజినాన్.

46 నజి నమ్మినికాన్ ఎయెన్బా సీకట్దు బత్తిఎండ మంజిని వందిజ్ నాను జాయి లెకెండ్ లోకమ్దు వాత మన్న.

47 నా మాటెజ్ వెంజి అయావజి కిఇవన్నిజ్, తీర్పు సీజినాను సిక్కు సివి. ఎందానిజ్ ఇహిజు, ఆహె తీర్పు సీజి సిక్కు సీదెజ్ ఆవిద్ నాను అయా లోకమ్దాన్ వాతిక. గాని లోకురిజ్ రక్కిన్ని వందిజె వాత.

48 నజి నెక్కి పొక్కి నా మాటెజు వజి కిఇవన్నిజ్, వాండ్రు కిఇకాదె వన్నిజ్ ఎలాకాలం మన్ని సిక్కు సీనాద్. నాను వెహ్తా మాటెజ్నె ఆకార్ దినమ్దు నాను మర్జి వానివలె వన్నిజ్ తీర్పు సీనాద్.

49 ఎందనిజ్ ఇహిజు, నాను నా సొంత అతికారమ్దాన్ వెహ్తాక ఆవిద్. గాని నజి పొక్తి నా బుబ్బనె, నాను ఇన్నిక వెహ్తాజ్, ఎలాగ వెహ్తాజ్ ఇజి ఆడ్రు సిత మనాన్.

50 వాండ్రు వెహ్తా ఆడ్రెజ్ లోజిజినికాన్ ఎలాకాలం బత్తినాన్. అందెజె నా బుబ్బ నజి వెహ్అ ఇజి వెహ్కెజ్నె నాను వెహ్సిన.

13

యేసు వన్నిసినూరిజ్ పాదమ్కు నొర్జినాన్

1 నస్తివలె, పస్కు వండోయ్ కిని ముజాహి దినం. యా లోకం డిఃసి బుబ్బు డగ్రు సొండ్రెజ్ టయం ఆతాద్ ఇజి యేసు నెస్తాన్. వాండ్రు ఎస్తివలెబా వన్ని ముస్కు నమకం ఇడ్డివరిజ్ ప్రేమిసి మహాన్. వాండ్రు సొనిదాక ప్రేమిసినె మహాన్.

2 యేసుని వన్ని సిసూరు ఫొదోయ్ బోజనమ్దిజ్ బస్త మహార్. సిమొను మరిసి ఆతి ఇస్కరియొతు యూద మన్నుదు సర్హూను ముజాలె ఉండ్రె ఆలోసన పుటిస్త మహాన్, యేసుజ్ సెఇవరి కీదు ఒపజెప్తెజ్ ఇజి.

3 బుబ్బు వన్నిజ్ విజు దనిముస్కు అతికారం ఒపజెప్త మహాన్, ఇజి యేసు నెస్తాన్. వాండ్రు దేవుణుబాణిజ్ వాత మహాన్, దేవుణుడగ్రు సొస్సినాన్ ఇజిబా నెస్తాన్.

4 అందెజె వాండ్రు బీజనమ్దిజ్ బస్తి మహిబాణిజ్ నిజితాండ్రె, వాండ్రు పిడెఃగితి మన్ని సొల్వ లాగితాండ్రె ఉండ్రె తువాలు నడుముదు తొహె ఆతాన్.

5 తొహెండ్రె, ఉండ్రె పల్లెమ్దు ఏరు వాక్తాండ్రె వన్ని సిసూర్ పాదమ్కు నొరజి వన్ని నడుముదు తొహెతి మహి తువాలదాన్ వరి పాదమ్కు తేల్జినాన్.

6 ఆహె, వాండ్రు సిమొను పెతురుడగ్రు వాతివలె, వాండ్రు, “ప్రబువా, నీను నా పాదమ్కు నొరదెజ్ సుడెఃజినిదా?”, ఇజి వెన్బాతాన్.

7 అందెజె యేసు, “నాను ఇనిక కిజిన ఇజి ఏలు నీను నెన్ఇ గాని వెనుక నీను అర్దం నెస్తిలె”, ఇజి వన్నిజ్ వెప్తాన్.

8 అయావలె పేతురు, “సిల్లె, నీను నా పాదమ్కు ఎసెజ్బా నొరదెజ్ ఆవిద్”, ఇజి వెప్తాన్. దనిజ్యేసు, “నాను నీ పాదమ్కు నొరెవిండమహిజ, నీను నా సిసూడు అఇ”, ఇజి వెప్తాన్.

9 అయావలె సిమోన్ పేతురు, “అహిజ ప్రబువా, నా పాదమ్కునె ఆవిండ నా కికు, నా బుర్రబా నొరెఅ”, ఇజి వెప్తాన్.

10 అందెజె యేసు, “ఏరుఈబతి వన్నిజ్ వన్నిఒడెఃల్ విజు నొరదెజ్ అవ్సరం సిల్లెద్. వన్ని పాదమ్కునె నొరదెజ్. ఎందానిజ్ ఇహిజ,

పాదమకునె వెటనె డుల్లిఅనె. నా సినూర్ ఆత్తి మీరు విజెదెరె సుబ్రరం ఆత్తిదెర్. గాని ఒరెన్ ఆవన్”, ఇజి వెహ్హన్.

11 వన్నిజ్సెసెఇవరి కీదు ఒపజెప్పికాన్ ఎయెన్ ఇజి వాండ్రు నెసి మహాన్. అందెజె ‘మీరు విజెరె సుబ్రరం ఆత్తికిదెర్ ఆఇదెర్’, ఇజి వాండ్రు వెహ్హన్.

12 వరి పాదమకు నొర్జి వీస్తి వెన్కా, వాండ్రు లాగితి ఇడ్డి వన్ని సాల్వ వ్డెఃగితాండ్రె, బోజనమ్దిజ్ బస్తిమహి బాడిఃదు సాహాన్. సాహాండ్రె వాండ్రు వరిజ్ వెన్బాజినాన్, “నాను ఏలు మిజి కితిపణిది అర్దం మిజి తెలినాదా?

13 మీరు నజి కూక్కివలె, ‘ఓ బోదకినికి’ ఇజినో, ‘ఓ ప్రబువా’ ఇజినో కూక్కినిదెర్. నాను బోదకినికానె. ప్రబునె. అందెజె మీరు కూక్కినిక తప్పు సిల్లెద్.

14 ఏలు మీ ప్రబు ఆతి, బోదకినికి ఆతి నాను నీ పాదమకు నొర్త మన్న. అందెజె మీరుబా ఒరెన్ మరి ఒరెన్ వన్ని పాదమకు నొర్దెజ్.

15 నాను మిజి కితిలెకెండ్ మీరు బా కిని వందిజ్, అయా పణి ఎలాగ కిదెజ్ఇజి నాను మిజి తోరెస్త మన్న.

16 నాను నిజం వెహ్హిన, ఎమేణి పణి మన్నిసి బా వన్ని ఎజుమాని ముస్సు పెరికాన్ ఆవన్. అయ లెకెండ్ ఎమేణి కబ్బు తనికాన్బా వన్నిజ్పోక్తి వన్ని ముస్సు పెరికాన్ ఆవన్.

17 మీరు ఏలు యా నిజమాతి నజతిజ్ నెస్తిదెర్. అందెజె మీరు అయా లెకెండ్కితిజ మీరు గొప్పు వారు”.

యేసు వన్నిజ్ సెఇవరికీదు ఒపజెప్పి దనివందిజ్ జర్రినిముజాలె వెహ్హినాన్

18 “మీరు పాపమ్కాణిజ్నొరె ఆత్తిదెర్ ఇజి నాను వెహ్హినిక మీ విజెరె వందిజ్ ఆవద్. నాను ఏర్పాటు కితికార్ ఎలాగ మర్రికార్ఇజి నాను నెన్న. గాని, ‘నా వెట బోజనం ఉణిజి మహికాన్నజి ప్డెఃఇకాన్ ఆతాన్’, ఇజి దేవుణు మాటదు రాస్తి మన్ని మాట పూర్తి అదెజ్ నాను యా లెకెండ్ కిత్త.

19 అయాక జర్గినివలె, నానె మెనయ ఇజి మీరు నమినివందిజె, అయాక జర్గిని ముజాల, యెలె నాను వెహ్సిన.

20 నాను నిజం వెహ్సిన, ఎయెన్బా నాను పోక్కివన్నిజ్డగ్గు కితిజ, వాండ్రు నజి డగ్గు కితి లెకెండ్. ఎయెన్బా నజి డగ్గు కితిజ, నజి పోక్కి వన్నిజ్డగ్గు కితి లెకెండ్”, ఇహాన్.

21 యేసు యాక వెహ్సినవలె వన్ని మన్నుదు బాద ఆతండ్రె, “నాను నిజం వెహ్సిన, మీ లోఇ ఒరెన్ నజి సెఇవరి కీదు ఒపజెహ్సాన్లె”, ఇజి వెహ్సాన్.

22 అయావలె వన్ని సిసూర్ ఎయెన్వందిజ్ వాండ్రు ఈహు వెహ్సాన్ ఇజి అర్దం ఆఇతిజ్ ఒరెన్ మొకొ ఒరెన్సుడెః ఆజినార్.

23 బోజనమ్దిజ్ బస్తి మహివలె, సిసూర్ లోఇ యేసు నండొ ప్రేమిస్తి సిసూ వన్ని డగ్గునె బోజనమ్దిజ్ బస్త మహాన్.

24 సిమోన్ పేతురు వన్నిజ్ నయ్న కిజి, “ఎయెన్ వందిజ్ వాండ్రు వర్గిజినాన్ఇజి వన్నిజ్ వెన్బాఅ”, ఇజి వెహ్సాన్.

25 అందెజె అయా సిసూడుః యేసుజ్ రోన్పె ఆజి, “ప్రబువా, వాండ్రు ఎయెన్?”, ఇజి వెన్బాతాన్.

26 అందెజె యేసు, “నాను యా రొటె ముక పులాదు ముడుక్కి ఎయెన్సినానొ వాండ్రె నజి ఒపజెప్పికాన్”, ఇజి వెహ్సాన్. వెహ్సాండ్రె ముక పులాదు ముడుక్కి సిమొను మరిసి ఆతి ఇస్కరియొతు యుదెజ్ సిత్తాన్.

27 యూద అయా రొట్టెముక్క తిహి వెటనె సయ్తాను వన్ని లోఇ డుగితాండ్రె వన్ని ముస్కు అతికారం కితాన్. అయావలె యేసు, “నీను కిదెజ్ ఒడఃబిజినిక బేగి కిత”, ఇజి వెహ్సాన్.

28 గాని బోజనమ్దిజ్ బస్తివరి లోఇ ఎయెరిజ్బా ఎండానిజ్ యేసు ఆహె వెహ్సాన్ ఇజి అర్దం ఆవీతాద్.

29 వరి కర్నువందిజ్ మన్ని డబ్బు విజు యూద కీదునె మనె. అందెజె పండొయ్దిజ్ కావాలిస్తికెజ్, సొన్ని కొల్అ ఇజిను, సిలిజ బీదాతివరిజ్ డబ్బు సిఅ ఇజి వెహ్సినాన్సు ఇజి సిసూర్ సెగొండార్

ఒడిఃబితార్.

30 యూద ఆ రొట్టెముక్క తిహివెటనె వెల్లి సొహాన్. అక్క రెయు.

31 వాండ్రు సొహి వెన్కా యేను ఈహు వెహ్లాన్, “లోకు మరిసి ఆతి నాను ఎసొ గొప్ప పెరికాన్ ఇజి లోకుర్ ఏలునూణార్లె. దేవుణు ఎసొ గొప్ప పెరికాన్ ఇజి నా వెట నూణార్లె.

32 దేవుణు గొప్ప పెరికాన్ ఇజి లోకు మరిసి వెట తోరె ఆతిజ, లోకు మరిసి గొప్ప పెరికాన్ ఇజి దేవుణునె తోరిస్సాన్. అయాక వెటనె తోరిస్సాన్.

33 నాను ప్రేమిస్సికిదెరా, కండెక్ సమయమ్నె నాను మీ వెట మంజిన. మీరు నజీ రెబానిదెర్, గాని యూదురు అదికారిజి నాను వెహ్లా లెకెండ, “నాను సొని బాడిఃదు మీరు వాదెజ్ అట్ఇదెర్” ఇజి ఏలు మీవెట వెహ్లాన్.

34 నాను కొత్త ఆడ్ర మిజి సీజిన. మీరు ఒరెన్ మరి ఒరెన్ వన్ని వెట ప్రేమిన్అ, ఇజి. నాను మిజి ప్రేమిస్తిలెకెండ మీరు బా ఒరెన్ వన్ని వెట ఒరెన్ ప్రేమిస్తిజ్వలె.

35 మీరు ఒరెన్ వన్ని వెట ఒరెన్ ప్రేమిస్తిజి, మీరు నా సిసూర్ ఇజి లోకుర్ విజెరె నెస్సార్.

36 అయావలె సిమోన్ పేతురు, “ప్రబువా, నీను ఎంబె సొన్సిని?”, ఇజి వెన్బాతాన్. వెన్బాతిజ్ యేను, “నాను ఏలు సొని బాడిఃదు నీను ఏలు వాదెజ్అట్ఇ. గాని వెన్కా వానిలె”, ఇజి వెహ్లాన్

37 అందెజె పేతురు, “ప్రబువా, ఎండానిజ్ నాను ఏలు మీ వెట వాదెజ్ అట్ఇ. నీ వందిజ్ సాదెజ్బా నాను తయార్నె”, ఇజి వెహ్లాన్.

38 అందెజె యేను, “నా వందిజ్ సాదెజ్బా నీను నిజం తయార్నెనా? కొరు కెరెని ముజాలె, ‘నీను నజీ నెన్ఏ’ ఇజి ముసార్ వెహ్లాన్”, ఇజి వెహ్లాన్.

14

యేను వన్ని సిసూరిజ్ దయరం సీజినాన్

1 యేసు మరిబా వన్ని సిసూరిజ్ వెహ్సినాన్, “మీ మన్సుదు తియెల్ ఆజి బాద ఆమాట్. దేవుణు ముస్సు. నమకం ఇడ్డిదెర్. నా ముస్సుబా నమకం ఇడ్డెదు.

2 పరలోకమ్దు నా బుబ్బ ఇండ్రొ నండొ గదిజ్మనె. అయ లెకెండ్ సిల్లెండ మహిజ, నాను మిజి వెహ్తా మరి. మిజి ఉండ్రీ బాడిః తయార్కిదెజ్ నాను అబ్బె సొన్నిన.

3 నాను సొన్ని మిజి ఉండ్రీ బాడ్డి తయార్ కితి వెనుక, నాను మరజివాజి నావెట నాను మంజినిబాన్ మీరుబా మండ్రెజ్, కూక్కు ఒనాలె.

4 నాను సొన్నిని బాడిఃదు సొండ్రెజ్ సరి మీరు నెస్సిదెర్”, ఇజి వెహ్తాన్.

బుబ్బడగు సొండ్రెజ్ నానెసరి ఇజి వెహ్సినాన్

5 అయావలె తోమా వన్నిజ్, “ప్రబువా, నీను ఎంబె సొన్నిని ఇజి మాపు నెస్విప్. అందెజె సరి మాపు ఎలాగ నెస్టెజ్ ఆనాప్?”, ఇజి వెహ్తాన్.

6 అందెజె యేసు వన్నిజ్, “నానె బుబ్బ డగు సొండ్రెజ్ సరి. నానె బుబ్బ వందిజ్ నిజమాతికెజ్ తోరిసి నెస్పిస్నాన్. నానె ఎలాకాలం దేవుణు వెట బత్కిని బత్కు సీనికాన్. నా వెటనె లోకుర్ విజెరె బుబ్బడగు సొనార్.

7 నాను ఎయెన్ ఇజి మీరు నెస్తి మహిదెర్ఇహిజ, నా బుబ్బ ఎయెన్ఇజిబా మీరు నెస్తిదెర్మరి. ఏలుదాన్ మీరు వన్నిజ్నెస్తి మనిదెర్, సుడిఃతి మనిదెర్”, ఇజి వెహ్తాన్.

8 నస్తివలె పిలిపు, “ప్రబువా, బుబ్బెజ్ మజి తోరిస్అ. ఆకాదె మజి సాలు”, ఇజి వన్నిజ్ వెహ్తాన్.

9 అందెజె యేసు వన్నిజ్, నాను నిసా కాలం మీ వెట మహా. మహిజ్బా నీను నజి నెస్ఇదా పిలిపు? నజి సుడిఃతికాన్ ఎయెన్బా నా బుబ్బెజ్ సుడిఃత మనాన్. అయావలె బుబ్బెజ్మజి తోరిస్అ ఇజి ఎలాగ నీను వెహ్తాజ్ అట్సిని?

10 నాను నా బుబ్బు వెట కూడిత మన. బుబ్బు నా వెట కూడిత మనాన్ ఇజి నీను నమ్మదా? నాను మీ వెట వెప్పిని మాటెజ్నా సొంత మాటెజ్ ఆడ. గాని నా వెటకూడితి మన్ని బుబ్బు బాణిజ్ వాతికెజె అయాకెజ్. వాండ్రు వన్ని పణిజ్ నావెట కిబిసినాన్.

11 నాను నా బుబ్బు వెట కూడిత మన, బుబ్బు నా వెట కూడిత మనాన్ ఇజి నాను వెప్పినిక మీరు నమ్మిదు. సిలిజ, నాను కిజిని విజు బమ్మ ఆని పణిజ సుడేజి అయాక నమ్మిదు.

12 నాను నా బుబ్బు డగ్రు సొన్నిన. అందెజె నజి నిజం నమ్మితికాన్, నాను కిజిని బమ్మ ఆని పణిజ్ వాండ్రు బా కినాన్. ఒబ, దనిజ్ ఇంక లావు పణిజ్ వాండ్రు కినాన్ ఇజి మీ వెట నిజం ఇక వెప్పిన.

13 నా ఇస్టమ్ దిజ్ కూడితి మన్ని ఇనికబా మీరు లొస్తిజ, నాను అయాక కిన. బుబ్బు గొప్ప పెరికాన్ ఇజి లొకురిజ్ తొరెస్తిజె, మరిసి ఆతి నాను అయాక కిన.

14 నా ఇస్టమ్ దిజ్ కూడితి మన్ని ఇనికబా మీరు లొస్తిజ, నాను అయాక కిన.

15 మీరు నజి ప్రేమిస్తిజ, నా ఆడ్రెజ్ మీరు వెనిదెర్.

16 నాను బుబ్బెజ్ లొస్ను. మీ వెట ఎలాకాలం మండ్రెజ్ మరి ఒరెన్ తోడు: మంజిని వన్నిజ్ బుబ్బు మిజి సినాన్.

17 వాండ్రు దేవుణు బాణిజ్ నిజమాతికెజ్ వెప్పిని దేవుణు ఆత్మ. క్రీస్తుజ్ నమ్మిఇకార్ ఒరెన్ తోడు: మంజిని వన్ని వజ వన్నిజ్ డగ్రు కిదెజ్ అట్ ఏర్. ఎందనిజ్ ఇహిజ, వారు వన్నిజ్ రెబా ఏర్. వన్నిజ్ నెస్ ఏర్. గాని మీరు వన్నిజ్ నెస్సిదెర్. ఎందానిజ్ ఇహిజ, వాండ్రు మీ వెట మంజినాన్. మీ లొఇ మంజినాన్.

18 నాను మిజి డిసి సొనివలె, మిజి దిక్కు. సిలి వరి లెకెండ్ డిసి ఎ. నాను మర్జి మీ డగ్రు వానాలె.

19 సెగం కాలం వెన్కా, నజి నమ్మిఇకార్ నజి మరి తొ ఏర్లె. గాని మీరు నజి సూణిదెర్. నాను బత్తిజిన. అందెజె మీరుబా బత్తినిదెర్.

20 నాను నా బుబ్బువెట కూడిత మన్న, మీరు నా వెట కూడితి మనిదెర్. నాను మీ వెట కూడిత మన ఇజి దేవుణు ఆత్మ మీ నడిమి

మంత్రెజ్ వాని దినమ్ దు మీరు నెస్సిదెల్లె.

21 నా ఆడ్రెజ్ వెంజి అయావజ కినికానె నజి ప్రేమిస్సికాన్. నజి ప్రేమిస్సి వన్నిజ్ నా బుబ్బ ప్రేమిస్సాన్. నాను వన్నిజ్ ప్రేమిసి వన్నిజ్ తోరె ఆన”, ఇజి యేసువెహ్తాన్.

22 నస్తివలె ఇస్కరియోతు యూద ఆఇ మరి ఒరెన్ యుద, “ప్రబువా నీను లోకురిజ్ విజెరిజ్ తోరె ఆవండ, ఎలాగ నీను మజి తోరె ఆనిలె?”, ఇజి వెన్ బాతాన్.

23 అందెజె యేసు, “ఒరెన్ నజి ప్రేమిస్తిజ, వాండ్రు నా మాటెజ్ వినాన్. అయావలె నా బుబ్బ వన్నిజ్ ప్రేమిస్సాన్. నా బుబ్బని నాను వన్నిడగ్రు వాజి వన్నివెట మంజినాప్.

24 నజి ప్రేమిస్ ఇకాన్, నా మాటెజ్ వినవన్. మీరు వెంజిని యా మాటెజ్ నా సొంత మాటెజ్ ఆఉ. నజి పోక్తి నా బుబ్బవిని.

25 నాను మీవెట మంజినె యా మాటెజ్ వెహ్తా మన్ను.

26 నా బుబ్బ, నా బదులు తోడుః మంజిని వన్నిజ్ ఇహిజ, దేవుణు అత్తడిజ్ పోక్తివెలె, వాండ్రు మిజి దేవుణు వందిజ్ విజు సజతిజ్ నెస్ పిస్సాన్. నాను మిజి వెహ్తా విజు వన్యాజ్ ఎత్తు కిబిసి మంజినాన్.

27 నాను మిజి డిసి సొన్ సిన. గాని మీరు సమాదనమ్ దాన్ మంజినిదెరెలె. అయా సమాదనం నా బాణిజ్ వాజినాద్. నజి సమ్మిఇ లోకురిజ్ మన్ని సమాదనం ననికాద్ ఆవద్ నా బాణిజ్ వాజినికాద్. మీ మన్నుదు విసారిసి బాద ఆమాట్. మీరు తియెల్ ఆమాట్.

28 ‘నాను సొన్ సిన. మర్జి మీ డగ్రు వానాలె’, ఇజి నాను వెహ్తా మాట మీరు విహిదెర్. నా బుబ్బ నజి ఇంక పెరికాన్. అందెజె మీరు నజి నిజం ప్రేమిస్తిజ, వీండ్రు బుబ్బ డగ్రు సొన్ సినాన్ ఇజి సరద్ అజినిదెర్.

29 యాకెజ్ జర్గినివలె, నాను వెహ్తాకెజ్ నిజం ఇజి మీరు నమ్మిని వందిజె, అయాకెజ్ జర్గిని ముజాల, ఇయేలె నాను మిజి వెహ్తా మన్ను.

30 మరి నండొ సమయం మీ వెట వర్గిదెజ్ నాను అట్ వలె. ఎందానిజ్ ఇహిజ, యా లోకమ్ ది అతికారి ఆతి సయ్తాను వాజినాన్. నా మున్ను వన్నిజ్ ఇన్ని అతికారం సిల్లెద్.

31 గాని, నాను నా బుబ్బెజ్ ప్రేమిన్ను. అందెజె వాండ్రు వెహ్నినికెజ్ విజు అయాపజ నాను కిజిన ఇజి లోకమ్దికార్ నెస్తెజ్వలె. రదు, ఇబ్బెణిజ్ సొనాట్”, ఇజి వెహ్నన్.

15

1 నాను నిజమాతి ద్రాక్కుబడ్డుదిజ్ మొదోల్. నా బుబ్బు పణికినికాన్.

2 నా వెట కూడితి మన్ని పట్టు అన్ఇ విజు కొనెజ్ వాండ్రు కత్నాన్. పట్టుఅన్ని విజు కొనెజ్, మరి నండో పట్టు అన్నివందిజ్ తెప్పాన్.

3 నాను మీవెట వెహ్ని మాటెజ్, మీ పాపమ్కాణిజ్ సుబ్బరం కిత్తె మనె.

4 నాను మీ వెట కూడిజి మంజినిలెకెండో మీరు నా వెట కూడిజినె మండ్రు. ఇన్ని కొనెజ్బా బడ్డుదు మన్ఏండో మహిజ, అవి పట్టు అన్ఉ. పట్టు అస్తెజ్ఇహిజ, అవి బడ్డుదు మండ్రెజ్వలె. అయాలెకెండో, నావెట కూడితి మహిజనె, మీరు పట్టు అన్నిదెర్.

5 నాను ద్రాక్కుబడ్డుదిజ్ మొదోల్. మీరు కొనెజ్. ఎయెన్బా నా వెట కూడిజి మంజి, నాను వన్ని వెట కూడితి మహిజ, వాండ్రు నండో పట్టు అన్నాన్. నాను సిల్లెండ, నజి ఇస్తం ఆతి నెగ్గికెజ్ ఇనికెజ్బా మీరు కిదెజ్ అట్ఇదెర్.

6 వెల్లి విసీర్తి ఉండ్రె కొన వహ్ని లెకెండో, నా వెట కూడిజి మన్ఇకాన్మనాన్. వాండ్రు వెల్లి ఆజి వహ్నాన్. నన్ని కొనెజ, లోకుర్ కుంబ కిజి సుర్నార్. ఆకెజ్ వెయనె.

7 మీరు నావెట కూడిజినె మంజి నాను వెహ్నిక మీ లోఇ మహిజ, ఇనికబా మీరు దేవుణుదిజ్ లొస్తు. వాండ్రు అయాక మిజి సీనాన్.

8 మీరు నండో పట్టు అసి ఆహె నా సిసూర్ఇజ తోరె ఆతిజ, నా బుబ్బు గొప్ప వెరికాన్ ఇజి లోకురిజ్ తోరిసినిదెర్.

9 నా బుబ్బు నజి ప్రేమిన్ని లెకెండో, నాను మిజి ప్రేమిన్ను. నాను మిజి ప్రేమిన్ని వందిజ్, నా వెట కూడిజినె మండ్రు.

10 నాను నా బుబ్బు వెహ్తా ఆడ్రెజ్ లోజిత మన. వాండ్రు నజీ ప్రేమిస్నాన్. అయాలెకెండ్ మీరు నాను వెహ్తా ఆడ్రెజ్ లోజీతిజ, నాను మిజీ ప్రేమిసినె మంజిన.

11 నజీ మన్ని సర్ద మిజీ బా మండ్రెజ్, మీ సర్ద పూర్తి ఆదెజ్, ముజాలె వెహ్తా యా మటెజ్ నాను మిజీ వెహ్తా మన్ను.

12 నాను మిజీ ప్రేమిసివజ, మీరు ఒరెన్ వన్ని వెట ఒరెన్ ప్రేమిసి మండ్రు ఇజినె నా ఆడ్ర.

13 ఒరెన్ వన్ని కూలెజ వందిజ్ వన్ని సొంత పాణం సీనికాదె నండో ప్రేమ. దిని ఇంక మిస్తి మరి ప్రేమ సిల్లెద్.

14 నాను ఆడ్ర సీతిక మీరు కితిజ, మీరు నా కూలెజె.

15 ఒరెన్ పణికినికాన్, వన్ని ఎజుమాని కిని పణిజ్ నెస్ఎన్. అందెజె నాను మరి ఎసెజ్ మిజీ పణికినికార్ ఇజి కూక్ ఏ, గాని కూలెజ్ ఇజి కూక్ మన. ఎందనిజ్ ఇహిజ, నాను నా బుబ్బు బాణిజ్ విహికెజ్ విజు మిజీ వెహ్తా మన్ను.

16 మీరు నజీ ఏర్పాటు కిఇదెర్. గాని నాను మిజీ ఏర్పాటు కిత్త. పట్టు అస్సివజ, మీరు సొన్ని లోకురిజ్ నువార్త వెహ్తా దేవుణు దరొట్ మహ్సి తని వందిజె నాను మిజీ ఏర్పాటు కితానె పోక్సిన. మీరు అస్తి పట్టు ఎలాకాలం మంజినాద్. అయావలె మీరు నా ఇస్టమ్దిజ్ కూడితి మన్ని ఇనికబా బుబ్బెజ్ లొస్తిజ, వాండ్రు సీనాన్.

17 మీరు ఒరెన్ వన్నివెట ఒరెన్ ప్రేమిస్టెజ్ ఇజినె నాను సీజిని ఆడ్ర.

18 యా లోకమ్దు మన్ని దేవుణుదిజ్ దూసిస్సికార్, మిజీ దూసిస్తిజ, మీరు ఒడిబిదు వారు మిజీ దూసిస్సి ముజాలె నజీ దూసిస్టార్ ఇజి.

19 మీరు యా లోకమ్దు మన్ని దేవుణుదిజ్ దూసిస్సి వరిలోఇ మన్నికిదెర్ ఇహిజ, వరి సొంత లోకుర్వజ వారు మిజీ ప్రేమిస్టార్ మరి. గాని నాను వరి లెకెండ్ మీరు మన్ఎండ, మిజీ ఎర్లిస్త. అయావలె, మీరు వరి లోఇ మన్నికిదెర్ ఆఇదెర్. అందెజె వారు మిజీ దూసిసినార్.

20 ఎమేణి పణిమణిసిబా వన్ని ఎజుమాని ముస్కు పెరికాన్

అవ్‌న్*’, ఇజి నాను వెప్తి మాట మీరు ఎత్తు కిదు. వారు నజీ హిమ్మెజ్ కితార్ ఇహిజ, మిజీ బా హిమ్మెజ్ కినార్. వారు నా మాటెజ్ లోజితార్ ఇహిజ, మీ మాటెజ్ బా లోజినార్.

21 మీరు నజీ నమ్మితి వందిజ్ వారు యా లెకెండ విజు మిజీ కినార్. ఎందానిజ్ ఇహిజ, వారు నజీ పోక్తి వన్నిజ్ నెన్‌వర్.

22 నాను వాజి దేవుణు వందిజ్ నిజమాతికెజ్ వరిజ్ వెహ్‌ఎండ మంజినిక ఇహిజ, వారు పాపమ్‌కు కితార్ ఇజి దేవుణు వరిజ్ సుడఃఏతాన్ మరి. అహిజ, ఏలు వారు వరి పాపమ్‌కాణిజ్ తప్రె ఆదెజ్ అటవర్. ఎందానిజ్ ఇహిజ, నాను వరిజ్ వెప్తా మన్ను.

23 నజీ దూసిస్సికాన్‌నా బుబ్బెజ్ దూసిసినాన్.

24 ఎయెన్‌బా కిఇ బమ్మాని పణిజ్ నాను వరి నడిఃమి కివండ మంజినిక ఇహిజ, వారు పాపమ్‌కు కితార్ ఇజి దేవుణు వరిజ్ సుడఃఏతాన్ మరి. గాని ఏలు వారు యా బమ్మ ఆని పణిజ్ సుడఃత మనార్. అహిజ్‌బా, నజీ ని నా బుబ్బెజ్ వారు దూసిస్తాన్ మనార్.

25 ‘ఇని కారణంబా సిల్లెండ వారు నజీ దూసిస్తార్’, ఇజి దేవుణు మాటదు రాస్తి మన్ని మాట పూర్తి అదెజె యా లెకెండ వారు కిజినార్.

26 నాను మీ డగ్గు తోడుః మంజిని వన్నిజ్ ఇహిజ, దేవుణుబాణిజ్ నిజమాతికెజ్ వెహ్‌ని తోరిస్సి దేవుణు ఆత్మెజ్ పోక్కు. వాండ్రు బుబ్బ బాణిజ్ మీ డగ్గు వానాన్. అయావలె నా వందిజ్ విజు వాండ్రు వెహ్‌నాన్.

27 నాను సేవ మొదొల్స్తి బాణిజ్ మీరు నావెట మనిదెర్. అందెజె మీరు బా నా వందిజ్ విజెరిజ్ వెహ్‌జ్‌వలె.

16

1 “మిజీ ఇమ్‌సెజ్ కినివలె, మీరు నమకం దాన్‌డిఃన్‌ఎండ మంజిని వందిజె, మిజీ దూసిస్సికార్ కిని సజతిజ వందిజ్ నాను వెప్తా.

2 వారు మిజీ యూదురి మీటిజ్ ఇల్కాణిజ్ వెల్లి కినార్. మిజీ సమ్మికాన్‌ఎయెన్‌బా, వాండ్రు దేవుణుదిజ్ సర్ద కిజిన ఇజి ఒడిఃబిని కాలం వాజినె.

* 15:20 15:20 13:16 సుడఃదు

3 వారు నన్నికెజ్ కినార్. ఎందనిజ్ ఇహిజ, బుబ్బెజ్ నొ నజినొ నెస్వర్.

4 అయ కాలం వానివలె, నాను దినివందిజ్ వెహ్తా మన ఇజి మీరు ఎత్తుకిని వందిజ్ నాను యాక మీ వెట వెహ్తా మన. నాను యాకెజ్ ముజాలె మిజి వెహ్తాజ్ సితె. ఎందానిజ్ ఇహిజ, నాను మీవెట మహా”.

దేవుణు ఆత్మ కిని పణిజ్

5 “ఏలు నాను నజి పొక్తి వన్ని డగ్రు సొన్నిన. గాని మీ లొఇ ఎయెన్ బా, ‘నీను ఎంబె సొన్నిని?’, ఇజి నజి వెన్ బా ఇదెర్”.

6 నాను యా సజతిజ్ మిజి వెహ్తా మనిజ్, మీ మన్సుసు దుకమ్ దాన్ నిండ్రిత మనాద్.

7 గాని నాను నిజం మీ వెట వెహ్తాన, మిజి మేలు వాని వందిజె నాను సొన్నిన. నాను సొన్ ఏండ మహిజ, తోడుః మంజినికాన్ మీ డగ్రు రెవన్. గాని నాను సొహిజ, నాను వన్నిజ్ మీ డగ్రు పొక్తు.

8 వాండ్రు వాజి, దేవుణుదిజ్ నమ్మిఇవరిజ్ పాపం ఇహిజ ఇన్నిక ఇజి, నాను నీతి నిజాయితి మన్నికాన్ ఇజి, దేవుణు సీని ఎలాకాలం మన్ని సిక్ ఇన్నిక ఇజి కసితం వెహ్తా తోరిస్సాన్.

9 వారు పాపం కిత్తమనార్ ఇజి వాండ్రు కసితం వెహ్తా తోరిస్సాన్. ఎందానిజ్ ఇహిజ, వారు నజి నమ్మివర్.

10 నాను నీతి నిజాయితి మన్నికాన్ ఇజి వాండ్రు కసితం వెహ్తా తోరిస్సాన్. ఎందనిజ్ ఇహిజ, నాను నా బుబ్బ డగ్రు సొన్ సిన. మీరు నజి మరి తొఇదెర్.

11 దేవుణు సీని ఎలాకాలం మన్ని సిక్ ఇన్నిక ఇజి వరిజ్ కసితం వెహ్తా తోరిస్సాన్. ఎందానిజ్ ఇహిజ, దేవుణుదిజ్ నమ్మి ఇ వరి మున్సు అతికారం కిని సయ్ తాసుజ్, దేవుణు ఎలాకాలం మన్ని సిక్ సిత్తమనాన్.

12 ‘నజి మరి నండొ మిజి వెహ్తాజ్ మనాద్, గాని ఏలు మీరు నసా అర్దం కిదెజ్ అట్ ఇదెర్.

13 గాని దేవుణు వందిజ్ నిజమాతికెజ్ నెన్పిన్ని దేవుణు ఆత్మ వానివలె, వాండ్రు దేవుణు బాణిజ్ వాజిని విజు నిజమాతికెజ్ మీరు నెస్తెజ్ మిజి నడిఃపిసినాన్. వాండ్రు వన్ని సొంతదిక ఇనికబా వెహ్ఎన్. గాని బుబ్బు వెప్పినికెజ్ వెంజి మిజి వెహ్ఎన్. వాండ్రు జర్గిని వన్కాజ్ వందిజ్ మిజి వెహ్ఎన్.

14 నాను వెప్పిని నిజమాతికెజ్ వెంజి, అయాక మిజి వెహ్ఎన్. అయ లెకెండ్ నాను గొప్ప పెరికాన్ ఇజి మిజి తోరిస్సాన్.

15 బుబ్బెజ్ మన్నికెజ్ విజు నాదినె. అందెజె నాను వెహ్, నాను వెప్పిని నిజమాతికెజ్ వాండ్రు వెంజి, అయాక మిజి వెహ్ఎన్ ఇజి.

16 సెగం రోస్కు వెన్కా, నాను సొన. మీరు నజి మరి తోఇదెర్. మరి సెగం రోస్కు వెన్కా, మీరు నజి సూణిదెర్”.

17 వన్ని సిసూర్ లోఇ సెగెండార్ ఒరెన్ వెట ఒరెన్ ఈహు వెహ్ఎన్, “సెగం కాలం వెన్కా మీరు నజి తోఇదెర్. మరి సెగం కాలం వెన్కా మీరు నజి సూణిదెర్. నాను నా బుబ్బు డగ్రు సొనిసిన. అందెజె మీరు నజి తోఇదెర్”, ఇజి వాండ్రు వెప్పిని తరదం అర్దం ఇనిక? ఇజి.

18 “ ‘సెగం కాలం’ ఇజి వాండ్రు వెప్పిని దని అర్దం ఇన్నిక? వాండ్రు వెప్పిని దనిజ్ మిజి అర్దం రెవండ ఆజినాద్”, ఇజి మరి వర్గిజెనె మహార్.

19 దినివందిజ్ వారు వన్నిజ్ వెన్బాదెజ్ కోరిజనార్ ఇజి యేసు నెస్తాండ్రె, ఈహు వరిజ్ వెప్పినాన్, “సెగం కాలం వెన్కా మీరు నజి తోఇదెర్. మరి సెగం కాలం వెన్కా మీరు నజి సూణిదెర్”, ఇజి నాను వెహ్ దని అర్దం ఇన్నిక ఇజినా మీరు ఒరెన్దిజ్ ఒరెన్ వెన్బాజినిదెర్?

20 మీరు దుకం కిజి అడఃబానిదెర్ గాని దేవుణుదిజ్ దూసిస్సికార్ సర్ద ఆనార్. మీరు దుకం కినిదెర్ గాని మీ దుకం వెనుక సర్దమనాద్ ఇజి నాను మీ వెట నిజం వెప్పిన.

21 ఉండ్రి బోదెలి ఏరుఈబదెజ్ నొపిదిజ్ అడఃబానాద్. ఎందానిజ్ ఇహిజ, దనిజ్ నెగెండ్ ఆదెజ్ కాలం ఆతాద్. గాని దన్నికొడొః పుట్టిజ, లోకమ్దు ఒరెన్ పుట్టాన్ ఇజి సర్దదాన్ అయా బాదెజ్ అది ఎత్తు కివద్.

22 అయాలెకెండె మిజి బా. మీరు ఏలు దుకం ఆనిదెర్. గాని నాను మర్జి వానివలె మిజి మరి సూణ. అయావలె మీరు సర్దఅనిదెర్. అయా సర్ద ఎయెన్బా మీ బాణిజ్లాగ్దెజ్అట్ఎన్.

23 నాను నిజితి సొహి వెన్కా, మీరు ఇనికబా నెస్టెజ్నజి వెన్బాఇదెర్. ఎందానిజ్ ఇహిజ, దేవుణు ఆత్మ మిజి నెస్పిస్నాన్. నా ఇస్టమ్దిజ్ కూడితి మన్నికెజ్ఇన్నికబా మీరు బుబ్బెజ్ లొస్తిజ, వాండ్రు అయాక సీనాన్, ఇజి నాను నిజం మీ వెట వెస్సాన్.

24 ఏలుదాక నా ఇస్టమ్దిజ్ కూడితి మన్నికెజ్ ఇన్నికబా లొస్ఇతిదెర్. మీ సర్ద పూర్తి ఆని వందిజ్లొస్తు. మిజి దొహ్కానాద్.

25 నాను మిజి కతవజి యా సజతిజ్నెస్పిస్త మన. గాని కతవజి నెస్పిన్ఏండ, బుబ్బ వందిజ్ మిజి టెట అర్దం ఆనిలెకెండె వెస్సాకాలం వాజినాద్.

26 అయా కాలమ్దు, నా ఇస్టమ్దిజ్ కూడితి మన్నికెజ్ మీరు లొస్సిదెర్. మీరు లొస్తికెజ్ వరిజ్ సీఅ ఇజి బుబ్బెజ్ వెహ్న ఇజి నాను వెహ్న.

27 ఎందానిజ్ ఇహిజ, బుబ్బనె మిజి నండొ ప్రేమిస్నాన్. మీరు నజి ప్రేమిస్సిదెర్. నాను బుబ్బ బాణిజ్వాత ఇజి మీరు నమిజినిదెర్. అందెజె వాండ్రు మిజి నండొ ప్రేమిస్నాన్.

28 నాను బుబ్బ బాణిజె యా లోకమ్దు వాత. ఏలు నాను యా లోకం డిసి మర్జి బుబ్బ డగ్రు సొన్సిన”.

29 నస్తివలె వన్ని సీసూర్, “ఇదిలో, వానివలె నీను కత లెకెండె ఆవండ, అర్దం ఆని లెకెండె వెస్సాని.

30 నీను విజు నెస్సికి ఇజి ఏలు మాపు నెసినాప్. ఎయెర్బా నిజి వెన్బాఎండ ముజాలె, వారు ఒడెబిజినికెజ్ నీను నెసిని ఇజి మాపు నెసినాప్. అందెజె నీను దేవుణు బాణిజ్వాతికి ఇజి మాపు నమ్మిజినాప్”, ఇజి వెహ్నార్.

31 అందెజె యేను, “మీరు ఏలు నమిజినిదెరా?

32 ఇదిలో, మీరు మీ ఇల్కాజ్సెద్రిజి సొని కాలం వాజినాద్. అయాక ఏలె వాత మనాద్. మీరు నజి డిసి సొనిదెర్లె. నాను ఒరెనె ఆన. గాని నాను ఒరెనె ఆవ. నా బుబ్బ నావెట మనాన్.

33 మీరు నా వెట కూడితి మన్నిదెర్. అందెజె మీరు సమాదనం దాన్ మండ్రెజ్ నాను యా సజతిజ్ మిజి వెహ్తా మన. యా లోకమ్దు మిజి కన్టమ్కు బాదెజ్మనె. గాని దయ్ రమ్దాన్ మండ్రు. నాను యా లోకమ్దు మన్ని దేవుణుదిజ్ దూసిన్సివరిజ్ గెలస్త మన్న.

17

యేసు వన్నివందిజ్ పార్దనం కిజినాన్

1 యా మాటెజ్ వెహ్సి వీస్తాండ్రె, యేసు మున్కు పరలోకం దరోట్ బేసి ఈహు పార్దనం కిజినాన్. “ఓ బా, నాను సాదెజ్ నీను ఏర్ పాటుకితి కాలండ్రు ఆత మనాద్. నీను గొప్పపెరికి ఇజి నీ మరిన్ ఆత్తి నాను తోరిన్సి వందిజ్ ని మరిన్ ఆత్తి నాను గొప్పపెరికాన్ ఇజి నీను తోరిన్ ఆ.

2 నీను నజి సీతిలోకుర్ విజెరిజ్ ఎలాకాలం దేవుణువెట బత్కినిబత్కు నాను సీనివందిజ్, నీను లోకుర్ విజెరె మున్కు నజి అతికారం సీతి.

3 ఒరెండ్రె నిజమాతి దేవుణుఆతి నిజిని, నీను యా లోకమ్దు పొక్తి యేసు క్రిస్తుజ్ నెస్తిజనె ఎలాకాలం దేవుణువెట బత్కినిబత్కు మనాద్.

4 నాను కిదెజ్ ఇజి నీను నజి సీతి పణివిజు నాను పూర్తి కిజి నీను గొప్పపెరికి ఇజి బూమిమున్కు నాను తోరిస్త.

5 ఏలు ఓ బా, లోకం నీను పుటిన్సి ముజుల నివెట నాను మహిపత నజి గవ్ రం కితిలెకెండ, ఏలు నీ ఎద్రు నజి గవ్ రం కితి.

యేసు సిసూర్ వందిజ్ పార్దనం కిజినాన్.

6 నీను నజి సీతివరిజ్ నాను నీ వందిజ్ వెహ్సి తోరిసి నెస్తిస్త. వీరు దేవుణుదిజ్ దూసిన్సి ననికార్ ఆవర్. వీరు నీ వారు. నీను వరిజ్ నజి సీతి. నీ మాటెజు వారు లోజితార్.

7 నీను నజి సీతి విజు నీబాణిజె వాతెమనె ఇజి ఏలు వారు నెస్తార్.

8 ఎందానిజ్ ఇహిజు, నీను నజి సీతి మాటెజ్ నాను వరిజ్ సీత. వారు అయకెజ్ నమ్మితార్. నాను నీ బాణిజ్ వాతికాన్ ఇజి వారు అనుమానం సిల్లెండ నెస్తార్. నీనె నజి పొక్తి ఇజి వారు నమ్మిత మనార్.

9 నాను యా సిసూర్వందిజ్ పార్దనం కిజిన. యా లోకమ్ది లోకుర్ విజెరెవందిజ్ నాను పార్దనం కివి. గాని నీను నజి సీతి విరివందిజ్ పార్దనం కిజిన. ఎందానిజ్ ఇహిజు, వీరు నీ వారు.

10 నా వారు విజెరె నీ వారు. నీ వారు విజెరె నా వారు. అయలెకెండ్ వారు బత్తినారె, నాను గొప్పపెరికాన్ ఇజి వారు తోరిసినార్.

11 ఏలు నాను నీ డగ్రు వాజిన. నాను మరి యా లోకమ్దు మన్ ఏ. గాని వీరు ఇబ్బె మంజినార్. ఓ నెగ్గి బుబ్బు, మాటు ఉండ్రె ఆతి లెకెండ్ వీరుబా ఉండ్రె ఆదెజ్, నీను నజి సీతి సత్తుదాన్ వరిజ్ కాపాడెఃఅ.

12 నాను యా లోకమ్దు వరి వెట మహివలె, నీను నజి సీతి సత్తుదాన్ వరిజ్ కాపాడెఃత. నాను వరిజ్ నెగ్గెండ తప్రిసి మహ. వరి లోఱ ఎలాకాలం నాసనం ఆదెజ్ మన్నికాన్ ఆవీండ, మహికార్ విజెరె ఎలాకాలం నాసనం ఆవెతార్. దేవుణు మాటదు రాస్తి మనికెజ్ పూర్తి ఆదెజ్ యాకెజ్ విజు జర్గిదెజ్ వలె.

13 నాను ఏలు నీ డగ్రు వాజిన. నజి మన్ని సర్ద వరి మన్నుదుబా నిండ్రు మంజిని వందిజె, నాను యా లోకమ్దు మన్నివలెనె యా సజతిజ్ వెహ్సిన.

14 నాను వరిజ్ నీ మాటెజ్ సీత మన్ను. యా లోకమ్దు మన్ని దేవుణుదిజ్ దూసిస్సికార్ వరిజ్ దూసిస్టార్. ఎందానిజ్ ఇహిజు, నాను లోకమ్దికాన్ ఆఇలెకెండ్, వారు బా లోకమ్దికార్ ఆవెర్.

15 నీను వరిజ్ యా లోకమ్దాన్ ఒఅ ఇజి నాను పార్దనం కివి గాని సయ్యూను బాణిజ్ వరిజ్ కాపాడెఃఅ ఇజినె పార్దనం కిజిన.

16 నాను లోకమ్దికాన్ ఆఇలెకెండ్, వారు బా లోకమ్దికార్ ఆవెర్.

17 నీ నిజమాతి మాటెజ్ నెన్ పిసి, వారు దేవుణువందిజ్ కేట ఆతిలెకెండ్ వరిజ్ ఇడెఃఅ. నీ మాటెజ్ నిజమాతి మాటెజ్.

18 నీను నజి యా లోకమ్దు పొక్తి లెకెండ్, నాను వరిజ్ లోకమ్దు పొక్తిన.

19 నిజమాతి మాట నెసి వారు వరిజె నీ కీదు ఒపజెప్పిని వందిజ్, నాను వరి వందిజ్ ని కీదు ఒపజెపె ఆజిన.

యేసు దేవుణుదిజ్ నమ్మితివరిజ్ విజెరెవందిజ్ పార్దనం కిజినాన్

20-21 ఓ బా, నాను కిజిని పార్దనం వరి వందిజె ఆవ. వరి మాటెజ్ వెంజి నమ్మిదెజ్మన్ని వరిజ్విజెరె వందిజ్ నాను పార్దనం కిజిన. ఎందానిజ్ఇహిజ, నీను నా వెట కూడఃజి మంజిని లెకెండ్, నాను నీ వెట కూడఃజి మంజిని లెకెండ్ వారు విజెరె ఉండ్రె ఆదెజ్. నీను నజి పోక్తి మన్ని ఇజి లోకమ్ది లోకుర్ విజెరె నమ్మినివందిజ్ వారు మావెట కూడఃజి మనీర్.

22 నాను పెరికాన్ ఇజి నీను నజి గవ్దరం నాను వరిజ్ సిత మన. మాటు ఉండ్రె ఆతి లెకెండ్ వారుబా ఒండ్రె అదెజె నాను సిత్ర.

23 వారు పూర్తి ఉండ్రె ఆనివందిజ్ నాను వరివెట కూడిఃత మన. నీను నా వెట కూడిఃతి మన్ని. నీను నజి పోక్తి ఇజి, నీను నజి ప్రేమిన్ని లెకెండ్వరిజ్బా ప్రేమిన్ని ఇజి లోకుర్విజరె నెన్ని వందిజ్ వారు ఉండ్రె ఆదెజ్.

24 ఓ బా, నీను వరిజ్నజి సిత. అందెజె నాను మంజిని బాన్వారుబా మండ్రెజ్ ఇజి నాను కోరిజిన. ఎందానిజ్ఇహిజ, నాను గొప్ప పెరికాన్ ఇజి నీను నజి సిత గవ్దరం వారు సుడఃదెజె. లోకం పుటిన్వండ ముజాల, నీను నజి ప్రేమిస్తి. అందెజె నీను నజి అయా గవ్దరం సిత్ర.

25 నీతి నిజాయితి మన్ని బుబ్బ, లోకమ్ది లోకుర్ నిజి నెన్ఎర్. గాని నాను నెన్న. నీను నజి పోక్తి ఇజి వీరు నెసినార్.

26 నాను వరి వెట కూడఃజి మంజిని వందిజ్, నీను నజి ప్రేమిస్తి లెకెండ్, వారు బా మహివరిజ్ ప్రేమిన్నివందిజ్ నాను నీ వందిజ్ వరిజ్ నెన్పిస్త మన. నెన్పిసినె మంజిన.

18

యేసుజ్ అరెస్తు కిజినార్

1 యేసు పార్దనం వీస్తి వెన్కా, వన్ని సినూర్వెట సోతాండ్రె, కెద్రెన్ఇని జోరెడాట్టి సోహాన్. అబ్బె ఉండ్రె టోట మహాద్. వాండ్రుని వన్నిసినూర్ అయా టోటాదు సోహార్.

2 నండో సుట్కు యేసుని వన్నిసినూర్ అబ్బె కూడఃజి మహార్. అందెజె యేసు అయా టోటాదు మంజినాన్లె ఇజి యూద నెస్పాన్. వీండ్రె యేసుజ్యుదురి అదికారిజ కీదు ఒపజెప్పికాన్.

3 అందెజె యూద అబె వాతాన్. పెరి పుజెరిజు పరిసయ్దురు పోక్తి సెగొండార్ దేవుణు గుడిఃది జమాజ్ణు, మరి రోమ సయ్నమ్దిది సెగొండారిజ్బా వన్నివెట కూక్త తత్తాన్. వారు సిను బొద్దు, లాండెరిజు, కూణమ్కు అస్త మహార్.

4 యేసు వన్ని ముస్కు వానికెజ్విజు నెసినె, వాండ్రు సోతాండ్రె వరిజ్, “మీరు ఎయెరిజ్ రెబానిదెర్?”, ఇజి వెన్బాతాన్.

5 దన్నిజ్ వారు, “నజరేతుది యేసుజ్”, ఇహార్. అందెజె వాండ్రు, “వాండ్రు నానె”, ఇజి వెప్తాన్. అయావలె యేసుజ్ ఒపజెప్పి యూద వరి వెట నిహ మహాన్.

6 ‘వాండ్రు నానె’, ఇజి యేసు వరిజ్ వెప్తావలె, వారు వెన్కా గుసె ఆజి బూమిదు అర్తార్.

7 మరి వాండ్రు వరిజ్ వెన్బాతాన్, “మీరు ఎయెరిజ్ రెబానిదెర్?”, ఇజి. “నజరేతుది యేసుజ్”, ఇహార్ వారు.

8 అందెజె యేసు, “నాను మిజి వెప్తాగదె, వాండ్రు నానె ఇజి. మీరు నజి రెబానిదెర్ ఇహిజ, నా సినూర్ ఆత్తి విరిజ్ పోక్తు”, ఇజి వెప్తాన్.

9 వారు సినూరిజ్ పోక్తిజ్, ‘నీను నజి సీతి వరి లోఇ ఒరెన్ వన్నిజ్బా నాను పాడుకివి’ ఇజి వాండ్రు ముజాలె వెప్తా మాటెజ్ పూర్తి ఆతె.

10 సిమోన్ పేతురు డగ్గు ఉండ్రీ కూడం మహాద్. నస్తివలె వాండ్రు అయాక లాగితండ్రె, విజు పుజెరిజు ముస్కు పెరిపుజెరి పణిమన్నిసిజ్ ఉణెర్గిబి కత్తాన్. అయా పణిమన్నిసి పేరు మల్కు.

11 యేసు పేతురుజ్, “నీ కూడం దన్నిఒరదు ఇడఃఅ. నాను ఓరిస్సెజ్నా బుబ్బి ఏర్పాటుకితి స్రమెజ్ నాను ఓరిస్సెజ్అఎద్ఇజి నీను ఒడఃబిజినిదా?”, ఇజి వెప్తాన్.

యేసుజ్అన్న ముజాల ఒసినార్

12-13 నస్తివలె రోమ సయ్నమ్దికార్, వరి అతికారి, జమానుర్ యేసుజ్ అస్తారె తోహ్కతార్. వారు వన్నిజ్ తోహ్కతారె, ముజాల,

అన్న ఇని వన్నిడగు ఒత్తార్. వాండ్రు అయా ఏంటు విజు పుజెరిజ ముస్సు పెరి పుజెరి ఆతి కయపెజ్ మామ్సి.

14 యా కయపనె, 'లోకుర్విజెరె వందిజ్ ఒరెన్ సానికాదె నెగెద్' ఇజి యూదురి అతికారిజ్ బుద్ది వెహ్తా మహాన్.

పేతురు యేసుజ్ నెన్వ ఇజివెహ్సినాన్

15 సిమోన్ పేతురు ని మరి ఒరెన్సినూ యేసు వెన్కా సాహార్. అయా సినూ, విజు పుజెరిజ ముస్సు పెరిపుజెరిజ్ నెల్వ ఆతికాన్. అందెజె వాండ్రు యేసువెట పెరిపుజెరి ఇండ్రోణి డేవారు సాహాన్.

16 పేతురు గవుని వెల్లి నిహమహాన్. పెరిపుజెరిజ్ నెల్వ ఆతి అయా సినూ మర్జి వాతండ్రె, గవ్నిడగు నిల్చి మంజిని అయ్లిదిజ్ వెహ్తాండ్రె, పేతురుజ్ లోఇ కూక్త ఒత్తాన్.

17 అయావలె అయా అయ్లి పేతురువెట, "నీనుబా వన్ని సినూలోఇ ఒరిగదె?", ఇజి వెన్బాతాన్. దన్నిజ్వాండ్రు, "నాను ఆవ్?", ఇహాన్.

18 అయావలె గొప్ప పిని మహాద్. అందెజె అతికారిజుని పణిమన్నిసిర్సిను ఎర్సి దన్ని సుటులం నిల్చికాయ్జి మహార్. పేతురుబా వరివెట నిహండ్రె, సిను కాయ్జి మహాన్.

పెరి పుజెరి యేసుజ్వెన్బాజినాన్

19 అయావలె, విజు పుజెరిజ ముస్సు మన్ని పెరిపుజెరి యేసుజ్ వన్నిసినూర్ వందిజ్ వాండ్రు నెన్పిస్తి బోద వందిజ్ వెన్బాజి మహాన్.

20 అందెజె యేసు, "నాను లోకుర్ విజెరె ఎద్రునె వెహ్తామన. యూదురు విజెరె కూడ్డి వాజి మంజిని, యూదురి మీటిజ్ ఇల్కాజ్ని దేవుణగుడిడు ఎస్తివలెబా నేర్పిసి మహా. నాను ఇనికబా డొజసాటు వెహ్వావిత.

21 మరి ఎందానిజ్ నజి వెన్బాజిని? నా మాట విహివరిజ్వెన్బాఅ. నాను వెహ్కెజ్వరితికెజ్వారు నెస్సార్", ఇజి వెహ్హాన్.

22 యేసు యాకెజ్ వెహ్హిజ్, అబ్బె నిహిమహి అతికారిజి లోఇ ఒరెన్ యేసుజ్ ఉండ్రె లెపడెయితాండ్రె, "యాలెకెండ విజు పుజెరిజ ముస్సు మన్ని పెరిపుజెరిజ్ మర్జి వెహ్సిని?", ఇజి వెహ్హాన్.

23 అయావలె యేసు, “నాను తవు ఇన్నిక వెహ్తాజ, అయాక నజీ వెహ్తా. గాని నాను నిజం వెహ్తాజ, ఎందనిజ్ నజీ డెఱిజిని?”, ఇజి వెహ్తాన్.

24 అందెజె అన్న వన్నిజ్ తొహ్తా డెఱిజి విజు పుజెరిజి మున్ను పెరిపుజెరి కయవడగు పొక్తాన్.

యేసుజ్ నెన్వ ఇజి పేతురు మరివెహ్సినాన్

25 పేతురు సిసు కాయిజి నిహ మహాన్. అయావలె మహికార్వన్నిజ్, “నీనుబా వన్ని సిసూర్లోఇ ఒరిగదె?”, ఇజి వెన్బాతాన్. గాని పేతురు, “నాను ఆవ్”, ఇజి కెవ్తాన్.

26 నస్తివలె పేతురు గిబ్బి తెవ్కతి పణిమన్నిసి బంతుకులు ఒరెన్ అబ్బె మహాన్. వాండ్రు విజు పుజెరిజి మున్ను మన్ని పెరి పెరి పుజెరి పణిమన్నిసిలోఇ ఒరెన్. వాండ్రు, “నిజీ వన్నివెట టోటాదు నాను సుడెఱిగదె?”, ఇహాన్.

27 మరిబా, “నాను నెన్వ”, ఇజి వెహ్తాన్. వెటనె కొరు కెరెతాద్.

యేసుజ్ పిలాతు ముజాల ఒసినార్

28 వెన్కా యూదురు యేసుజ్ కయవ బాణిజ్ రోమా గవర్నరు మన్ని పెరి ఇండ్రో ఒతార్. అయావలె పెందాల్ ఆతాద్. యూదురు ఆఇ వన్ని ఇండ్రో డుగ్జి మయ్ల ఆనాప్ ఇజి ఒడిఱిబిజి వారు గవర్నరు మన్ని ఇండ్రో డుఱిగ్వతార్. ఎందానిజ్ ఇహిజ, వారు పస్క బోజనం ఉండెజ్ సుబమ్వక్ మండ్రెజ్ వలె. అయాక ఉండ్రీ ఆసారం.

29 అందెజె గవర్నరు ఆతి పిలాతు, వెల్లి పరిడగు వాతండ్రె, విని మున్ను ఇనిఇని నేరమ్కు మొప్పినిదెర్?”, ఇజి వెన్బాతాన్.

30 అయావలె వారు, “వీండ్రు తవు కిఇకాన్ ఇహిజ, నీ బాన్ తెవతాప్ మరి”, ఇజి మర్జి వెహ్తార్.

31 పిలాతు పరిజ్, “మీరె వన్నిజ్ ఒసి, మీ యూదురి రూలుదు మన్ని వజ తీర్పు సీదు”, ఇహాన్. దనిజ్ వారు, “ఎయెరిజ్ బా సప్తెజ్ మజీ అక్కుసిల్లెద్”, ఇహాన్.

32 యేసుఎలాగ మర్తి సాపు సానాన్ ఇజి వాండ్రు వెహ్తా మాటెజ్ పూర్తి ఆదెజ్ యాక జర్గితాద్.

33 పిలాతు వన్ని ఇండ్రో మర్జి సాహాండ్రె, యేసుజ్ కూక్పిస్తాండ్రె వన్నిజ్, “నీను యుదురిజ్ రాజునా?”, ఇజి వెన్ బాతాన్.

34 అందెజె యేసు, “నీలోఇహాన్ వాతి మాటనా, మహికార్నా వందిజ్ నిజి వెహ్తారా?”, ఇజి వెన్ బాతాన్.

35 అయావలె పిలాతు, “నాను యూద వాండ్రనా? నీ సొంత లోకుర్ని నీ సొంత పెరిపుజెరిజు నిజి నాబాన్ ఒపజెప్తార్. నీను ఇన్నిక కితి?”, ఇజి వెహ్తాన్.

36 అందెజె యేసు, “నా అతికారం యా లోకమ్ది రాజురిజ్ మన్ని అతికారం లెకెండ మన్నిక ఆవిద్. నన్నిఅతికారం నజి మహిజు, యూదురు నజి అరెస్టు కివిండ నా సిసూర్ అడ్డు కిత్తార్ మరి. గాని నాను యా లోకమ్ది రాజు ఆవి”, ఇజి వెహ్తాన్.

37 “అహిజు, నీను ఒరెన్ రాజునా?”, ఇజి పిలాతు వెహ్తాన్. అందెజె యేసు, “నాను రాజు ఇజి నీను వెహ్తాని. నిజమాతి మాటెజ్ వెహ్తాని వందిజె నాను పుట్టానె యా లోకమ్దు వాత. నీజమాతికెజ్ కోరిజినికాన్ నాను వెహ్తాని మాటెజ్ వినాన్”, ఇజి వెహ్తాన్.

38 అయావలె పిలాతు, “నిజమాతి మాటెజ్ ఇన్నికెజ్?”, ఇజి వెన్ బాతాన్. వెన్ బాతాండ్రె వాండ్రు వెల్లి యూదురు బాన్ సాహాండ్రె, “వినిజ్ తిర్పు సిదెజ్ విని లోఇ ఇన్ని నేరంబా తోర్విద్.

39 గాని మీ అలవాటులెకెండ, ఏంటు ఏంటు పస్కు పండోయ్ కాల్మదు, “కయ్దు మన్ని ఒరెన్ వన్నిజ్ మజి డిసి పోక్ అ”, ఇజి మీరు లొస్సిదెర్. అందెజె యుదురిజ్ రాజుజ్ నాను డిసి సిదెజ్ మీరు కోరిజినిదెరా?”, ఇజి వెన్ బాతాన్.

40 అయావలె వారు, “పోని! వినిజ్ పోని. బరబెజ్ డిసి సిదా మజి”, ఇజి డెల్లి మర్జి వెహ్తాన్. యా బరబ్బు ఒరెన్ కజార్.

19

1 అందెజె పిలాతు, “యేసుజ్ ఒసి కొరడెజాణిజ్ డెయ్దు”, ఇజి సయ్ నమ్దివరిజ్ వెహ్తాన్.

2-3 సయ్నమ్దికార్ సాప్కాణిజ్ టోపి తయార్ కితారె వన్ని బురాదు తోడిగిస్తారే. వారు వన్నిజ్నండొ ఎరాని నరీ సాక్క తోడిగిస్తారె, వన్నిడగ్రు సాన్ని, “యూదురిజ్ రాజు నిజి జెయము”, ఇజి వెక్రిసి వెహ్తార్. వారు వన్ని లెపాదు డెయ్యూర్.

4 మరి ఉండ్రీసుటుబా, పిలాతు వన్ని ఇండ్రోణిజ్ వెల్లి వాతాండ్రె, మంద యూదురిజ్” ఇదిలో, వన్ని లొఇ ఇనితప్పబా నజి తోర్విద్ ఇజి మీరు నెన్నెజ్నాను వన్నిజ్నెల్లి మీ డగ్రు తప్పిన్”, ఇజి వెహ్తార్.

5 అందెజె యేసుజ్ సాప్కాణి టోపి ని ఎరాని సాక్క తోడిగిస్తారె వెల్లి తతార్. అయావలె పిలాతు వరిజ్, “ఇవిలోన్వాండ్రు”, ఇజి వెహ్తార్.

6 పెరిపుజెరిజుని దేవుణు గుడిడి జమాజ్ణు వన్నిజ్ నుడితారె, “వన్నిజ్ సిలువాదు కుటిజాణిజ్ డెయిజి నవ్అ, సిలువాదు కుటిజాణిజ్ డెయిజి నవ్అ”, ఇజి డెడిగిస్తారే. గాని పిలాతు, “విని లొఇ నజి ఇన్ని తపు బా తోర్విద్. అందెజె మీరె వన్నిజ్నెసి, సిలువాదు డెయిజి నప్ప”, ఇహోన్.

7 అయావలె వారు, “మజి మా యూదురి రూలుజ్మనాద్. అయా రూలుజ్ వజి వీండ్రు సాదెజ్వలె. ఎందానిజ్ఇహిజ, వీండ్రు, “నానె దేవుణు మరిసి ఇజి వెహ్తార్”, ఇహోన్.

8 పిలాతు యా మాటెజ్విహిజ్మరి ఒదె తియెల్అతాన్.

9 వాండ్రు మరి వన్ని ఇండ్రొ డుగితాండ్రె యేసుజ్, నీను ఎంబెణిజ్ వాతికి? ఇజి వెన్బాతాన్. గాని యేసు మర్జి ఇనికబా వెహ్వితాన్.

10 అందెజె పిలాతు, “నీను నా వెట వర్గఇదా? నిజి సిలువాదు కుటిజాణిజ్ డెయ్జి నప్పెజ్బా నజి అతికారం మనాద్. విడుదల కిదెజ్బా అతికారం మనాద్ ఇజి నీను నెన్ఇదా?”, ఇహోన్.

11 అందెజె యేసు, “నా ముస్కు దేవుణు నిజి అతికారం సితిజ్నె, నిజి అతికారం మనాద్. అందెజె నజి నీ బాన్ఒవజెప్తికాన్నిజి ఇంక లావు పాపం కితాన్”, ఇజి వెహ్తార్.

12 యా మాట విహండ్రె పిలాతు యేసుజ్విడుదల కిదెజ్నుడతాన్. గాని యూదురు, “నీను వినిజ్డిసి సితిజ, నీను కయ్సరు రాజుజ్కూలవాండ్రు ఆఇ. రాజు ఇజి వన్నిజ్ వాండ్రె

వెహె ఆనికాన్ ఎయెస్బా కయ్నరుజ్ పగ ఆతికాన్”, ఇజి మరి డటం డేల్స్తార్.

13 పిలాతు యా మాటెజ్విహివెలె, వాండ్రు యేసుజ్వెల్లి తతాన్. తతాండ్రె నాయం తిర్స్సికాన్ బన్ని కుర్సిదు బస్తాండ్రె యేసుజ్సిలువాదు డెయ్అ ఇజి తీర్పు సితాన్. అయా కుర్సి పణకాణిజ్ తయార్ కితి బాడిః ఇజి కూక్సి బాడిఃదు మనాద్. అయా బాడిఃజ్వెల్లి బాసదు గబత ఇనార్.

14 నస్తివలె పస్కుపండోయ్ నడిఃమి మన్ని విస్తాంతిదినం ముజాల మన్ని తయార్ఆని రోజు. పెందాల్ఆరు గంటజ్ఆతాద్. అయావలె పిలాతు, “ఇవిలోన్ మీ రాజు”, ఇజి యుదురిజ్ వెహ్హాన్.

15 అందెజె వారు, “సప్అ వన్నిజ్, సప్అ వన్నిజ్, సిలువాదు వన్నిజ్కుంటిజాణిజ్ డెయ్జి సవఅ”, ఇజి డెడిఃస్తార్. “నాను మీ రాజుజ్సిలువాదు కుటిజాణిజ్ డెయ్జి సప్తెజా?”, ఇజి పిలాతు వెన్బాతాన్. అయావలె పెరి పుజెరజు, “కయ్నరు ఒరెండ్రెమా రాజు. మరి ఎమేణి రాజు మజి సిల్లెన్”, ఇజి వెహ్హార్.

16 అందెజె పిలాతు యేసుజ్ సిలువాదు డెయ్జి సప్తెజ్ వరిజ్ ఒపజెప్తాన్. వారు వన్నిజ్ ఒతార్.

యేసుజ్ సిలువాదు పొక్సినార్

17 యేసు వన్ని సొంత సిలువ పిండిజి, పట్నం వెల్లి వాతండ్రె బుర్ర పిణికి ఇజి కూకె ఆని బాడిఃదు వాతాన్. ఎల్లి బాసదు దన్నిజ్ గోల్గోత ఇనార్.

18 అబ్బె సయ్నమ్దికార్ వన్నిజ్ సిలువాదు కుటిజాణిజ్ డెయ్తార్. వారు రివర్ లోకురిజ్బా వన్నివెట సిలువాదు కుటిజాణిజ్ డెయ్తార్. యేసుజ్ నడిఃమి ఇట్టాన్. ఒరెన్ వన్నిజ్ ఉణెర్ పడఃకాద్. ఒరెన్ డెబర పడఃకాద్. ఆహె సిలువాదు డెయ్తార్.

19 పిలాతుబా ఉండ్రె బోర్డు తయార్ కిటిస్తాండ్రె, సిలువాదు తొహ్కాత ఇట్టాన్. అయా బోర్డుదు, ‘నజరెతుదికాన్ ఆతి యేసు. యూదురిజ్ రాజు’, ఇజి రాసి ఇట్టాన్.

20 ఎబ్రి, గ్రీకు, రోమ యా మూండ్రి బాసెజాణిజ్ బోర్డుదు ఆహెరాస్త మహార్. యేసు ప్రబుజ్ సిలువాదు డెయితి బాడ్డిః పట్టుం డగ్రు మనాద్. అందెజె నండొండార్ యూదురు అయాక నద్విత్తార్.

21 నస్తవలె యూదుర్జ పెరి పుజెరిజు పిలాతుజ్, “యూదురిజ్ రాజు ఇజి రాస్సు. గాని ‘నానె యూదురిజ్ రాజు’, ఇజి వీండ్రు వెప్టాన్ ఇజి రాస్అ”, ఇహార్.

22 అందెజె పిలాతు, “నాను రాస్తి మన్నికదె మన్నిద్. మరి మారిన్వ”, ఇహాన్.

23 సయ్నమ్దికార్ యేసుజ్ సిలువాదు కుటిజాణిజ్ డెయితివలె వన్ని సొక్కెజ్ లాగితార్. వాండ్రు వ్డగితి మహి సాల్వదిజ్నాల్లి ముకెజ్కిస్తారె, ఉండ్రి ముక ఒరెన్ వన్నిజ్ ఆహె సీబె ఆతార్. పాదమ్దాక మంజిని ఉండ్రి నిరీ సొక్కబ మహాద్. అయాక కుటు సిలిక. ముస్సుహాన్ అడ్డి దాక కుటు సిల్లెండ ఉండ్రె లెకెండగుత మహాద్.

24 ఒరెన్ మరి ఒరెన్ వెట, “అయాక కిస్మాట్. ఎయెరిజ్ అయాక వానాద్ ఇజి సీటి పొక్సి సూణాట్”, ఇజి వర్గితార్. ‘నా సొల్వు వారు సీబె ఆతార్. నా నిరీ సొక వరిజ్ సీటి పొక్టార్*”, ఇజి దేవుణు మాటదు రాస్తి మనికెజ్ పూర్తి ఆని వందిజ్ యాక జర్గితాద్. సయ్నమ్దికార్ అయాలెకెండె కిత్తార్.

25 నస్తవలె, యేసుజ్ డెయ్తి సిలువ డగ్రు వన్ని అయిసి, వన్ని కొగ్రి అయ్సి, క్లోపా ఇన్ని వన్ని ఆల్ని మరియ, మగ్దలెనె మరియ ఇనికెజ్ నిహె మహె.

26 యేసువన్ని అయ్సిని వాండ్రు నండొ ప్రేమిస్తి సిసూ, డగ్రునిహి మహిక సుడెతాండ్రె అయ్సిజ్, “ఓ యా, నేండ్రుహాన్ వీండ్రె నీ మరిన్ లెకెండ మంజినాన్లె”, ఇజి వెప్టాన్.

27 మరి సిసూడుజ్, “ఇదిలో నీ యాయ”, ఇజి వెప్టాన్. నాండిహాన్అయా సిసూ దనిజ్వన్ని ఇండ్రొ కూక్ట ఒతాన్.

యేసు సాజినాన్

* 19:24 19:24 కీర్తన 22:18.

28 వెన్నా, బుబ్బు ఒపజెప్పి పణిజ్ విజు ఏలు పూర్తిఆతె, ఇజి ఏలు నెస్తాన్. నెస్తాండ్రె, కీర్తన పుస్తకమ్దు రాస్తి మన్ని మాటెజ్ పూర్తి ఆని వందిజ్ ‘నజీ ఏహ్కా కట్టినాద్’, ఇజి వెహ్తాన్.

29 అయావలె అబె నండొ సేందు ద్రాక్స కడు మన్ని ఉండ్రె డొకు మహాద్. సయ్యుమ్దికార్ ఉండ్రె దూది ననిక అయా సేందు ద్రాక్సకల్లుదు ముడుక్తారె, అయాక ఇసొపు మరాతి కొమాదు తొహ్తారె, వన్ని వెయ్దు సిత్తార్.

30 వాండ్రు అయాక ఉటాండ్రె, “నా పణిజ్పూర్తి ఆతాద్”, ఇజి వెహ్తాండ్రె, బుర్త వక్కి పాణం డిక్కిస్తాన్.

31 నస్తివలె, అయా రోజు విస్తాంతిదినం ముజాల మన్ని తయార్ఆని రోజు. మహ్స నాండిజ్ విస్తాంతి దినం. యా దినం ముకెలమాతిక. ఎందానిజ్ ఇహిజు, యూదురి పస్కు పండొయి అయనాండిజె మొదొలసినాద్. నాండిజ్ మొడ సిలువాదు మండ్రెజ్ వరిజ్ ఇస్టం సిల్లెద్. అందెజె యూదురు పిలాతుజ్, సిలువాదు పొక్తి వరి కాల్కు రుజు డెయ్జి వరిజ్ బేగి సపిసి, వరి పీనుగు సిలువెజాణిజ్ డిక్కిస్తాన్.

32 పిలాతు సెలవ సిత్తిజ్, సయ్నమ్దికార్ వాతారె, యేసువెట సిలువాదు డెయ్జి మొదొహి వన్ని కాల్కు రుజు డెయ్తార్. వెన్నా మహి వన్ని కాల్కు బా రుజు డెయ్తార్.

33 గాని యేసుడగ్రు వాతిజ్, వాండ్రు ముజాలె సాతాన్ ఇజి వారు నెస్తార్. అందెజె వారు వన్ని కాల్కు రుజు డెయ్వేతార్.

34 గాని సయ్యుమ్దివరి లొఇ ఒరెన్ బలెందాన్ ఉండ్రె పడకాదు గుతాన్. గుతిజ్వెటనె, ఏరు నల సొతె.

35 మీరుబా నమినివందిజ్, యాక జర్గితివలె సుడెతికాన్ దనివందిజ్ వెహ్తాన్. వాండ్రు వెహ్తాక నిజమ్నె. వాండ్రు నిజం వెహ్సినాన్ఇజి వాండ్రు నెస్తాన్.

36-37 ‘వన్ని డుముక లొఇ ఉండ్రె బా రుజ్విద్†’, ఇజి, మరి,

† 19:36-37 19:36-37 జీకె 12:10.

‘వారు గుతివన్నిజ్ వారు నూణార్#’, ఇజి రాస్తి మన్ని దేవుణు మాటెజ్ పూర్తిఅని వందిజె యా సజతిజ్ జర్గితె.

యేసుజ్ సమాది కిజినార్

38 యోసేపు ఇనికాన్ ఒరెన్ మహాన్. వాండ్రు అరిమతియ ఇని పట్టుమ్దికాన్. వాండ్రు యేసు సిసూ ఒరెన్. గాని వాండ్రు అయాక ఎయెరిజ్బా వెహ్ఎతాన్. ఎందానిజ్ ఇహిజ, వాండ్రు యూదురిజ్ తియెల్ ఆతార్. వెన్కా వాండ్రు యేసు పీనుగు సిలువదాన్ డిఃప్పి సమాది కిదెజ్ పిలాతుజ్ సెల్వ లొస్తాన్. సెల్వ సితిజ్ వాండ్రు వాతండ్రె మొడః ఒతాన్.

39 నికొదిమొ ఇన్నికాన్ఒరెన్బా వన్ని వెట సాహాన్. యా నికొదిమొనె, ముజాలె, యేసుజ్రెయ్తు సొన్ని సుడఃతికాన్. వాండ్రు డగ్గు ముప్పయ్ నాల్లి కె. జి, బోలము కలప్తి అగరు ఇన్ని మొడః సబ్ఎండ ఇచ్చి మాయమ్కు తత్తాన్

40 వారు రివర్, యేసు పీనుగు ఒతారె, మాయమ్కు రాసి తెలాని పాతెజాణ్ సుటిస్తార్. యూదురు సమాది కిని ముజాల, పీనుగుతయార్ కిని అలవాటు లెకెండ ఈహు కిత్తార్.

41 యేసుజ్ సిలువాదు డెయ్తి బాడిఃదు ఉండ్రె టోట మనాద్. అబ్బె పణుకుదు దొలిస్తి ఉండ్రె కొత్తదూకి మహాద్. అబ్బె ఎయెరిజ్బా ఎసెజ్బా ఇడఃవరె.

42 అయా రోజు యూదురి విస్త్రాంతిదినం ముజాల మన్ని తయార్అని రోజు. మరి, అయా దూకిడగ్గు మహాద్. అందెజె వారు యేసుజ్ అబ్బె ఇట్టార్.

20

1 వారమ్దిజ్ మొదొహి రోజు పెందాల్, సీకట్మన్బునె మగ్గలెనె మరియు పీనుగు నూనెజ్ రాస్టెజ్ దూకిదు సాహాద్. అది వాతిజ్, పీనుగుఇడ్తి సమాదిదిజ్ మూక్తి పణుకు లాగితిక సుడఃతాద్.

‡ 19:36-37 19:36-37 నిర్గమ 12:46, కీర్తన 34:20.

2 అందెజె అది ఉక్కోజి సొన్ని, యేసు నంఠో ప్రేమిస్తి సిసూ బాన్, సిమోన్ పేతురుబాన్ వాతాదె వరిజ్, “ప్రబుజ్ సమాదిదాన్ వారు ఒతార్. వన్నిజ్ ఎంబె ఇడ్తారొ ఇజి మాపు నెన్ ఏవ్”, ఇజి వెప్తాద్. (మరియవెట మరి సెగొండెక్ బోదెక్ బా మహె)

3 అందెజె పేతురుని, అయా సిసూ సోతారె సమాదిదు సొహార్.

4 వారు రివర్ ఉక్కోజి సొన్ సి మహార్. గాని అయా సిసూ పేతురుజ్ ఇంక బేగి ఉక్కోతాండ్రె సమాది ముజుల్ వాతాన్.

5 వాండ్రు వజ్జి సుడతిజ్, తెలాని పాతెజ్ అబె అర్త మహిక సుడతాన్. వాండ్రు లొఇ డుగ్ ఏతాన్.

6-7 నస్తివలె సిమోన్ పేతురు వన్ని వెన్నా వాతండ్రె లొఇ డుగితాన్. వాండ్రు తెలాని పతెజ్ అర్తి మహిక సుడతాన్. యేసు బుర్త సుటిస్తి మహి పన్ సెబా అబ్బె అర్త మహిక సుడతాన్. అయా పన్ సె, తెలాని పాతవెట కూడె ఏండ సుటిస్తి డెసెనె వేరె మహాద్.

8 వెనుక ముజుల సమాదిదు వాతి సిసూబా డుగితాన్. వాండ్రు పాతెజ్ అర్తి మహిక సుడతాండ్రె, యేసు మర్జి నిజితాన్ ఇజి నమ్మితాన్.

9 యేసు సాతి పరిబాణిజ్ తవ్ ఏండ మర్జి నిజ్ నాన్ లె ఇజి దేవుణు మాటదు రాస్తి మన్ని మాటదిజ్ వారు ఇంక అర్థం కివెరె.

10 సిసూర్ వరి ఇల్కాజ్ మర్జి సొహార్.

యేసు మగ్గలెనె మరియెజ్ తోరె ఆజినాన్

11 మరియ మరి సమాదిదు వాత మహాద్. అది వెల్లినిహదె, అడఃబాజి మహాద్. అడఃబాజినె అది వజ్జి సమాది లొఇ సుడతాన్.

12 అయావలె, తెలాని పాతెజ్ పొర్ పాతి రివెర్ దేవుణు దూతెజి అది సుడతాన్. యేసు పినుగుమహి బాడిదు బస్త మహార్. పాదమ్క దరిజ్ ఒరెన్ బస్త మహాన్. బుర్త గాడిద్ ఒరెన్ బస్త మహాన్.

13 వారు మరియెజ్, “ఓ బీ ఎందానిజ్ నీను అడఃబాజిని?”, ఇజి వెన్ బాతార్. అందెజె అది, “నా ప్రబు మొడః ఎయెరొ పెప్తా ఒతార్. ఎంబె ఇడ్తారొ నజి తెలివెద్”, ఇజి వెప్తాద్.

14 యా మాటెజ్ వెప్తాదె, వెన్కా మర్జి బేస్తాద్. బేస్తిజ్ యేసు అబ్బె నిహి మహిక సుడఃతాద్. గాని వన్నిజ్ గుర్తు అన్వితాద్.

15 అయావలె యేసు, “ఓ బీ, ఎందానిజ్ నీను అడఃబాజిని? ఎయెరిజ్ రెబాజిని?”, ఇజి వెన్బాతాన్. వీండ్రు అయా టోటాదు పణి కినికాన్సు ఇజి ఒడిఃబిజి, “బాబు, నీను వన్ని పీనుగుపిండితి ఒతి మహిజ, ఎంబె ఇడ్డి మన్నిదో నజి వెహా. నాను సొన్ని వన్నిజ్ పెర్న ఒనాలె”, ఇజి వెప్తాద్.

16 నస్తివలె యేసు దన్నిజ్, “మరియ”, ఇజి కూక్తాద్. వెటనె అది మర్జి వన్ని దరిజ్ మప్తాద్. వాండ్రు యేసు ఇజి గుర్తు అస్తాదె ఎబ్రి బాసదు, “రబుని”, ఇజి కూక్తాద్. దని అర్థం బోదిస్సికాన్ ఇజి.

17 అయావలె యేసు, “నాను నా బుబ్బడగు ఇంక మర్జి సొన్వెనె. అందెజె నజిఅసి మన్మా. గాని నీను నా సిసూర్ డగు సొన్ని వరిజ్, “నాను నా బుబ్బడగు మర్జి సొన్వెనె. వాండ్రునె నా బుబ్బ మీ బుబ్బ. వాండ్రె నా దేవుణు మీ దేవుణు”, ఇజి వెహా”, ఇజి వెప్తాన్.

18 అందెజె మగ్గలెనె మరియు సిసూర్ డగు వాతాదె, “ప్రబుజ్ సుడఃత”, ఇజి వెప్తాద్. మరి ప్రబు దన్నిజ్ వెప్తికెజ్ బా వెప్తాద్.

యేసు వన్ని సిసూరిజ్ తోరె ఆజినాన్

19 అయా ఆదివారమ్నె, పొదోయ్ సిసూర్ కూడిఃతారె, సేప్టా కెప్పి బస్త మహార్. ఎందానిజ్ ఇహిజ, వారు యుదురిజ్ తియెల్ ఆతార్. యూదురు వరిజ్ అదికారుజ ఒపజెప్పార్ ఇజి. నస్తివలె యేసు వాతండ్రె వరినడిఃమి నిహండ్రె, “సమాదనం కల్లిపిద్”, ఇజి వెప్తాన్.

20 యాక వెప్తాండ్రె, సిలువాదు డెయ్ ఏ ఆతివెలె వన్ని కికాజ్, వన్ని పడఃకాద్ వాతి గాయమ్కు వాండ్రు వరిజ్ తోరిస్తాన్. ప్రబుజ్ సుడఃతారె సిసూర్ నండో నర్ద ఆతార్.

21-22 మరి బా యేసువరిజ్, “మిజి సమాదనం కల్లిపిద్. నా బుబ్బ వన్ని మాట బోదిస్తిజ్ నజి యా లోకమ్దు పోక్తి వజ నాను

మిజీ పోక్సిన”, ఇజి వెప్తాండ్రె, వరి మున్కు తూబితాన్. తూబితాండ్రె, వరిజ్, “దేవుణు ఆత్మదిజ్ మీ మన్కుడు ఇడోడు.

23 మీరు ఎయిపాపమ్కు సెమిస్సిదెరో, వరి పాపమ్కు సెమిస్త్ మనె. ఎయిపాపమ్కు మీరు సెమిస్ఇదెరో, అయకెజ్ సెమిసి మన్ఉ”, ఇజి వెప్తాన్.

యేసుతోమెజ్తోరె ఆజినాన్

24 యేసు సిసూరిజ్ తోరె ఆతివలె, పన్నెండు మన్నిసీర్ సిసూర్లోఇ మన్ని దిదుము ఇన్ని తోమా సిల్లెండ మహాన్.

25 అందెజె మహి సిసూర్, “మాపు ప్రబుజ్సుడోతాప్ ఇజి వెప్తాజ్, వాండ్రు, “నాను వన్ని కిక్కాజ్ కుంటిజాణిజ్ డెయ్తి గాయమ్ది మనదిజ్తోఎండ, అయా మనదు ముట్విండ, వన్ని పడోకాదు నాను కియు ఇడోవండ, వాండ్రు నిజిత మనాన్ ఇజి నమిఎ”, ఇహాన్.

26 ఉండ్రీ వారం వెన్కా వన్ని సిసూర్విజెరె మరిబా కూడితారె, ఉండ్రీ ఇండ్రో మహార్. తోమాబా వరివెట మహాన్. సేప్లా కెమె ఆత మహాద్. గాని యేసు వాతండ్రె వరినడిమి నిహండ్రె, “సమాదనం కల్గిపిద్”, ఇజి వెప్తాన్.

27 మరి తోమెజ్, “నీ డెస్కు ఇబ్బె ఇడోఅ. నా కికాజ్ సుడోఅ. నీ కియు సాప్పి నా పడోకాద్ మన్ని గాయమ్దు ఇడోఅ. అనుమానం సిల్లెండ నమిఅ”, ఇజి వెప్తాన్.

28 అయావలె తోమా, “నీనె నా ప్రబు. నీనె నా దేవుణు”, ఇజి వెప్తాన్.

29 అందెజె యేసు వన్నిజ్, “నీను నజి సుడోతిజ్ నిజితమనాన్ ఇజి నమ్మితి. నజి తోవిండ నమ్మితికార్ గొప్ప వారు”, ఇజి వెప్తాన్.

30 యేసు వన్నిసిసూర్జ నడిమి, మరి నండో బమ్మాని పణిజ్ కితాన్. అయకెజ్ యా పుస్తకమ్దు రాన్ఉ.

31 గాని, యేసు క్రీస్తు ఇజి, వాండ్రు దేవుణుమరిసి ఇజి మీరు నమ్మినివందిజ్, వన్ని మున్కు మన్ని మీ నమకమ్దాన్ మిజి

ఎలాకాలం దేవుణువెట బత్కిని బత్కు దొప్పివందిజ్ యాకెజ్ రాస్త మన్నె.

21

1 దిని వెనుక, యేసు తిబెరియ సమ్దరం డగ్రు మరి వన్ని సిసూర్జ తోరె ఆజినాన్. వాండ్రు ఈహు తోరె ఆతాన్.

2 సిమోన్ పేతురు, దిదిమ ఇజి కుకెఆని తోమా, గలీలయ ప్రాంతమ్ది కానా ఇన్ని పట్నమ్ది నతనయేలు, జెబెదయ మరిసిర్ఆతి యాకోబు యోహాను, మరి రివీర్ సిసూర్ కూడిత మహార్.

3 సిమోన్ పేతురు, “నాను మొయెజ్ అస్తెజ్సోన్సిన”, ఇజి వరిజ్ వెహ్తాన్. అయావలె వారు, “మాపు బా నీ వెట వానాప్”, ఇహార్. అందెజె వారు సోహరె, ఉండ్రె డోణి ఎక్తారె సోహర్. గాని ఆ రెయితు ఇనికబా అన్వితార్.

4 పొద్దు సోసి మహివలె, యేసు సమ్దరం దరిదు నిహాన్. గాని వన్ని సిసూర్ యేసుఇజి గుర్తు అన్వితార్.

5 అందెజె వాండ్రు వరిజ్, “తంబెరిజాండె, మొయెజ్ ఇన్నికబా అస్తెదెరా?”, ఇజి వెన్బాతాన్. వారు, “సిల్లెద్”, ఇజి వన్నిజ్ వెహ్తార్.

6 నస్తవలె వాండ్రు, “డోణి ఉణెర్ పడఃకాదు మీ వలెజ్పొక్తు. మిజి దొహ్కనె”, ఇజి వెహ్తాన్. వారు అయ లెకెండ కిత్తార్. మొయెజ్ నండో అరె. వల లాగ్దెజ్ అట్వితార్.

7 అయావలె, యేసు నండో ప్రేమిస్తె సిసూ, “వాండ్రు ప్రబు”, ఇజి పేతురుజ్ వెహ్తాన్. “వాండ్రు ప్రబు”, ఇజి అయా సిసూ వెహ్తా మాట విహి వెటనె, సిమోన్ పేతురు వాండ్రు లాగితి ఇడ్తి సొల్వ వ్డెగితాండ్రె, సమ్దరమ్దు డాట్టాన్.

8 వారు గటుదాన్ ఎంజు మెంసు నూరు మూరెజ్నె ధూరం మనార్. అందెజె మహి సిసూర్ మొయెజ్ మన్ని వల లాగ్జినె డోణిదు వాతార్.

9 వారు డిగ్జి వాతిజ్ గటుదు, సిసూ డిప్పుజ్ దనిమున్కు మొయెజ్ రొటెజ్ తోరితె.

10 యేసు వరిజ్, “మీరు ఏలు అస్తి మహి సెగం మొయెజ్ అగాట్”, ఇజి వెహ్తాన్.

11 సిమోన్ పేతురు డోణి ఎక్రాండ్రై వల గటుదు లాగితాన్. అబె నూటి యాబయి మూండ్రీ పెరి మొయెజ్వలదు నిండ్రితె మహె. గాని నిసా మహిజ్బా వల కింజ్వితాద్.

12 యేసు వరిజ్, “రదు తిండ్రు”, ఇజి వెహ్తాన్. వాండ్రు ప్రబు ఇజి వరిజ్తెలితార్. అందెజె, నీను ఎయి ఇజి వన్నిజ్ వెన్బాదెజ్ సిసూర్ లొఇ ఎయెన్ వన్నిజ్బా దయరం సిల్లెతాద్.

13 యేసు వాతాండ్రై, రొట్టెజ్ లాగితాండ్రై వరిజ్ సీబాత సితాన్. అయి లెకెండ్రై మొయెజ్బా సిత్తాన్.

14 యేసు సాతి వరిబాణిజ్ బత్తితి వెన్యా, దినివెట ఏలు ముసార్ సిసూర్జ తోరె ఆత్తాన్.

15 వారు తిహి వెన్యా, యేసు సిమొన్పేతురుజ్, “యోహాను మరిసి ఆతి సిమొను, నీను మహి సిసూర్జ ఇంక నీను నండ్రొ నజీ ప్రేమిస్సిదా?”, ఇజి వెన్బాతాన్. “ఒబ ప్రబువా, నాను నిజీ ప్రేమిస్సు ఇజి నీను నెస్సి”, ఇజి వాండ్రు వెహ్తాన్. అందెజె యేసు, “నా గొర్రె పిలెకాజ్మెవ్అ”, ఇజి వెహ్తాన్.

16 మరిబా యేసు వన్నిజ్, “యోహాను మరిసి ఆతి సిమొను, నీను నజీ ప్రేమిస్సిదా?”, ఇజి వెన్బాతాన్. “ఒబ ప్రబువా, నాను నిజీ ప్రేమిస్సు ఇజి నీను నెస్సి”, ఇజి రిజి వెహ్తాన్. అందెజె యేసు, “నా గొర్రెజ్అడిఃఅ”, ఇజి వెహ్తాన్.

17 “యోహాను మరిసిఆతి సిమొను, నజీ ప్రేమిస్సిదా?”, ఇజి ముసార్వెన్బాతాన్. నీను నజీ ప్రేమిస్సిదా ఇజి ముసార్దిజ్వెన్బాతిజ్, పేతురు బాద ఆతాన్. “ప్రబు నీను విజు నెస్సికి. నాను నిజీ ప్రేమిస్సు ఇజి నీను నెస్సి”, ఇజి పేతురు వెహ్తాన్. అందెజె యేసు, “నా గొర్రెజ్ మెవ్అ”, ఇజి వెహ్తాన్.

18 “నాను నిజం నీవెట వెహ్సిన, నీను దజడః మనివలె, నీను తయార్ ఆజి నీ ఇస్టం ఆతి బాడిఃదు సాహి. గాని నీను డొక్ర ఆనివెలె, నీకికు నీను సాప్పి. మరి ఎయెన్బా నిజీ తొహ్ని నిజీ ఇస్టం సిల్లి బాడిఃదు పిండిజి ఒనాన్”, ఇజి వెహ్తాన్.

19 పేతురు ఎలాగమర్తి సావు సాజి దేవుణు గొప్పపెరికాన్ ఇజి

తోరిస్నాండ్రో, దనివందిజ్ వాండ్రు యా మాటెజ్ వెహ్లాన్. వెన్కా వన్నిజ్, “నా సిసూ ఆజి రఅ”, ఇజి వెహ్లాన్.

20 పేతురు వెనుక మహ్తాండ్రె, యేసు నండో ప్రేమిస్తి సిసూ, వరి వెన్కా వాజినిక సుడతాన్. (యా సిసూనె పన్ను బోజనం తిహివలె యేసు గుంజమ్దు ఒరిగితాండ్రె, “ప్రబువా, నిజి అదికారిజ కీదు ఒపజెప్పికాన్ ఎయెన్”, ఇజి వెన్బాతికాన్).

21 పేతురు వన్నిజ్ సుడతాండ్రె, “ప్రబువా, వినిజ్ ఇన్నిక ఇర్గినాద్?”, ఇజి వెన్బాతాన్.

22 అందెజె యేసు, “నాను మర్జి వానిదాక వాండ్రు బత్కిదెజ్ నజి ఇస్టం ఆతిజ, నిజి ఇన్నిక? నీను నా సిసూ ఆజి వెన్కా వాదెజ్ వలె”, ఇజి వెహ్లాన్.

23 యేసు అయలెకెండ్ వెహ్లాజ్, యా సిసూ సావీన్ ఇజి ఉండ్రి మాట మహి వరి నడిమి సెద్రిస్తాద్. గాని వాండ్రు సావీన్ ఇజి యేసు వెహవీతాన్. నాను వానిదాక వాండ్రు బత్కిదెజ్ నజి ఇస్టం ఆతిజ, నిజి ఇన్నిక?”, ఇజినె వాండ్రు వెహ్లాన్.

24 యా సజతిజ వందిజ్ వెహ్లాకాన్ యా సిసూనె. వీండ్రె ఆయాకెజ్ రాస్త ఇట్టాన్. వాండ్రు వెహ్లాకెజ్ నిజం ఇజి మాపు నెసినాప్.

25 యేసు మరి నండో సజతిజ్ కిత్తాన్. అయాకెజ్ విజు రాసి ఇడదెజ్ ఇహిజ, రాసిని పుస్తకమ్ కు అస్తాజ్ యా లోకమ్దు మన్ని బాడ్డి సాల్ ఏద్ ఇజి నాను ఒడ్ కిస్తు ఇజి.

lxxxviii

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c